

第五版

大清光緒新法令

第五冊



大清新法令第三類目錄

任用

升轉

吏部議覆內閣奏變通侍讀典籍等官升途摺

會議政務處議覆御史趙炳麟奏司法人員官階終身按次升轉摺

外務部奏變通本部司員外用章程摺

吏部奏酌定本部漢軍堂主事升途摺

吏部奏請旨 簡員補授內閣學士缺並聲明現定辦法摺並缺目單

吏部議覆御史俾壽奏滿漢給事中御史升階一律安定章程摺

禮部詳訂三寺員缺升階清單已見官制類

大理院奏酌擬推丞升階摺同上

翰林院奏官階升轉宜定限制摺

截取分發

吏部遵 旨議奏內閣實缺典籍中書俸滿截取內用請作候補主事摺

吏部奏請各項分部人員仍照向章分發學習摺

頁數

一

二

三

三

四

五

六

七

八

兵部奏酌擬分發裁缺人員摺

兵部奏南北洋畢業漢侍衛分發章程摺

吏部奏酌擬降革人員開復後分發歸班片

吏部奏酌議變通分發章程併案覆奏摺

吏部奏變通滿蒙漢軍京外分發片

選補

兵部奏釐定水陸題推各缺輪補班次章程摺并章程

兵部奏提督等官借補展限章程片

吏部奏酌改六部滿蒙司員等選缺輪次摺并片

吏部遵議知縣參革遺缺變通敘補摺

吏部奏請整頓新疆補缺章程摺

吏部奏道府等項選補缺分酌定畫一章程摺

練兵處奏定陸軍人員補官體制摘要章程

吏部奏擬定教職雙月單月選班摺并清單

吏部奏擬將教職逐漸停選摺

吏部奏酌定舉貢錄就各員選補班次摺

吏部議覆御史王誠義奏州縣正途日少請將進士截取班優加選用摺

一三

吏部奏詳訂各部司員補缺輪次摺附片二

二四

宗人府奏請疏通宗室仕途摺

二五

吏部奏酌定裁缺衙門司員筆帖式改用班次摺

二六

吏部奏詳訂裁撤小京官及筆帖式改用內外官階班次摺附片

二七

吏部奏酌擬特旨分部人員補缺班次摺附片

二八

吏部奏酌擬截取揀選舉人選補班次摺

二九

吏部奏滿蒙漢軍文舉人及繙譯舉人截取揀選班次摺

三〇

吏部奏酌擬法部司員補缺輪次摺並表式

三一

吏部奏舉貢考職並優貢錄用知縣補缺班次章程摺

三二

吏部奏核議宗室選補章程摺并章程

三四

吏部奏變通御史傳補辦法摺

三八

吏部奏酌擬變通小京官選補辦法摺

三九

吏部議覆御史葉芾棠奏請限制應補知縣選班摺

三九

吏部奏明保人員准其接連選用片

四〇

步軍統領衙門奏變通題補員缺章程摺

四〇

度支部奏裁缺分部人員與本部資深人員一體較資補用片

四一

禮部奏變通裁缺人員補缺章程摺

四一

又奏各項烏佈變通辦理片

四二

吏部奏擬改雙月並雙單月知縣選輪摺

四二

又奏查銷雙月進士知縣本班並停止單月進士知縣銓選片

四三

又奏知縣以上應補各官均照知縣一律辦理片

四三

吏部會奏遵議改選章程摺并單

四四

吏部議覆直督奏變通直州同州判要缺補法摺

四八

法部奏酌擬七品小京官及八九品錄事官補缺章程摺并清單

四九

吏部奏酌擬傳補滿御史辦法摺

五一

調用

外務部議覆直督袁奏變通外部及出使人員章程摺

五一

吏部奏釐訂各衙門司員缺額並奏調人員一律查核摺

五三

憲政編查館會奏限制京外各衙門調用人員及游學畢業生辦法摺

五三

陸軍部奏嗣後奉旨簡放他省不准奏調原省陸軍人員片

五四

保獎

吏部議覆變通明保人員班次摺

兵部奏武職保案須先造履歷咨部摺

政務處遵議各省武備學堂委員教習保獎章程並酌改各學堂保獎新章

摺附片

政務處議覆御史劉汝驥奏請限制保舉酌定章程摺并章程

吏部奏酌擬畫一保舉章程摺

吏部奏酌擬警官保選截取限制摺

吏部奏變通洋務保獎章程摺

法部奏變通熱河司員章程並酌加獎勵摺

吏部議覆桂撫奏邊防出力人員改爲三年列保摺

吏部奏酌擬卓異人員錄用章程摺

廕襲

兵部奏酌擬廕生送部引見章程摺

吏部奏漢文武廕生請免考試摺

兵部會同吏部奏請襲世職未能畫一請申明舊章摺

兵部奏釐定請襲世職畫一章程摺

五四

五六

五七

六〇

六一

六一

六二

六三

六三

六四

六四

六五

六五

兵部奏世爵世職犯罪條例片

兵部咨各省世職作爲文生應試願以何項改請迅速報部文

舉貢生員出路

政務處奏酌擬舉貢生員出路章程摺

兵部奏酌擬武舉投票學習章程摺

吏部奏保送舉人見遺後酌予錄用摺并片

吏部奏舉貢錄用部屬人員擬請統分各部摺

禮部奏遵議籌給繙譯出路摺

畢業學生任用

練兵處奏議定陸軍畢業學生考試授官暫行章程摺并清單

考察政治館王大臣奏各省畢業學生請先以鄉官考試任用摺

直督袁等會奏變通調用留學生章程摺

學部奏限制考試游學畢業片

憲政編查館會奏核訂游學畢業生延試錄用章程摺并單

陸軍部奏軍馬醫經理各學堂畢業生擬照章補官片

學部奏游學畢業生擬由部先行考核再准應考片

六六

六六

六六

六八

六九

七〇

七〇

七一

七三

七三

七四

七四

七六

七六

學部咨各省轉飭各學堂畢業生領有執照始准赴部就職文
學部奏請 欽派大臣會同覈定游學生專門各員摺并單

七七
七七

捐例

戶部推廣捐復新章

七八

戶部奏查驗捐生加捐執照辦法片

八一

戶部奏停止實官捐輸摺

八二

度支部咨憲政編查館停選花樣州縣補交捐項酌量核減文

八三

俸給

外務部奏擲節使費摺并章程

八四

外務部奏隨使人員歸裝川資銀兩必實由洋回華始可照章發給片

八五

外務部奏新設荷蘭專館核定常年經費摺

八五

北洋大臣袁奏請將道府廳州所有各項陋規一律酌改公費摺

八六

吏部奏擬籌公費摺并清單

八六

學部奏定本部養廉章程並減成支給摺并單

八九

外務部奏定各使館歲支公費銀數清單

九〇

又各使館歲支俸薪公費總數并分季撥款清單

九〇

外務部奏酌定出使大臣等應支經費更訂章程摺并章程

九二

民政部奏援按請給八九品警官季俸摺

九四

附外務部咨出使各國大臣酌定造報畫一章程四條文

九四

考核懲戒

政務處奏請飭部院督撫認真課吏摺

九五

政務處奏考核各省州縣事實分別勸懲並擬畫一章程摺

九六

吏部奏添設學治館摺

九七

考察政治館奏考核州縣事實並酌擬辦法摺

九八

陸軍部奏武職赴引人員應申明例章摺

九九

憲政編查館酌擬切實考驗外官章程摺并清單

一〇〇

憲政編查館咨各督撫熱河都統暨吏部考驗外官應照定章辦理文

一〇二

吏部奏嚴定禁煙考成議叙議處各案摺并清單

一〇二

民政部奏擬訂考核巡警官吏章程摺并清單

一〇三

吏部奏議覆雲貴總督奏變通教雜調驗事宜摺

一〇四

吏部會奏催征南米酌擬改訂處分則例摺

一〇五

京察

吏部奏酌擬變通 京察事宜摺并清單

法部奏總檢察各廳人員舉行 京察略示限制摺

吏部奏續擬 京察事宜摺并清單

又奏法部民政部各廳 京察一等員數片

吏部遵議御史崇興奏嚴定 京察截取章程摺

守制

禮部奏陸軍部漢員仍應離任守制摺

御史俾齋奏嗣後京外官員丁憂請 飭回籍守制片

議恤

吏部奏河工邊防等議恤人員酌定限制片

一〇六

一〇八

一〇八

一〇九

一〇九

一一一

一一二

一一二

一一二

大清新法令第三類

任用

升轉

吏部奏議覆內閣奏變通侍讀典籍等官升途摺

光緒三十一年五月初二日內閣具奏侍讀典籍等官升途太隘擬請量爲疏通一摺奉 硃批吏部議奏欽此欽遵知照到部查原奏內開查會典內所載臣衙門職掌甚爲繁重該員等逐日到閣分任各事恭備要差異常勤苦由考取候補中書到閣分隸各處當差須歷任學習貼寫實缺中書各階方升典籍必資深三四十年始能保列一等題升侍讀除 京察保列一等奉 旨記名以道府用外並無別項升階侍讀與各部院員外郎既同一律而升途不一郎中員外郎除 京察一等奉 旨記名以道府用外有升四五品京堂有調各監督等差今吏部 奏准疏通以知府等官分省補用各新章惟臣衙門侍讀等升途較隘查臣衙門額設滿洲侍讀學士四缺從前遇有缺出俱由臣衙門侍讀內揀選升補嗣經改革以資深郎中題升停止侍讀升侍讀學士一階復於乾隆十七年經原任大學士公傅恆等奏准出缺後一次由吏部於五品京堂及郎中內題升一次由本衙門侍讀內擇其年久熟諳之員擬定正陪引 見恭候

簡用乾隆五十四年大學士誠謀英勇公臣阿桂等奏侍讀傅森明練勤政德甯明白詳慎均經先後奏補侍讀學士奉 旨允准在案嗣後侍讀停升侍讀學士惟有保送戶部三庫員外郎尙可疏通侍讀升調之階中書調升三庫司庫亦可疏通中書升階今戶部三庫裁併是以升途益隘臣等公同商酌擬請實任侍讀仍查照舊案遇有本衙門侍讀學士缺出一次由吏部照章辦理一次由本衙門侍讀擇其年久熟諳之員擬定正陪引 見恭候 簡用其侍讀典籍滿蒙中書如保有候補候選道府同通等官者照員外郎主事等章程准其呈請分省補用其蒙古侍讀漢軍侍讀等各有額缺均著仿照滿洲侍讀等升階一律辦理等因查定例內閣滿洲侍讀學士四缺由光祿寺少卿鴻臚寺少卿開列一次由科道保送引 見一次由宗人府理事官各部院宗室郎中滿洲郎中保送引 見一次至應補人員及奉 特旨升用者無論輪至何班俱列名在應升官之先一同開列帶領引 見候 旨簡用如輪班開列引 見之缺奉 旨將應補及 特旨升用人員 簡放者均俟本班升用一人後再行過班又內閣漢侍讀學士開列與滿員一律辦理惟漢員無理事官缺分遇郎中到班時祇將六部郎中各保送二員引 見補授如卿員科道郎中應升時遇有勞績保舉以升階開列在前並保舉應升之缺升用均列名於各本項應升人員之前其各項候補人員列名於開列在前人員之先又內閣蒙古侍讀學士二缺專以蒙古侍讀侍講司業科

道郎中升任遇有缺出吏部將應升人員各按憲綱俸次通行帶領引 見惟郎中一項理藩院准保二員其餘各部每部額設一缺如有才堪勝任者亦准出具切實考語保送與各項應升人員一併帶領引 見恭候 簡用此內閣滿漢蒙古侍讀學士開列定例也今據內閣奏稱侍讀等官差使極勞升途極隘自三庫裁併後更異常壅滯擬請實任侍讀仍照舊案遇有本衙門侍讀學士缺出一次由吏部照章辦理一次由侍讀擬定正陪引 見恭候 簡用至蒙古漢軍侍讀各有額缺均著仿照滿洲侍讀升階一律辦理等因臣等查現行則例係於乾隆五十九年後節次刪定內閣侍讀不在應升侍讀學士之列現據內閣奏稱侍讀升階太隘擬請與應升各官分班輪用自係爲疏通侍讀起見但准此辦理則原有應升各官驟失一半之缺自屬窒礙難行若仍照舊章概行議駁則侍讀當差勤苦數十年而本衙門返轉之階似亦稍失平允臣等再四籌商擬請滿漢侍讀學士缺於卿員科道郎中三班以外增入侍讀一班由內閣保送二員擬定正陪仍由臣部帶領引 見恭候 簡用如有各項應補及 特旨升用人員仍查照定例辦理至蒙古侍讀學士向由應升各員統行帶領引 見並不分班擬請此後遇有缺出由內閣保送蒙古侍讀二員列於各部蒙古郎中之次統行引 見請 旨補授原奏又稱侍讀典籍滿蒙中書如保有候補候選道同通等官者請照員外郎主事等章程准其呈請分省補用各節查滿蒙郎中員外郎漢員外郎節

經臣部奏請准以知府保送分省補用漢中書及漢軍中書定例原准以同知保送分省補用擬請嗣後滿漢蒙古侍讀三年俸滿准其比照員外郎保送知府滿蒙中書三年俸滿准其保送同知分省歸候補班補用至漢軍侍讀向係歸併漢缺自應仍舊其各員內有願捐免俸次者擬查照戶部會同臣部奏定新章准其捐免此內如有先經得有保送保舉各項升階之官應詳加分晰其保有候選各官者准其捐足三班加捐分發補用其保有選缺後補缺後各官者准其自捐過班加捐分發補用該員等出路既可疏通於現行捐章亦相符合謹奏光緒三十一年九月初八日奉 旨依議欽此

會議政務處議覆御史趙炳麟奏司法人員官階終身按次升轉摺

本年十月初三日准軍機處鈔交御史趙炳麟奏司法人員官階終身按次升轉一片奉 旨會議政務處議奏欽此查原片內稱司法人員皆定爲終身官令其久於職掌事無顧慮偏袒之弊以冀伸公理而雪民怨等語意在收司法獨立之效兼以杜夤緣捷徑之門用意至爲深遠且於東西各國通例亦甚相符惟是各國任官無論下級高等皆由學堂畢業出身而又加之以實驗但使人稱其職終身於此遞遷祿糈必從優厚甚至去官之後仍予俸金後嗣子孫尙勞補助固不獨司法一部爲然而於法官實爲優待蓋欲使其專心審判絕無他顧之憂法至美意至善也中國既言立憲則將來各署堂司自應統由各該衙門按級升轉以資熟手第法部現在雖於京師奏設高等

地方各級審判廳區以冀逐漸推廣而法學人員多未卒業後來新進又苦於地方風俗未能全行了然勢不能不兼用昔日資深諳練之人以維持於其際是出身本來各異則出路自難強同況各署俸薪未能一律若使概從優厚則庫帑有所不支倘竟斬其調遷則來者又將觀望恐欲重法律專門之學而轉致英才裹足之憂是以臣等公同商酌該御史所稱司法人員定爲終身官階一節一時尙難辦到應俟將來分科學堂畢業各項專門學生較多再行照此任用至所謂各司員希冀多設額缺以爲京察截取外轉道府地步等情查現在各署新設之缺過多往往以雙月候選人員率請補授要缺一經捐俸卽予以道府之階於鼓勵則有餘於歷練則不足不特外省員缺只有此數紛紛改外斷難容納且恐各司員補缺之後卽視此官以爲借徑一切民事刑事概不留心似不可不預防其後擬請飭下法部大理院堂官將現在該衙門額設員缺若干將來如何升轉詳細開單咨由吏部會同臣等覆覈參酌本年九月吏部奏定限制警官保送章程劃開內升外轉之途使與各署司員無所偏倚庶足以昭公允而資鼓勵謹奏光緒三十三年十一月十一日奉 旨依議欽此

外務部奏變通本部司員外用章程摺

竊維臣部爲外交總匯特設專官各司員襄辦交涉與各省洋務及海關一切事宜內外相爲維繫查前總理衙門保獎成案凡資深得力之員皆以關道記名請 簡自改

章之後酌設額缺獎案遂亦停止近來交涉事務較前尤繁各司員職守既專閱歷已久其當差得力資勞較深之員應予以內外遷轉之途俾可收表裏相資之益查上年軍機處奏定變通章程內開幫領班章京自到差補額之日起八年期滿遇有鹽糧關道缺出開列進單等語臣部事關重要各該員昕夕從公與軍機處章京勞動相等將來升轉之階亦必期職任相宜藉可覘其績效臣等參考總理衙門成案比照軍機處新章公同酌擬除京察截取保送仍照向章辦理外嗣後實缺郎中員外郎之掌印主稿各員在部當差已滿八年者如能得力請以海關道開列進單期於鼓勵之中仍寓限制之意如蒙 俞允再由臣等詳加考覈隨時將合格人員奏請 交軍機處記名遇有海關道缺出一體開單請 旨簡放謹奏光緒三十四年三月初一日奉 旨依議欽此

吏部奏酌定本部漢軍堂主事升途摺

竊查漢軍人員堂主事以下例有專缺員外郎以上歸於漢缺升選遇有各部漢員外郎缺出例應俟各部主事升用六缺之後將各部漢軍堂主事升選一人本衙門並無題升班次今各部司員一律改爲題缺此項人員並無內升之途若不量爲變通殊不足以昭平允除度支部陸軍部法部堂主事額缺均已裁撤無庸辦理外擬請將吏禮二部漢軍堂主事歸於漢主事班內遇有漢員外郎序補缺出以漢軍堂主事補缺之

日與漢主事奏留之日較資補用理藩部向無漢缺應歸於滿洲實缺主事班內遇有滿員外郎序補缺出與滿實缺主事同較補缺先後補用遇酌題之缺均准其酌量題補至吏禮二部例皆專用正途出身人員此項人員既准其在木衙門升補應請無庸再扣出身他項不得援以爲例其漢軍專缺人員遇有丁憂事故無庸開缺擬請仍如舊例惟與漢員同較資俸時如任內有丁憂事故應行扣除核算至漢軍堂主事缺酌題序補班次即按照滿主事章程辦理以免紛歧謹奏光緒三十四年四月十三日奉旨依議欽此

吏部奏請

旨簡員補授內閣學士缺並聲明現定辦法摺併缺目單

查定例京堂缺出均照品級考所載開列題請 簡用又滿員品級考內開內閣學士兼禮部侍郎銜由詹事府詹事太常寺卿奉天府尹光祿寺卿太僕寺卿通政使司副使大理寺少卿詹事府少詹事太常寺少卿鴻臚寺卿太僕寺少卿升任以上各衙門無人方以內閣滿洲蒙古侍讀學士翰林院侍讀學士侍講學士國子監祭酒左右春坊庶子通政使司參議光祿寺少卿鴻臚寺少卿六科掌印給事中給事中各道監察御史升任各等語今查品級考所載應行開列內閣學士之三四五品各官除內閣滿蒙侍讀學士翰林院侍講學士給事中各道監察御史尙仍舊制外其餘均經逐漸裁撤或改升品秩而新設之各部丞參及學部大學堂總監督國子丞並度支部銀行

幣廠等處正副監督民政部法部大理院各廳廳丞廳長推承等官品級雖與京堂相同惟原定升轉章程或在部遞升或請簡外任至內閣學士缺出應如何開列請

簡之處原奏均未議及其改設及升品各官內僅翰林院學士侍讀係比照詹事庶子辦理此外翰林院侍讀學士都察院掌印給事中兩項卽無可比照現查各部丞參及各衙門三四品各官業經陸續簡放有人若不從新釐定殊不足以重班聯而崇體

制臣等謹就現在官制參酌定例應請將三品不分正從定爲應升人員四五品不分正從定爲其次應升人員其辦理銀行造幣巡警審判檢察之三四品各官職守稍殊定爲另單開列人員繕具缺目恭呈御覽並移咨軍機處存案如嗣後各部院再有

增設及更定京堂員缺之處容臣部隨時奏明分別辦理今內閣學士寶熙升任學部侍郎所遺一缺除應開各官並非滿員者均毋庸開列外謹按照現定應升其次應升及另單開列三項人員將翰林院學士統隆等六十二員分繕清單恭請簡用一員

補授內閣學士兼禮部侍郎銜缺再裁缺舊例應升其次應升人員照章一體開列請簡惟新舊官制品級不同是以亦另列一單合併聲明謹奏光緒三十四年五月十三日奉旨統隆著補授內閣學士兼禮部侍郎銜欽此

謹將內閣學士現定分別開列各官繕具缺目恭呈御覽

擬請定爲應升人員

正三品翰林院學士 大理院少卿 外務部左丞 吏部左丞 民政部左丞 度支部左丞 禮部左丞 學部左丞 陸軍部左丞 法部左丞 農工商部左丞 郵傳部左丞 外務部右丞 吏部右丞 民政部右丞 度支部右丞 禮部右丞 學部右丞 陸軍部右丞 法部右丞 農工商部右丞 郵傳部右丞 大學堂總監督

擬請定爲其次應升人員

正四品翰林院侍讀學士 外務部左參議 吏部左參議 民政部左參議 度支部左參議 禮部左參議 學部左參議 陸軍部左參議 法部左參議 農工商部左參議 郵傳部左參議 外務部右參議 吏部右參議 民政部右參議 度支部右參議 禮部右參議 學部右參議 陸軍部右參議 法部右參議 農工商部右參議 郵傳部右參議 掌印給事中 學部國子丞 從四品內閣侍讀學士 翰林院侍講學士 正五品翰林院侍讀 給事中 從五品各道監察御史

擬請定爲另單開列人員

正三品度支部總銀行正監督 造幣總廠正監督

從三品民政部內城巡警總廳廳丞 外城巡警總廳廳丞 大理院總檢察廳廳丞
正四品大理院推丞 度支部總銀行副監督 造幣總廠副監督 法部京師高等
審判廳廳丞 檢察廳檢察長

從四品 內城地方審判廳廳丞 外城地方審判廳廳丞

吏部議覆御史俾壽奏滿漢給事中御史升階一律安定章程摺

光緒三十四年四月初一日准軍機處片交本日御史俾壽奏滿漢給事中御史升階
似應一律請 飭安定章程一片奉 旨吏部議奏欽此欽遵抄錄原奏交出到部原
奏內稱漢給事中御史准其截取道府選班亦優滿員雖新章可以保送祇可分省候
補現值融化滿漢之際升階似應一律通行以爲實行融化之計等語查品級考滿給
事中御史遇有閣學翰詹及四五品京堂缺出皆得開列內升之途較寬漢員則僅得
開列從四品以下京堂故外用班次稍爲加優現在京堂各缺迭經裁併滿科道升階
較之漢員轉不免有名無實該御史請滿漢通行截取於臺省體制自較畫一惟辦法
向有不容不分者一則俸次不同向來各項截取年限捐納與正途有別至科道多由
實缺人員轉補且新章滿漢一體考試是出身已可不論然使與漢員統較俸次則滿
員丁憂事故例不停俸於融化滿漢之說仍難悉合此窒礙一也一則班次已滯自翰
林奏准截取道員需六缺而得一知府需九缺而得一故上年宗人府援例陳請已不

能不分別辦理今無論於翰林後另立一班或於宗室外另議揀選徒使舊截取與各項輪用班次愈降而愈絀而滿科道得之亦不過如開列之徒有虛名此窒礙二也雖然猶僅就都察院衙門言也夫同一滿員科道既概准截取則各部郎中勢且不得而獨異雖道員非郎中應升而逆計將來卽知府一項其員數又當數倍於今日將到班因之愈難此尤窒礙之大者臣等公同商酌漢員正途截取係扣歷俸二年此外一切保送外用均須曾經京察一二等人員案查光緒三十二年都察院奏定新章本有三年俸滿准其保送道府之條並稱俸滿各員仍俟察其才品是否堪勝再行加考送部引見等語其應否專俟京察後方准保送並無明文惟考核之權仍由堂官則於事亦有限制既據該御史以滿員祇有分發別無選班爲言自應仍就保送酌加變通以期滿漢不致偏重擬請除掌印給事中已升四品及宗室科道甫定專章均毋庸議外所有嗣後滿蒙給事中御史應仍俟歷俸三年後由該堂官察看該員是否堪勝煩缺抑僅堪簡缺出具切實考語咨送臣部帶領引見比照截取例分別擬旨聽候錄用俟奉旨記名後卽歸入漢科道班內統較記名日期先後一體選用其以煩缺記名者並知照軍機處遇有請旨缺出一體開單請簡分發者亦改照截取人員辦理至此項俸次應不准其捐免亦不得將計俸合例人員統行保送以昭核實而免壅滯再者該御史所請雖祇科道而臣部有綜核各官之責未便顧此遺彼

其滿蒙郎中保送知府亦應一併請 旨准其改照現定辦法歸併漢郎中截取班內分別辦理捐納郎中並令扣試俸三年此外應統俟憲政規制大定後再將滿漢內外升階應否更訂之處隨時酌核具奏如蒙 俞允 臣部即通飭各衙門一體遵照謹奏
光緒三十四年八月十七日奉 旨依議欽此

翰林院奏官階升轉宜定限制摺

本月初十日學士許澤新等三十六員以本署升轉事開具說帖前來據稱署中階級升轉向係在京供職人員按資遞補除試差學差外從無在外升轉之例自光緒三十二年編修王同愈充江蘇學務公所議長經江蘇巡撫奏請免扣資俸復經學部奏請不停升轉查學部原奏內稱嗣後各省學務公所議長均咨由 臣部奏派無論京外候補實缺人員並請一律不扣資俸不停升轉銓選以專責成而示鼓勵等語原以議長責任較重不能不從優辦理乃此後各省紛紛奏請有以學堂監督學務議紳奏請者且有以學堂庶務長及襄辦新政等差奏請者現在本署此項人員已有七人似此漫無限制將來者且不知凡幾吏部以係奉 旨允行不得不一律開單請 簡夫在外各員業升京秩仍得供差外省殊不足以重職守應請嗣後各省充當議長之員責任較重准其不停升轉其辦理各學堂及襄辦新政並學務公所議紳各差應祇准不扣資俸不得一律不停升轉即已經奉 旨允准者於升轉後應照向例兩月後來京供

職則京秩不至虛懸逾期不到應請開缺另簡以符定章現查本署在京供職編檢約一百五十餘員使在外供差與在京供職人員略無軒輊誠恐回籍謀差者日多於本署職守大有關係似宜明定限制以昭核實等語臣等查臣院官階向係按資升轉其已升轉者出京開缺回京收補除試差學差外實無在外升轉者誠以職守不可久曠故例限不能從寬議長由學部奏派統籌全省學務特加優異以示鼓勵自非他項外差可比若一律照請恐出外者愈開奔競之風在京者不免向隅之憾據該說帖所稱按之向章尙爲符合揆之情事亦屬持平似應俯如所請嗣後除學務議長一員准其不停升轉餘概不得援照其業經奉旨允准者升轉後應仍按照限期來京供職以符定章如蒙俞允卽由臣衙門咨行吏部並通行各直省將軍督撫遵照辦理謹奏光緒三十四年九月十七日奉旨著照所請該衙門知道欽此

截取分發

吏部遵旨議奏內閣實缺典籍中書俸滿截取內用請作候補主事摺

本年五月初八日准軍機處片交本日御史趙炳麟片奏內閣實缺典籍中書俸滿截取內用請作候補主事等語奉旨吏部議奏欽此欽遵抄交到部原奏內稱內閣典籍中書人員向例俸滿截取內用者以主事註冊外用者以同知註冊俱歸雙單月升用現在各部主事選缺悉停升途愈益滯塞雖經吏部奏請變通援各項小京官俸

滿截取之例准其捐足三班分部以主事候補惟各項小京官多係雜流內閣典籍中書多係正途且向例升選實缺主事今俸滿截取以實缺人員改候補主事尚須捐足三班似未平允況奏定新章凡光祿寺候補署正係正途出身者皆改爲學習主事內閣典籍中書俸滿截取似可仿照此例擬請 旨飭交吏部凡內閣典籍中書俸滿截取係正途出身者內用作爲候補主事分部學習免捐三班等語查內閣典籍中書截取內用例應在任候升主事並無分發嗣因主事停選經臣部奏請援小京官定例准其捐足三班分部扣滿半年以主事題補等因奉 旨允准在案今該御史以實缺人員改候補主事尚須捐足三班未爲平允不知實缺典籍中書雖有應升主事之階非積資至十餘年鮮克到班故俸滿時大率多請外用現在各部留補班次視從前升選較易若復准其徑行分發則此後人人爭趨實屬漫無限制原奏援候補光祿寺署正改用主事章程請令正途出身者分部學習免捐三班等因竊維署正與主事既係對品此次改用主事又因員缺已裁故不得不分別出身稍寬其格至於典籍中書升階分發將來沿爲常例臣部前次奏定章程雖令捐足三班而到部半年以主事題補未嘗不與署正各有優異之處惟原奏之意既專在體恤正途而不在計較年限臣等公同商酌擬如該御史所請嗣後典籍中書俸滿截取奉 旨內用查係考取到閣者准其照署正例以主事分部俟學習三年期滿再行奏留補用其原係捐納到閣者仍令

捐足三班始准分發照臣部原奏辦理以上無論考班捐班仍請 飭下該衙門於俸滿時嚴行甄別不得一律保送內用以杜倖進如到部後行走平常亦應由該部堂官隨時咨回原衙門以免濫竽如此量爲變通庶流品既有區別而班次亦尙不至紛更謹奏光緒三十三年七月初七日奉 旨依議欽此

吏部奏請各項分部人員仍照向章分發學習摺

竊維現在釐定官制添改各部以專責成各部辦事必須預儲人才練習講求若專恃各衙門訪查調用恐不得如許人才以供任使況向來應行分部人員有 特旨分部廕生 錄用分部 兩陵調京分部及近日盛京裁缺及各衙門新裁應行改掣人員爲數已屬不少其勞績保舉及捐納未經分部者人數尤多若不設法疏通殊非 皇太后 皇上體恤庶僚不使失所之至意伏思才能以練習而出此項部員其中亦不乏可造之才臣等再四籌商酌擬辦法查民政部設有警務學堂度支部設有計學館陸軍部設有兵學館法部設有法律學堂商部設有實業學堂工部亦設有藝學館今歸併農工商部自應仍舊設立以上各部擬請一律掣簽分發各該員到部後由各該堂官令其先入各館各學堂肄業專門之學仍按學習期滿年限其學能及格者由該堂官奏留補用其不及格者或再分別學習酌量奏留或經咨回臣部照例辦理如學部則設政法政學堂凡各該部裁撤及新分司員筆帖式並請准其咨送學部各按所

分之部分門學習俟畢業後由該部考試分別等第酌量辦理庶所學各適所用似於整頓部務培植人才兩有裨益此外理藩部仍應照舊簽分吏禮二部滿員向不論出身一律簽分漢員向例惟進士出身之部屬及拔貢小京官方准簽分現科舉已停既無進士出身者分部擬請由舉人五貢廩生出身者酌配簽支統行分發如此變通辦理吏禮二部辦事人員庶無缺乏之虞謹奏光緒三十二年 月 日奉 旨依議 欽此

兵部奏酌擬分發裁缺人員摺

竊近年各省改練常備續備各軍有裁撤數營派充統帶管帶者有全省裁改員缺而各省并無差委者此項人員既無標營可歸間有給咨赴選而臣部大選久停無憑核辦查臣部奏定章程保舉提督總兵副將參將赴部時由臣部帶領引 見開具題缺省分清單請 旨發往一省補用又游都以下并未奏留他省者應歸本省候補又定例營用武進士掣發鄰省投標候補各等語現在裁缺各員既無標營可歸擬援照以上例章凡實任副將參將兩項人員無論由提督總兵借補及本班請補如遇員缺裁汰各督撫未經奏留即給咨該員應由臣部帶領引 見開單請 旨發往一省歸裁缺即用班插補不入輪缺計算至實任游擊都司守備員缺裁汰如員缺係該員原籍省分即比照武進士掣發鄰省之例發往即補若員缺并非該員原籍省分應給與驗

票令回原籍省分投標歸裁缺卽用班插補均不入輪缺計算此項人員到部時應由
臣部帶領引見或應掣發鄰省或應改歸本省請旨發往俟補缺時無庸再行送
部以示體恤而重員缺謹奏光緒三十一年二月初五日奉旨依議欽此

兵部奏南北洋畢業漢侍衛分發章程摺

光緒二十八年領侍衛內大臣核議御史徐德沅奏漢侍衛各員請定功課一摺於九
月十一日具奏奉 上諭據奏請將漢侍衛派出各學堂學習務須認真教練隨時考
校以備折衝之選餘著照所議辦理該部知道等因欽此欽遵到部當經臣部鈔錄原
奏行文南北洋大臣並將侍衛處咨送各侍衛陸續給照分往南北洋學堂肄業各在
案查原奏內稱該侍衛等在京當差者共一百七十餘員分作三班每班以三年爲期
發往南北洋學堂學習槍礮測量講求韜畧俟有成效分發各省軍營量才委用並歸
標儘先拔補學習期內仍由兵部按班銓選如有不堪造就者卽徑行咨回原籍以免
濫竽等語查漢侍衛分往南北洋學堂肄業者不下七十餘員現已陸續畢業自應遵
照原奏將各侍衛分發各省以便量才委用惟此項侍衛從前原係在京當差分隸宿
衛期滿後由侍衛處出具考語咨送臣部帶領引見請旨錄用仍由臣部照例銓
選歷經辦理在案此次由學堂學習期滿之員亦應由南北洋大臣按照所習功課分
門考試分別等第出具切實考語咨送臣部考驗合格後帶領引見卽比照武進士

擊發鄰省之例請 旨分發以昭慎重除從前期滿各侍衛應用官階業經 欽定應俟分發後按照侍衛處原奏歸入該省儘先班內序補外其未經期滿之員既由南洋學堂畢業應請作為期滿由臣部帶領引 見奉 硃筆圈出後與曾經期滿各員一律辦理如同日奉 旨應先儘資俸名次在前之員請補此項人員各督撫請補時不得聲敘人地不宜以示優異其不願分發仍回侍衛處當差者亦聽其便惟仍由臣部各按資俸擬選與在京各侍衛一律辦理如蒙 俞允由臣部通行各省督撫遵照辦理謹奏光緒三十三年十月二十五日奉 旨依議欽此

吏部奏酌擬降革人員開復後分發歸班片

再查定例私罪降革後經開復捐復如本係補用委用試用人員准其分發省分仍歸各原班補用本係實缺人員俱令赴部候選其有報捐分發者始准分發以上無論簽分捐分均不准仍回原省暨銓選原省之缺公罪開復捐復雖原省不在限制之列惟實缺銓選分發之例亦同現在選班壅滯開復班到班極難而官員墮誤離任後又多無力報捐分發轉不如先未得缺人員雖係私罪一經還職便可赴省自効揆之情法未免牴牾擬請嗣後實缺捐復暨另案開復人員照補用委用試用人員例准其一體分發俱歸入候補班內由該督撫酌量補用仍先查明公私罪分別配簽願歸部選者聽係公罪願捐指原省者亦聽其本案開復人員並准徑發原省照錢糧開復之例辦

理如蒙 俞允嗣後此項引 見驗放人員臣部卽照此分別擬 旨謹奏光緒三十四年二月十一日奉 旨依議欽此

吏部奏酌議變通分發章程併案覆奏摺

光緒三十四年五月十五日內閣抄出河南巡撫林紹年奏整頓吏治請同通以下各官概免迴避原籍一摺奉 硃批吏部議奏欽此正在核議間復於是月三十日准軍機處抄交御史吳緯炳奏請准佐貳服官本省并變通道府同通州縣掣簽章程一摺奉 旨吏部議奏欽此先後欽遵到部臣等詳閱該巡撫該御史所奏大致不外體恤人情及熟習風土二義顧一則有同通州縣以下各官此後不必再指他省卽徑發原籍補用卽或過慮亦可除正印外先行概免迴避一則有道府同通州縣等官責任較重雖未能與佐貳一律亦應比照告近之例概准其簽掣近省各等語是服官本省一層其不必遽行不便概行之正印等官原奏已自言之母庸臣等贅說矣惟直省官制正印少而佐貳多概言之雖同通亦佐貳也析言之則上自布按衙門首領下至地方河工鹽務各雜職名目既不可勝計缺分亦多寡不同不獨周漢土人之制施之目前尙多窒礙卽林紹年所稱祇令迴避本府而此府所有之缺或爲他府所無并彼省所設之缺亦或爲此省所不設是近省且有不可盡拘者臣等統籌熟計既舊時掣簽章程已多不便亦不可不量予變通擬請兼採兩奏之說而酌分三類一佐貳中缺分之

較多者如府經歷縣丞州吏目縣主簿巡檢典史六項應請嗣後准其添配本省之簽與近省各簽統掣如掣得本省仍不得在本府本州當差及補署距本籍三百里以內之缺或該員呈明情願迴避本省卽專以近省掣分一佐貳中缺分之較少者如直州同直州判以下迄於各項從九品未入流應請嗣後准其專掣近省之簽如近省中無該員同項相當之缺再以遠省配掣一佐貳中體制之稍殊者如同通首領等官應請嗣後准其無論有無老親但聲明願歸近省者卽專配近省之掣未經聲明卽仍以遠近省統掣以上凡應行分別掣簽之人俱不得於掣定後復又呈請改掣以杜規避如自願捐指一省並捐離改指他省者無論遠近省均聽其便所有近省中距本籍三百里以內之缺亦不得輒請補署有應行迴避之人仍令迴避其祖籍商籍及遊幕經商省分概請勿論如有不甚相宜之處卽由該督撫隨時酌辦至州縣兩項雖係正印惟寒畯居多且近年報最之法已異於前使人地過於生疏不無扞格亦應如吳緯炳所議准照現定同通等官辦法辦理此外道府係方面之員所轄較廣以及河工鹽務各官省分本有限制均應仍照舊章暫從緩議又銓選與分發情形稍有不同所有候選之同通州縣以下各官按照上開籤分之法如預行聲明願選近省本省之缺者自應一體照准未經聲明亦仍按遠近省統選以免壅滯再此項章程如蒙 俞允所有本月驗看人員應卽照此配籤其從前業經分發他省之員林紹年並請准其給咨回籍

候補之處事近紛擾應毋庸議合併聲明謹奏光緒三十四年六月三十日奉 旨依議欽此

吏部奏變通滿蒙漢軍京外分發片

再滿洲蒙古及漢軍專缺京員如有老親停其升選保送外缺外官自藩臬以至州縣如有老親准其呈明改補京職並無告近之例查臣部奏定變通各官免迴避本籍章程內開同通以下無論有無老親准其呈明告近等因光緒三十四年六月二十三日奉 旨允准在案現值化除滿漢之際若滿員仍照舊例辦理殊不足以示公允而昭畫一擬請嗣後滿蒙漢軍升選保送外任人員同通以下如有願歸近省者無論有無老親准其具呈聲明與漢員一律辦理所有京旗人員應以直隸及界連之山東山西河南掣分各省駐防人員應以駐防省分及界連各省掣分至漢軍人員向例京官迴避順天直隸及北河員缺擬請併爲變通均准一律掣分以免紛歧謹奏光緒三十四年九月二十八日奉 旨依議欽此

選補

兵部奏釐定水陸題推各缺輪補班次章程摺并章程

竊查臣部武職水陸題推各缺輪補班次有亟宜改定者如各項卓異人員非勞重資深夙能整頓戎政者不能膺此保薦乃不得入題缺且無專用之班一等參將亦無升

班武進士營用守備到標後扣滿五年方准敘補亦不得入題缺至各項世職引見錄用人員皆忠盡之裔理宜優異以勵勤事之臣而有預保省分二十缺始輪補一人俸深應陞之員亦二十缺始輪補一人無預保省分皆十四缺輪補一人推求其故皆由於各省儘先人員佔缺太多以致各項壅滯伏思各班內皆有傑出之才惟限於輪缺班次竟有三十餘年不得補實官者壯年入伍至暮歲始得到班精力已衰雖奮勉圖功亦收效無幾似非朝廷獎功儲才之本意臣等公同商酌謹將輪補班次重加釐定使各項人員皆有補官之望以遂其報効之忱陝甘二省四川松潘一鎮直隸山西沿邊輪用旗員及應歸揀補旗員月缺銓選漢侍衛月缺尙無偏枯之處無庸更定外謹將釐定水陸題推各缺輪補班次繕具清單恭候 欽定謹奏請 旨光緒二十八年四月十六日具奏奉 旨依議欽此

謹將釐定武職水陸題推各缺輪補班次繕具清單恭呈 御覽
水師陸路題補推補副將參將遊擊都司輪補班次

一缺儘先 提督總兵借補用俱在儘先班內

二缺預保 無預保書分二缺專員

卓異 有預保書分一預保無人員抵補

三缺儘先

四缺揀發

保舉補用分升用及開缺以升班用無儘先字樣揀納分發人員

五缺儘先

六缺應補

世職引人員

七缺儘先

八缺捐輸

捐輸人員遇班用儘先

九缺儘先

十缺應升

有預保會分卓異與邊僻常舉俸滿人員准該督撫酌量請升以期人地相宜

以上輪補班次除新疆一省不計輪缺班次外其餘各省遇輪用儘先班次凡奉

旨發省之提督總兵及各省奏調奏留之提督總兵俱准借補副將參將自副將以

下准借一級補用至本班人員請補如人地不宜仍於二十名內揀選按名聲敘何

項不宜不得逾二十名之數若所請之員在二十名以外即照章議駁借補者即在

儘先班內不得兼補各班之缺至二缺有預保省分專用預保人員此項無人以卓

異人員及保列一等人員抵補此項亦無人過班用揀發人員不得連用儘先無預

保省分專用卓異及一等人員不得參用他項以防淆混各省各計各缺定爲十缺

一輪周而復始一班無一人一班抵補各班皆不得連用二人

水師陸路守備題推各缺輪補班次

一缺儘先

補保舉部司有儘先字樣者二十日及本班人員請
補准要敘人地不宜保此項無人遇用揀人員補

二缺

補預保分專卓異此項無人遇用揀人員補

三缺儘先

補保舉部司有儘先字樣者二十日及本班人員請
補准要敘人地不宜保此項無人遇用揀人員補

四缺揀發

補保舉部司有儘先字樣者二十日及本班人員請
補准要敘人地不宜保此項無人遇用揀人員補

五缺儘先

補保舉部司有儘先字樣者二十日及本班人員請
補准要敘人地不宜保此項無人遇用揀人員補

六缺應補

補保舉部司有儘先字樣者二十日及本班人員請
補准要敘人地不宜保此項無人遇用揀人員補

七缺儘先

補保舉部司有儘先字樣者二十日及本班人員請
補准要敘人地不宜保此項無人遇用揀人員補

八缺武進士

補保舉部司有儘先字樣者二十日及本班人員請
補准要敘人地不宜保此項無人遇用揀人員補

九缺儘先

補保舉部司有儘先字樣者二十日及本班人員請
補准要敘人地不宜保此項無人遇用揀人員補

十缺捐輸

補保舉部司有儘先字樣者二十日及本班人員請
補准要敘人地不宜保此項無人遇用揀人員補

十一缺儘先

補保舉部司有儘先字樣者二十日及本班人員請
補准要敘人地不宜保此項無人遇用揀人員補

十二缺應升

補保舉部司有儘先字樣者二十日及本班人員請
補准要敘人地不宜保此項無人遇用揀人員補

以上各項班次以十二缺為一輪周而復始一項無人即以次抵補每班均不得連用二人至裁缺人員除臺灣內渡人員另有插補班次外餘皆行令各省督撫酌量儘先補用不入輪缺計算

儘先補用不入輪缺計算

兵部奏提督等官借補展限章程片

再查各省奏請大銜借補小缺限期皆將屆滿本應奏請依限停止俾各項人員皆得補本班之缺以免偏枯惟查奉 旨發往各省補用及奏調奏留之提督總兵人數衆多核其履歷皆係屢立戰功骨膺保獎始得此職而各省額缺有限皆由 欽簡補授計百餘員中僅得一二若不准各省變通借補則功績愈高愈不得補實官以展其才力與 國家拔擢將材儲蓄待用之意似不符合擬請將借補限期一律展限十年除新疆一省仍准借至三級外其餘各省仍准提督總兵借至副將參將自副將以下皆准其借一級補用俟十年屆滿察度情形再行奏明辦理庶使勤勞夙著之員不致有置散投閒之憾則感激圖功於營務必有裨益是否有當請 旨遵行謹奏光緒二十八年四月十六日奉 旨依議欽此

吏部奏酌改六部滿蒙司員等選缺輪次摺并片

查定例六部滿洲選缺郎中員外郎均以六缺爲一週第一缺留補第二缺咨選第三缺留補第四缺咨選第五缺留題第六缺咨選滿洲選缺主事則以五缺爲一輪自第一缺至第四缺留補第五缺咨選查額設題缺與選缺中留題之缺均歸酌補選缺中留補之缺則勞績資深人員分班輪用惟咨選之缺仍專用各項候銓之人此內惟題缺量材任用最爲得人留補之缺按資序補已稍遜於題補尙均係本衙門當差之人

獨咨選之缺按輪銓選本部長官既無從選擇而各項候選人員於本署例案本非所習一經得缺責以辦事雖有過人之才亦不能遽收駕輕就熟之效中材以下更難問矣夫整頓部務以造就人才爲要義而造就人才必用本署稔習之人事半自可功倍查漢缺郎中員外郎主事三項選缺均以五缺爲一週第一缺留補第二缺留題第三缺留補第四缺留題第五缺咨選綜計本衙門人員可得五分之四尙無畸重之弊乃滿洲選缺幾及三分之一以致多年行走之員轉沈淪於候補而各項候銓之人不勞而得實缺實難收臂指之效擬請嗣後除宗室蒙古漢軍滿洲科甲漢軍堂主事均係專缺照舊辦理外其餘所有滿洲各缺一律比照漢缺改爲五缺一輪第一缺留補第二缺留題第三缺留補第四缺留題至第五缺照例銓選如此略爲變通庶實缺中多由本衙門揀選考察既易人材自得矣如蒙 兪允擬請自奉 旨後各衙門遇有郎中員外郎主事缺出分別咨缺留缺其頂補項選人員仍照例各准其銓補一次卽積各項班次之缺嗣後再遇缺出按照新章作爲第一留補之缺卽以五缺爲一週其留補之缺仍以勞績資深兩班跟接輪用以歸畫一而昭平允謹奏光緒三十年 月

日奉 旨依議欽此

再查臣部銓選滿洲官員例載太僕寺蒙古選缺員外郎二缺蒙古選缺主事二缺員外郎皆係咨選之缺並無咨留之分本衙門如有候補人員准其儘數留補主事定以

留補二次後至第三缺歸部銓選遇留補之缺候補無人咨部銓選不積留咨之缺又六部現任蒙古司員有曾經保列 京察准作一等者遇蒙古應升缺出准其酌量升補如遇滿洲應題及應行留題之缺准其與滿洲一等人員一體酌量揀選蒙古現任筆帖式有 京察保列一等者准該堂官奏留遇有滿洲應留選主事缺出與滿洲候補人員比較奏留日期先後借補又由京補放八旗游牧員外郎五年期滿該總管出具考語咨部註冊後遇有理藩院太僕寺缺出不論雙單月無論保題升選一併計算二缺之後輪俸調補各等語查太僕寺額設蒙古員外郎主事各二缺蒙古筆帖式八缺升途本隘得人尤難且本衙門向無題升之階與各部院蒙古一等人員升轉未能一律相應酌予變通以勵人才臣等公同商酌擬請將太僕寺原設蒙古主事二缺內以一缺改爲永遠額題之缺專用本衙門筆帖式題升以一缺咨送吏部銓選嗣後遇有蒙古主事缺出第一缺卽作爲額設題缺先儘 京察一等筆帖式揀選二員擬定正陪題升如一等無人或一等人員有不合例事故准其於二等人員內酌量揀選其餘一缺卽作爲咨選之缺見缺時仍照舊例辦理至筆帖式等項人員升補主事後若照舊章自應專以六部員外郎升用查六部蒙古員外郎共計八缺如候補有人准其儘數留補是以應升應選人員有名無實久形壅滯亦應酌改以資遷轉應請將太僕寺蒙古主事准其一體升用本衙門蒙古員外郎其員外郎二缺亦以此後所出之第

一缺作爲額設題缺其餘一缺咨選吏部銓選嗣後遇有蒙古員外郎題缺先儘京察一等之主事題升如一等無人再於二等主事內揀選由該堂官擬定正陪升用其選缺出時仍照舊例辦理至年滿察哈爾游牧司員有人無論額題及咨選缺分准其先行截補不積題升留補班次之缺似此酌量變通自可得人而理於牧務亦不無裨益又查六部蒙古筆帖式如遇京察保列一等者例章准其借補滿洲留補選缺主事而滿洲題缺主事此項人員未能借補核與蒙古司員得邀京察一等升用稍有區別亦應一併改歸畫一擬請嗣後六部蒙古現任筆帖式京察保列一等者仿照員外郎主事借題之例遇有滿洲應題主事缺出准其與滿洲一等人員一體酌量揀選題升如揀選得蒙古一等筆帖式題補亦由該堂官奏明指明借題無庸擬定正陪滿洲一等無人即專以蒙古一等人員先儘借題不得將滿洲二等人員題升遇有蒙古主事本缺卽行調還以示限制如蒙俞允俟命下之日臣部遵奉施行謹奏光緒三十年月日奉旨依議欽此

吏部遵議知縣參革遺缺變通敘補摺

內閣抄出調署江蘇巡撫端方等奏稱知縣參革一項定例專用軍功候補人員歷經循照辦理迄今軍營著有勞績人員現已無多近年到省者尤屬寥寥無幾蓋精明強幹之員大半敘補殆盡其未經補缺者或年力漸就衰頹或才具不甚開展若不設法

變通誠恐無裨治理嗣後遇有缺出先儘軍功勞績候補人員補用如其人地不宜卽於進士卽用進士截取舉人大挑三項人員酌量抵補似於例章無甚出入而人才藉以奮興等因光緒三十年九月二十日奉 硃批吏部議奏欽此欽遵抄出到部查定例各省知縣如遇參革遺缺係專用軍功候補人員應將軍功候補班人員與軍功候補報捐本班儘先及報捐本班儘先人員合爲一班由該督撫酌量請補今據該撫奏請設法變通係因爲地擇人起見自應准如所請嗣後該省遇有參革遺缺出時先儘軍功勞績候補人員補用如其人地實在不宜卽於進士卽用進士截取舉人大挑三項人員內酌量抵補到任後仍令該督撫隨時察看如不勝任再行撤回更補如此量爲變通與各項班次均無窒礙如蒙 兪允應由臣部通行各省以奉 旨後第五日行文按該各省照限減半計算以接到此次咨覆奏奉 旨後下月所出之缺卽照此次奏定章程辦理謹奏光緒三十一年 月 日奉 旨依議欽此

吏部奏請整頓新疆補缺章程摺

查新疆一省僻在西北漢回雜處同治年間始闢爲行省建設府廳州縣等官其時草昧初開軍務未定一切用人行政自不能不變通權宜勿拘成法以故補署各缺悉予通融俾資治理嗣經前新疆撫臣劉錦棠奏請將新疆補署各缺按照甘肅變通章程辦理無論正佐各官如遇要缺一併准其請補又各項員缺聲明候補及實缺人員調

赴新疆差遣分別請補請調其隨營之分省候選並他省候補各員准其留於新疆補用分別奏咨辦理又各員缺除南路由外揀補一次北路新設各缺亦應由外先行揀補一次北路舊有各缺一體辦理等因奉 旨允准相沿至今凡有缺出俱係查照變通章程核與章程符合卽行議准乃行之既久窒礙彌多查 臣部辦理補缺向憑官冊新疆官冊既不齊全往往有補缺到部冊內無名甚至以勞績人員而保案無稽以捐納人員而捐案莫考雖邊疆省分不能律以內地章程然長此遷就亦覺漫無限制伏思新疆各官分發指省人員甚爲寥寥勢難停止變通章程規復定例擬請 飭下新疆巡撫迅將該省現在候補人員自道府以至未入流無論正途勞績捐納逐一詳細造具履歷清冊咨部立案以後凡有到省人員仍照定例隨時咨報並按季造送各員有無事故詳細清冊以憑查考自此次冊報之後凡有請補各缺 臣部卽查照冊載人員核辦備冊內無名卽行駁令另行更補庶幾 臣部得所稽核既可免往返駁詰之繁該省補署各員仍可收因地擇人之效謹奏光緒三十一年七月二十八日奉 旨依議欽此

吏部奏道府等項選補缺分酌定畫一章程摺

光緒三十一年五月十六日准軍機處片交御史張學華片奏選班道府不問何處出缺定爲兩補一選是向來內選之缺反不得與外補一律名實既乖偏枯亦甚似應規

復舊制詳定選章以昭公道 飭下吏部查例核議施行等因奉 旨吏部知道欽此
伏查月選各缺前經奏定章程凡捐升保升兩項選缺道府州縣正印各官不准扣留
外補凡應一咨二留者無論曾否扣留統照留補二次咨選一次辦理奉 旨依議欽
此欽遵在案今據該御史片稱內選外補各缺不得一律請詳定選章以昭公道等語
臣等查道府等項選補舊章雖係一咨二留而在部所開及督撫漏未留補之缺統歸
內選藉以補選額之隘綜計每年內選外補數目大致亦不相懸隔惟每遇道府缺出
應留應咨往往內外駁查易致舛錯是以奏請統歸內選一次留補二次惟查道員爲
給事中升階知府爲御史郎中升階此兩項人員多係正途出身非當差數十年不能
截取候選部選道府似可略與疏通以示體恤擬請嗣後道府兩項部選之缺無論何
項出缺統歸內選一次由外省留補一次其同知直隸州知州通判知州四項仍按定
章辦理藉免畸輕畸重之弊如蒙 俞允即行知各省一體遵行謹奏光緒三十一年
八月初六日奉 旨依議欽此

練兵處奏定陸軍人員補官體制摘要章程

光緒三十一年
八月十八日

一新設陸軍三等實官必須由陸軍學堂出身暨曾帶新練隊伍資及三年諳習訓練
通解兵學人員方准補授

二現在陸軍供職人員或由陸軍學堂出身久帶新練隊伍之文官或久帶新隊粗通

大清新法令
文理之武官品學閱歷均能及格者准其按現充軍職授以新制相當之官次者遞降補授以二級爲止再次者祇給相當或降級之官銜如久帶新隊識字無多之武官只可給予官銜不得授以實官若能補習文字俟經考驗方准補實如在陣前異常出力亦准破格請補實官

三現在陸軍供職人員原有文武官階崇於現充軍職不欲改補新官者均仍其舊
四新設此項官階永無候補名目或帶領軍隊或辦理各項兵事一經奏准補授均爲實任官按其官階給以官俸按其軍職給予薪公除因案革斥不計外其供職年久例應退休人員亦得食減成俸餉至俸餉章程容另專案奏定

五立功出力人員有應按新制保獎者尋常勞績准保以應升之級記名遇有應升官階軍職儘先補署

六正參領以上各官由練兵處會同兵部查取應補應升人員品學勞績擇尤開單奏請簡放副參領協參領正軍校等官由督練各督撫擬補具奏俟練兵處會同兵部復核奏定後再給咨赴練兵處報到考驗轉咨兵部帶領引見請旨補授副軍校協軍校等官由督練各督撫咨明練兵處會同兵部彙案奏補

七上等第一級第二級軍職均由練兵處會同兵部請旨簡派自上等第三級至中等第二級各軍職由督練各督撫具奏暫行委充俟練兵處考核相符再行覆奏准

其充補中等第三級以下各軍職由督練各督撫咨明練兵處彙案具奏咨報兵部

八各項軍職均應以相當之實官充補充署無相當之實官准以大於軍職一級之實官借充如再無人始准以小於軍職一級之實官及有應升記名加銜相當者充補充署俟陸軍學堂開辦既久畢業學生選補實官已敷新軍之用其祇有職銜無實官者卽不准補署軍職如現在照新章編制新隊或照新章改編舊隊而各項軍職無新軍合格之員可選者暫准以舊制官員充補充署

九協都統以上各官如獨當一面專任征討均准專摺奏事實授正參領以上各官均准仿城守尉以上例 宮門請安呈遞例摺祇有正參領銜者不得援引

十應行引 見人員如遇操防緊要軍務吃緊准其奏請展緩以重戎行事定仍補行赴部俟引 見實授後再行給劄俾符定例

十一實授協都統以上各官如有職任既久才識超越勳望卓著且諳治理者准由督練各督撫臚列事實專摺奏陳請 飭練兵處兵部會同復核相符者開單請 旨飭下軍機處另單存記遇有京外對品文職缺出與應升人員一併開單 呈進候旨簡用

十二實授正參領以下各在營供職計足十五年後倘筋力漸差不便行伍而學術優

裕通達治理其精神尙能任事者准由督練各督撫咨明練兵處兵部會同考驗如堪任使准以對品文職分別奏請 簡用選用俟奉 旨後由軍機處吏部查照辦理祇有職銜者不得援引

十三此項軍官無論實授署任實有統轄之權者照堂屬禮節接待其餘文武對品者均屬平行

十四實授軍校各官在營啟稟公事照軍禮立白凡見文武各大員均照文官公見燕見禮節所有舊營披執唱銜跪謁之儀一律刪除

十五軍佐中等各官由督練各督撫擬補具奏俟練兵處會同兵部復核奏准後給咨赴練兵處報到考驗轉咨兵部帶領引 見請 旨補授下等各官由督練各督撫

咨明練兵處會同兵部彙案具奏惟同正參領不得仿城守尉例跪 安遞摺

十六同正參領以下各官由學堂出身暨文職改用者准補實官此外祇准加銜其餘體制一切與軍官相仿如在營年久積有資勞者可酌增俸餉以資鼓勵

以上各條爲現行章程如有應行損益變通之處仍由臣處隨時考核會同兵部具奏請 旨遵行

吏部奏擬定教職雙月單月選班摺并清單

竊臣部於光緒三十一年七月十七日奏請逐漸裁撤復設教職並聲明各學堂卒業

師範人員與原省候選各員應如何定章分別銓選之處容臣部另行擬議具奏等因奉 旨依議欽此查各省教職額缺極多選缺極煩今現任復設各員既經奏准移補經制之缺其復設各缺卽行停選則此後經制教職初次缺出自應遵照新章卽以本學復設教職移補迨移補之員又經見缺仍應歸部銓選非詳定章程不足以資遵守並有專選復設教職之員若不量籌出路亦未免向隅臣等悉心參考恪遵屢奉 諭旨刪繁就簡之意按照現行例章其過於煩碎者改就整齊有稍涉偏倚者詳加更定謹繕清單恭呈 御覽如蒙 俞允臣部卽遵奉施行謹 奏光緒三十一年九月

日本 旨依議欽此

謹將擬定教職雙單月選班各緣由繕具清單恭呈 御覽

一定例雙月經制教諭四選一升選班專用舉人就教之人四選一升之後用舉人教習二人 咸安宮教習一人 景山教習一人復設教諭用恩貢一人拔貢一人副榜一人捐納一人貢生教習二人教習輪用四人之後將肄業期滿恩拔副榜選用一人經制訓導專用歲貢候選之人復設訓導用歲貢二人捐納一人歲貢教習一人教習輪用兩人之後將肄業期滿歲貢優貢廩選用一人單月經制教諭訓導俱專用應補之人復設教諭用應補一人應選二人應選班次以恩貢拔貢副榜輪用捐納一人復設訓導用應補一人應選二人應選班次專用歲貢捐納一人今復設教諭訓導既經

停選自應將專選復設教職之人均勻撥歸經制教職班內以免向隅至所有經制教職卽定爲教諭訓導名目其各府復設訓導亦卽照此辦理

一舉人就教向歸雙月經制教諭選用舉人教習跟接舉人選用今請仍舊

一歲貢就教專歸雙月經制訓導用優貢 朝考錄用教職者俟歲貢選用二人後選用一人優貢未經錄用自請就教者附入本科歲貢之末儘數選用統歸於歲貢班今請歲貢就教優貢錄用人員與恩拔副貢生就教者統歸訓導正班選用

一恩拔貢副貢就教者向歸雙月復設教諭選用今復設教諭旣經裁撤若併入經制教諭則舉人員數過多轉爲所擠請歸入訓導選用

一恩貢拔貢副貢歲貢優貢五項教習向跟接本班選用今請仍舊

一大挑教職向歸各正班之前插選一人舉人捐納四項教職向歸各正班之後插選一人若仍舊銓選則額缺裁去一半各項候選之人過於壅滯擬請定入正額選用

一捐納正班及各項花樣向歸雙單月復設教職復設訓導額定一缺捐納本班先遇捐正班到班先選一人捐納分缺先遇捐納本班先捐納正班兩項之前插用一人捐納分缺間俟捐納本班先及捐納正班用過一人之後插選一人至鄭工海防大花樣不拘何項到班先用鄭工二次用海防二人至第五缺始用照例輪用一人此現行捐納章程今復設教職教職均已停選擬請歸經制教職內選用惟須將選額酌加刪

減方足以示持平擬嗣後捐納正班照舊每輪仍定爲一缺到班之前先用捐納本班
先一次用分缺先一人次用捐納正班一人次用分缺間一人其捐納本班先到班即
不必再插分缺先分缺間之人至大花樣向來五缺得四本屬過優擬改爲不拘何項
到班插選一人

一應補教職無論經制復設只歸本班選用現在除原係經制教職照舊例輪用外其
復設教諭擬請歸入經制教諭班內復設訓導歸入經制訓導班內統較服滿日期選
用

一查學務處定章各學堂卒業奏准以教職咨部候選之員擬請照此次擬定輪選凡
有缺出歸師範生選用一人各項候選選用一人相間輪用以免偏枯

以上所有擬定教職班次另繕簡明選表恭呈 御覽如蒙 俞允臣部卽欽遵辦理

計開

雙月教諭 遇缺先 捐納大挑先 遇缺先 大挑 遇缺先 捐納舉班先 遇

缺先 捐納舉班先 遇缺先 捐納舉班先 遇缺先 捐納舉班先 遇缺先

捐納舉班先 遇缺先 舉人 遇缺先 舉人 遇缺先 舉人 遇缺先 舉人

遇缺先 舉人 遇缺先 舉班捐四項 遇缺先 捐納舉人教習先 遇缺先

舉人教習 遇缺先 遇缺先 捐納本班先 遇缺先 分缺先 遇缺先

統數率
皆先後

捐納 遇缺先 分缺間 遇缺先 舉人勞績教諭 單月教諭 遇缺先 捐納

大挑先 應補 遇缺先 大挑 應補 遇缺先 舉人捐四項 應補 遇缺先

捐納舉人教習先 應補 遇缺先 舉人教習 應補 遇缺先 捐納本班先

應補 遇缺先 分缺先 應補 遇缺先 捐納 應補 遇缺先 分缺間

應補 遇缺先 舉人勞績教諭 應補 雙月訓導 遇缺先 捐納大挑先 遇

缺先 大挑 遇缺先 捐納恩貢先 遇缺先 恩貢 遇缺先 捐納拔貢先

遇缺先 拔貢 遇缺先 捐納副貢先 遇缺先 副貢 遇缺先 捐納歲貢先

遇缺先 歲貢 遇缺先 捐納優貢先 遇缺先 優貢 遇缺先 舉人捐納

四項 遇缺先 捐納五貢教習先 遇缺先教習 遇缺先 五貢教習 遇缺先

捐納本班先 遇缺先 分缺先 遇缺先 捐納 遇缺先 捐納 遇缺先

分缺間 遇缺先 五貢及廩附貢各項勞績 單月訓導 遇缺先 捐納大挑先

應補 遇缺先 大挑 應補 遇缺先 舉人捐四項 應補 遇缺先 捐納

五貢教習先 應補 遇缺先 五貢教習 應補 遇缺先 捐納本班先 應補

遇缺先 分缺先 應補 遇缺先 捐納 應補 遇缺先 分缺間 應補

遇缺先 分缺間 應補 遇缺先 五貢各項勞績 應補

吏部奏擬將教職逐漸停選摺

查各省府廳州縣每學有經制教職一員又復設教職一員共有二員間有簡僻縣學鄉學祇有一員者每省不過三四處上年迭經直隸總督袁世凱安徽巡撫誠勳河南巡撫陳夔龍等奏請裁撤該三省教職去半留半復經御史夏敦復奏直隸教職請免裁併各摺先後奉旨交政務處吏部議奏當經政務處會同臣部奏稱現在各省府廳州縣均應設立蒙小學堂及各省所取之初級師範生由學務大臣考驗合格保送教職歸部銓選將來各省學官即可兼充各該處學堂教員允爲名實相符擬請毋庸裁撤教職等因奉旨依議欽此臣等前奏原欲使所有教職兼充教員俾免曠職又以各省教職通計不下三十餘員驟行裁半則失職過多殊非體卹寒儒之道惟武科已停生員去其半文科議減學事更簡原有教職每學二員實形冗贅若待保送師範一時斷難得如許合格之員臣部再四籌維公同商酌思得一逐漸裁減辦法擬請嗣後遇有復設教職缺出卽行停選若遇經制教職缺出卽以本學復設教職移補仍照原銜升轉如此逐漸停選約計三年卽可裁半至各府教職其原係單缺雙缺者應請仍舊並通飭各學教職講求師範卽以派充教員如有不勝教員之任者由各省督撫隨時甄別開缺卽以各省師範學堂保送之員覆加考核酌量分別銓選既可使各教職講求教育又可使現任各員不至遽行失職庶於整頓學務體恤寒儒二者兼盡並通行各省傳知候選教職均各就本有學務處學習師範一切教法將來銓選得缺派

充教員更資得力至保送師範人員與原有候選各員應如何定章分別銓選之處容臣部另行擬議具奏謹奏光緒三十一年 月 日奉 旨依議欽此

吏部奏酌定舉貢錄就各員選補班次摺

准政務處咨稱光緒三十二年三月十五日奏酌擬寬籌舉貢生員出路章程一摺奉旨依議欽此欽遵咨行到部查原奏所擬章程六條除酌加優拔貢額並貢士未經覆試或未 殿試 朝考者應由禮部分別辦理以及考用謄錄期滿獎敘并生員考職各節應俟謄錄當差期滿并各省生員考試咨送吏部後再行查看情形酌擬選補班次外其截取揀選舉人錄用并五貢就職各員臣等謹參考例章分別酌擬選補班次繕單進呈 御覽恭候 欽定俟 命下之日由臣部通飭遵照辦理謹奏光緒三十一年 月 日奉 旨依議欽此

謹將截取揀選舉人錄用并五貢就職各員分別酌定選補班次敬繕清單恭呈 御覽

計開

一舉人截取知縣雙月用五人單月用四人應仍照定例銓選其隨時分發到省者試用期滿甄別後除升調所遺選缺例定序補班次應行查銷外其升調病故休所遺選缺均應俟大挑舉人用過二人後按科分名次用截取舉人一人即作爲正班積

缺到班時仍先用本班先一人現在挑班停止員數日減凡大挑舉人應行序補升調病故休所遺選缺各班若挑班無人應專用截取舉人序補其大挑舉人應行抵補升調所遺選缺各班若挑班無人亦准以截取舉人先截取舉人酌量抵補如遇直隸州州同四項大使截取到班無人亦准以舉人截取知縣分別借補選補者照現缺升轉借補者照原銜升轉

一截取舉人拔貢優貢教職知縣分發到省者定例試用二年期滿查捐納試用知縣均定爲一年期滿截取等項正途曾任人員轉不得與捐納一體未免向隅嗣後正途曾任正佐各員分發到省應一律定爲試用一年期滿甄別俾得及時効用

一直隸州州同例定選班雙月用四人單月用一人均以舉人知縣擬補單月應補無人亦准以舉人知縣抵補其外補班次用候補一人委用一人捐納一人候補一人委用一人捐納一人候補一人委用一人議敘一人捐納二人之後接用捐輸一人各班到班之前先用各本班先一人如各本班無人方准以大挑舉人借補如本班有人仍按班輪用今舉人截取以直隸州州同用應卽作爲直隸州州同正班雙單月到班卽以截取正班擬選抵選無人准以舉人截取知縣借選並准捐本班先照正班額數選用其願分發到省者亦准其隨時呈請分發並捐指省分試用期滿甄別後應於委用一人後按科分名次各接用截取一人

如有以佐或改補之大挑一等舉人應與截取合爲一班

按科分名次補用

即作為正班積缺到班時仍先用本班先一人如遇要缺亦准以截取舉人酌署如本班無人准以舉人截取知縣借補如直隸州州同一時無相當缺出無論曾否呈請借補亦准以截取原銜按孤缺無缺借補五缺佐貳借補本班無人之缺定例借補直隸州州判府屬州同州判府經歷縣丞四項大使等項之缺選補者照現缺升轉借補者照原銜升轉

一各省鹽場大使批驗所大使布政司庫大使鹽運司庫大使鹽道庫大使四項揀補班次雙單月指缺輪用一舉人均以舉人截取知縣擬補應補無人亦以舉人截取知縣抵用其外補班次用候補一人委用一人捐納一人候補一人委用一人捐納一人候補一人委用一人議敘一人捐納二人之後接用捐輸一人各班到班之前先用各本班先一人今舉人截取以鹽庫各大使用應掣定一項或捐指一項雙單月揀補之舉人即以舉人截取本項指缺輪用應補無人亦以舉人截取本項抵用先指項一人次用掣項一人本項無人准以各項通融抵用補用再無人准以舉人截取直隸州州同輪用抵用又無人准以舉人截取知縣輪用抵用按科分名次先後不得撓越准捐本班先照正班額數選用願分發到省者亦准其隨時呈請分發並捐指省分試用期滿甄別後惟布政司庫大使一項無論何班到班應先用各班一人次按科分名次用截取舉人一人相間輪補各班無人即專用截取舉人其餘

各項應各種各缺於委用一人後按科分名次各接用截取一人卽作爲正班積缺均先用指項一人次用掣項一人到班時仍先用本班先一人如遇要缺亦准酌量請署如本項無人准以各項通融補署如各項截取均無人亦准先儘截取直隸州州同次儘截取知縣借補均自到任之日起扣足五年作爲俸滿選補者照現缺升轉借補者照原銜升轉

一各省舉人既不限定科分均准以知縣隨時揀選註冊亦應仰體朝廷量能授官之意核計中式已過十年由臣部帶領引見照截取舉人新章以知縣直隸州州同鹽庫各大使三項請旨分別錄用奉旨後各按班次註冊准其赴部投供各按科分名次先後選用願分發到省者准其免交補班銀兩報捐分發並指省分試用其未滿十年有願捐免者亦准其按年限遠近分別捐免隨時帶領引見請旨錄用一律赴部投供並捐分發及指省試用其滿蒙漢軍舉人揀選知縣仍照向章辦理至恩拔副歲優貢生本准隨時就職應卽准其免交補班銀兩隨時報捐分發並指省分試用

一揀選舉人以知縣用者銓選班次應於截取舉人後另立一班雙單月到班各按科分名次先後雙月選用三人單月選用二人無人准以本項截取舉人抵選并捐本班先照正班額數選用報捐分發到省者期滿甄別後升調所遺選缺應於滿蒙漢

軍揀選舉人後另立一班按科分名次序補一人到班時仍先用本班先一人雜項所遺選缺應於拔貢主事改知縣補用一人後用揀選舉人一人如遇直隸州州同揀選到班截取抵選抵補無人亦准以揀選知縣分別借選借補選補者照現缺升轉借補者照原銜升轉

一揀選舉人以直隸州州同用者銓選班次雙月應俟截取舉人選用四人後用揀選舉人二人單月應俟截取舉人選用二人後用揀選舉人一人均按科分名次先後選用無人准以本項截取舉人抵選再無人准以揀選知縣借選并准捐本班先照正班額數選用報捐分發到省者試用期滿甄別後應俟截取舉人用過二人後跟接委用班按科分名次用揀選舉人一人即作爲正班積缺到班時仍先用本班先一人如揀選本班無人仍專用截取班截取班無人准以揀選知縣借補如直隸州州同一時無相當缺出無論曾否呈請借補應俟截取舉人借補二缺後准以原銜按借補定例借補直隸州判府屬州同州判府經歷縣丞四項大使等項一缺如截取無人例應本項借補時即專以揀選舉人借補選補者照現缺升轉借補者照原銜升轉

一揀選舉人以鹽庫各大使用者應掣定一項或捐指一項雙單月揀補班次均應俟截取舉人用過二人後用本項揀選舉人一人本項無人准以各項通融抵補再無

人仍專用截取班又無人准以揀選直隸州州同借補均准捐本班先照正班額數選用報捐分發到省者試用期滿甄別後亦應俟截取舉人用過二人後跟接委用班用揀選舉人一人卽作爲正班積缺均按科分名次先用指項一人次用掣項一人到班時仍用本班先一人如本項無人准以各項通融補用如各揀選無人仍專用截取班再無人准以揀選直隸州州同借補選補者照現缺升轉借補者照原銜升轉

一恩拔副貢就職直隸州州判雙月輪用二人單月輪用一人應仍照定例銓選其恩拔副歲優五貢就職按察司鹽運司經歷州判府經歷縣丞等項應掣定一項或指一項雙月應於捐納二人後輪用就職二人單月應於應補一人後輪用就職一人按五貢出身次序輪用各班一人各先用本班先一人週而復始報捐分發到省者試用期滿甄別後均應於委用一人後各接用就職一人卽作爲正班積缺按出身次序輪補週而復始到班時仍先用本班先一人其直隸州州判按察司鹽運司經歷缺分較少無論會否呈請借補亦准按借補例借補州判府經歷縣丞等項之缺以上選補各班除恩拔副就職直隸州州判一項不准與別項牽合報捐指項外其五貢就職按察司經歷等項均先用指項一人次用掣項一人選補者照現缺升轉借補者照原銜升轉

一五貢例准就各項教職分別銓選現在復設教諭訓導停選五貢就教各員統歸訓導正班選用查經制訓導各省額缺無多五貢併歸一項銓選實屬無期自應略予變通五貢已經就教人員恩拔副貢應准其改就直隸州州判歲優貢准其改就按察司鹽運司經歷州判府經歷縣丞各項以疏壅滯

吏部議覆御史王誠義奏州縣正途日少請將進士截取班優加選用摺

本月初九日軍機處鈔交四川道監察御史王誠義奏州縣正途日少請將進士截取班優加選用以杜流弊而重民事一摺奉 旨吏部議奏欽此欽遵鈔交到部查原奏內稱知縣一官民命攸關地方攸繫斷非猥瑣不學之人所能勝任現在停止科舉館選即用大挑各項俱已塞其本源而學堂甫設入學之士須俟十年以後方能學成入仕當此新舊不接之際非變通舊章廣爲選用勢必盡以雜流居民上於民生吏治大有關係除舉人五貢已由政務處籌議出路外擬請嗣後歸班進士及候補主事書各項京官凡由進士出身改就知縣者照散館庶吉士由部屬改歸知縣人員到班時儘數選用如呈請分發者亦照進士即用分發各省統與即用舊班按科序補等因臣等悉心酌核所奏各節均係爲慎重牧令澄清仕途起見當此科舉停止學堂甫立新舊不接之時進士知縣一項仿照散館庶吉士由部屬改歸知縣人員儘數選用未始非疎通正途之一法惟此項人員或由榜下歸班或由候補主事書各項京官改就

人數稍多非庶吉士散館部屬改歸知縣人數無多者可比若儘數選用漫無限制別班又未免壅滯亦非持平之道查進士知縣雙月到班選用五人單月到班選用四人捐納勞績本班先後各照正班額數插選計雙月進士正班選五人本班先後插選十五人單月進士正班選四人本班先後插選十二人正班人數少插班兩倍稍爲向隅擬請嗣後進士知縣雙月到班捐納勞績進士先勞績進士後各班插用五人後各接用正班五人單月到班捐納勞績進士先勞績進士後各班插用四人後各接用正班四人現在單月進士正班四人將次用竣應補用正班四人以足捐納勞績各本班先插用後各接用正班四人之數並俟勞績進士後插用四人後再接用正班四人以期與插班人數兩得其平其呈請分發者到省一年甄別後除升調遺雜項選缺例定補班應行查銷外其升調遺病故休選缺卽用進士應行輪補各班均應以截取進士附於各本科卽用進士之末按甲第名次先後按班跟接輪補到班時仍先用本班先一人本班先無人仍用卽用進士先一人雜項留補選缺亦應以截取進士先截取進士與卽用進士先卽用進士輪班酌補如卽用進士輪補各項選缺到班無人均應以截取進士抵補其卽用進士應行抵補各缺如卽用先卽用無人亦應以截取進士先截取進士酌量抵補統俟試署一年期滿再請實授如此量爲變通正途卽不患沈淪別班亦不至壅滯謹奏光緒三十二年四月初九日奉 旨依議欽此

吏部奏詳訂各部司員補缺輪次摺附片

竊查臣部前於奏定各衙門司員缺額摺內聲明舊設改設添設各衙門所有額設各項缺分刪除選咨留各名目一律改爲題缺由各該堂官在各本衙門分別奏補以一缺按照官階班次酌量才具擬定正陪以一缺揀資較深者暨勞績保舉之員分班輪補等因奉 旨允准在案此特舉其大綱至詳細節目必須分晰酌定方足以資遵守臣等公同商酌擬請將各部司員酌題之缺按照新章無論實缺候補資深勞績人員統行酌量才具擬定正陪補用序補之缺如有 特旨指定部分 特旨分部即用即補暨各項不積缺人員仍照定例先儘補用均無庸積缺分輪用資深時無論滿漢郎中員外郎滿主事先用資深先一人不積缺接用資深正班一人資深到班滿漢郎中員外郎均以實缺員外郎主事奏補之日較資補用一人再到班時以候補郎中員外郎學習期滿之日較資補用一人滿主事缺先以一等筆帖式較資序補一人再到班時以候補人員較資序補一人以上滿漢郎中員外郎並滿主事各缺均與勞績人員相間輪用其滿主事缺先用資深先一人再用資深二人再用勞績一人輪用資深時先用進士及拔貢錄用小京官之正途人員一人較資序補再用舉貢廩生出身之捐納人員一人較資序補如有進士捐納者亦歸入此班序補再輪用資深時先用進士廩生及拔貢錄用小京官之正途人員一人較資序補再用各項出身之捐納人員一

人較資序補至勞績到班時郎員主三項人員均先用從前已保之無論題選咨留一人無人將無論題選無論咨留及遇缺卽補遇缺題升題補人員統較奉 旨日期序補一人再無人將儘先題升題補及升用補用人員統較奉 旨日期序補一人至吏禮兩部漢司員向無舉貢捐納人員到部現始將舉人五貢廕生出身捐納人員掣分與各部情形不同自應分別辦理除酌題之缺仍照此次定章統行酌補外其郎員主三項序補之缺輪用資深時無論實缺候補人員統於到部學習期滿奏留後較資序補以上實缺應升人員如有應扣試俸歷俸者仍查照定例辦理如蒙 俞允俟 命下之日由 臣部通行各部一體欽遵辦理謹奏光緒三十二年十二月十八日奉 旨依議欽此

再各部裁缺人員除願分發改外者另行照章辦理外如有呈請分部者其實缺人員遇序補之缺仍按原奏補日期先後與本部人員相間輪用先用本部一人再用裁缺一人其候補人員遇序補之缺與本部人員各較各資相間輪用先用本部一人再用裁改一人勞績到班時亦與本部人員各較班次相間輪用先用本部一人再用裁改一人以上各員無論實缺候補分部後如有熟悉部務才具出衆亦准由各該堂官酌量擬補以昭公允而資激勸謹奏同日奉 旨依議欽此

再現在各部郎中員外郎主事俱改題缺所有從前勞績保舉無論題選咨留各名目

應卽酌改擬請嗣後異常勞績請獎應以遇缺先前卽補尋常者以遇缺卽補其遇缺先前卽補卽照無論題選咨留章程辦理遇缺卽補仍照舊章辦理以期名實相符謹奏同日奉 旨依議欽此

宗人府奏請疏通宗室仕途摺

竊臣等恭讀九月二十日更定官制 諭旨仰見 朝廷力拯時艱孜孜求治之至意凡茲臣庶欽佩莫名伏維各部院既准自行酌議會同軍機大臣覈定奏明辦理在案臣衙門雖不在歸併之列而有應行變通之處請爲我 皇太后 皇上陳之一宗室生齒日繁宜籌出路伏查國初宗支子弟分茅錫爵體制崇隆迄今二百餘年蕃衍殆八千餘人叨食餉項數倍於前而身登仕級百無一二終日游手賦閒毫無所事者不一而足然其中亦不乏可造之材若不加意培養徒致廢棄殊爲可惜前准京旗練兵大臣挑選閒散宗室壽長等咨送保定入營訓練在案擬請 旨嗣後准由臣衙門選擇年力精強者咨送陸軍部傳送入營練習陸軍其文理通順者准咨送民政部酌量差委總期教育普及藉圖自強庶閒散宗室不至暴棄矣一官缺壅滯宜急疏通 臣衙門建立之初設理事官等缺共六十四額其中有效力筆帖式二十四員雖在額內惟係食餉例不支領俸糶除此一項則食俸者僅四十員今則臣衙門實缺候補人員不下一百三十餘人竟數年不遇一缺輪次序補皓首無期儻欲甄拔人才更難拘以成

格嗣後無論臣衙門暨各部院宗室之現任候補各員按照吏部截取章程准其截取外用或援照外務部奏准調用人員新章擇臣衙門有品學兼優事理通達者咨送各部院學習行走如果才具出衆即著該堂官奏明以原班補用若行走平常不能辦理部務者准由該堂官咨回原衙門行走以示限制而免濫竽再各部院原設宗室專缺仍照定例分別選補以開壅滯而擴升途冀副朝廷惠愛宗支有加無已之至意抑

臣等尤有請者前准盛京將軍趙爾巽具奏通籌裁缺出路一摺光緒三十一年八月初六日奉旨依議欽此原奏內稱盛京裁缺主事候補主事以直隸州知州分省補用等因查主事宗室斌瑄候補主事宗室寶賢等業由吏部遵照辦理在案臣衙門暨各部院宗室實缺候補各員材堪造就者原不乏人若儘令該宗室等拘定成例專補京缺殊不足以資歷練且既准盛京五部裁缺宗室各員分省外用京內實缺候補宗室各員同爲一律懇請仿照裁缺成案京內實缺候補宗室各員准其援案保送外用章程由臣衙門咨送吏部辦理謹奏光緒三十二年十二月初九日奉旨依議欽此

吏部奏酌定裁缺衙門司員筆帖式改用班次摺

本月二十日內閣奉上諭此次裁缺衙門之實缺候補司員筆帖式或由他衙門調用或分別班次分發省外補用著吏部即行妥議具奏欽此欽遵鈔交到部仰見朝廷體恤臣工不使有一人失所至意欽感莫名查此次釐定官制以太常光祿鴻臚三

寺併入禮部以太僕寺併入陸軍部以工部併入商部改爲農工商部係舉事體相關者各以類附以歸簡易非併其原有事件概行裁撤也各司員筆帖式或公事練習或正途出身均不乏可用之才臣等悉心核議擬將裁缺各衙門司員筆帖式逐一分別自實缺候補已未奏留酌定班次如此內有京察一等奉旨記名之郎中員外郎仍由軍機處開單請旨簡放主事以下仍照例按班升用其裁缺衙門郎中等官除本衙門留用暨他衙門調用外擬請先儘相當各衙門改發行走按原班補用以昭平允其外用者實缺郎中員外郎主事一律作爲歷俸期滿郎中准截取知府員外郎准保送知府主事准截取直隸州知州分發省分各按例定班次補用郎中員外郎有京察一等未經記名人員遇有應留選缺應先用此項一人次用各項班次一人相間輪用以示優異其候補之郎中員外郎准以知府主事准以直隸州知州均分省歸候補班補用若未經奏留正途出身之郎中准以直隸州知州員外郎准以知州分省候補班補用主事准以知縣分省歸委用班補用其各項出身之郎中准以直隸州知州員外郎准以知州分省均歸委用班補用主事准以知縣分省歸試用班補用其實缺郎中員外郎主事有自請改直隸州知州知縣分省補用進士出身之候補並額外主事有願歸進士知縣原班銓選並以截取進士知縣分省試用者仍准其遵照定例並奏定新章辦理其各衙門六品以下小京官除留用調用外其內用者改發各衙門以相

當對品之缺分別補用其外用者無論原官有無外升班次均分別實缺候補以原有對品升階分省各歸班次補用至筆帖式一項裁缺衙門人數較多位置不易除本衙門留用他衙門調用並正途出身之員或以對品內用或以知縣分發外其餘各員應由各衙門咨送臣部考試分別等差內用者改發各衙門行走按班補用外用者實缺候補各按等差以知縣及佐雜等官分省各歸班次補用以示體恤現在裁併各衙門員缺尙未全行酌定應俟奏定後再由臣部詳細酌核未盡事宜分析擬議請旨遵行謹奏光緒三十二年 月 日奉 旨依議欽此

吏部奏詳訂裁撤小京官及筆帖式改用內外官階班次摺附片

竊臣部前奏酌定裁缺衙門司員筆帖式改用班次摺內聲明各衙門六品以下小京官除留用調用外其內用者改發各衙門以相當對品之缺分別補用其外用者無論原官有無外升班次均分別實缺候補以原有暨對品升階分省各歸班次補用等因光緒三十二年九月二十八日具奏奉 旨依議欽此欽遵通行在案茲准大理院將大理寺裁撤人員冊送到部又准禮部咨稱太常光祿鴻臚三寺裁缺各員願改官者咨送吏部照裁缺新章辦理各等因臣部正在核辦間准軍機處交御史俾壽片奏三寺裁缺司員可否簽分各部一律當差等語奉 旨該部議奏欽此欽遵鈔交到部亟宜按照臣部原奏章程分晰擬議以資遵守查六七八品京官內用與主事等官對品

外用有同知等項升途巨等悉心核議擬請內用者大理寺寺丞改用主事光祿寺署
正改用都察院都事經歷如係 特用及正途出身者亦以主事改用大理寺評事太
常寺典簿太常寺博士太僕寺主簿光祿寺署丞光祿寺典簿部寺司庫滿員改用內
閣中書漢員改用中書科中書如係正途出身者以各部七品小京官改用部寺司務
鴻臚寺主簿以各部司務改用其改主事者補缺班次即照裁缺主事一律辦理其餘
裁改各員缺俟簽分到署後實缺者按原奏補日期先後與本署候補人員相間輪用
裁改實缺用竣再以裁改候補人員與本署候補者各按資深勞績相間輪用仍先用
本署一人再用裁改一人其改用小京官者應按算前資實歷俸次九年作爲候補主
事不准捐免歷俸庶與拔貢 錄用小京官有所區別至內閣滿中書向按八旗滿漢
本堂補用此次改用人員應無論滿漢本堂缺出各按旗分與原班相間輪用不積各
項之缺各部滿司務向係升選並無補班此次改用人員遇有缺出應准儘數留補一
俟用竣再照舊例升選惟九品司匠一項對品京官無相當之缺應改爲筆帖式分部
仍照司匠原官升轉以上裁缺之大理寺丞等官外用者滿漢人員各按定例應升之
同知通判按察司經歷州判分發省分實缺者歸截取班候補者歸候補班學習者歸
試用班按班補用至候選人員未經到署與會到署當差者不同如願改外應令按應
升之階照例補交分發等項銀兩分省試用似此寬籌出路庶裁撤人員可以及時自

效而無失所之虞如蒙 俞允臣部遵照辦理謹奏光緒三十二年 月 日奉
旨依議欽此

再裁缺筆帖式一項臣部前經具 奏聲明正途出身之員或以對品內用或以知縣
分發其餘各員應由各衙門咨送臣部考試分別等差內用者改發各衙門行走按班
補用外用者實缺候補各按等差以知縣及佐雜等官分省各歸班次補用等因奉
旨允准在案茲准各衙門陸續咨送到部應卽定期考試並分別詳訂章程以憑遵守
臣等公同商酌擬請正途出身之員實缺准以知縣分省歸候補班候補准以知縣分
省歸試用班均無庸考試外其餘考列一等者外用與正途出身一律辦理如列二等
以七品之按經歷鹽經歷布都事州判用如列三等以八品之按知事府經歷縣丞布
照磨鹽知事用均簽掣一項實缺分省歸候補班候補分省歸試用班補用以上各員
如願內用者若於分部後統作爲候補人員各部額缺有限不但收缺無期且於各部
補缺班次益形壅滯竊此項人員旣因裁缺而改分他部又以收缺無期而停止升轉
自應加以體恤臣等再四商酌擬請將此項人員實缺者無論掣分何部卽作爲該部
實缺筆帖式仍照原品食俸如有曾遇 京察保列一二等者其一切升轉卽以各該
員原補缺日期與現掣衙門實缺人員一體較俸升轉及酌量題補俟出缺後底缺卽
行裁撤其候補各員原有花樣者分部後仍歸原班以度支部咨到之日與該部候補

人員統較先後擬補其無花樣者仍歸學習正班比較奏留日期補用其到部學習未經奏留者分部後請准接算前資俟扣滿學習三年經該部奏留方准按班補用至庫使一項原係工部專缺按照舊例三年期滿奏留奉 旨後方准作爲工部候補筆帖式改歸庫使正班補用現既裁缺擬請曾經期滿奏留各員分部後仍作爲候補筆帖式改歸學習正班照例補用其未經期滿各員分部後擬准接算前資扣足三年作爲候補筆帖式遇有缺出以期滿之日與同班奏留各員統較先後序補謹奏同日奉 旨依議欽此

吏部奏酌擬 特旨分部人員補缺班次摺附片

竊臣部前奏詳訂各部司員補缺輪次摺開序補之缺如有 特旨指定部分 特旨分部卽用卽補人員仍照定例先儘補用無庸積缺等因奉 旨允准在案至 特旨分部分行走 特旨以何官用呈請分部分行走人員定例期滿奏留歸資深班內補用未奏留以前不論雙單月統計五缺後選用現在選班既停若概令歸資深班候補似不足以昭平允臣等公同商酌擬請將此項人員期滿奏留後遇序班之缺無論資深勞績補過二缺後再遇序補之缺統較奉 旨日期先行插補一人不積資深勞績班次之缺其中有早經奏留者滿漢郎中員外郎滿主事自應歸候補資深班內漢主事歸廩生資深班內如有資深到班在先卽按資深序補如得有勞績保獎者遇勞績到班

在先卽按勞績序補不必拘定二缺後插用一人章程轉令向隅又裁缺光祿寺署正有特旨及正途出身者前經奏准以主事改用惟改用主事與裁缺主事亦應有所區別擬請將實缺署正改用籤分到部後作爲候補主事不得接算署正前資候補署正改用籤分到部學習三年期滿奏留後作爲候補主事均以作爲候補主事之日計資與裁缺主事分部人員較資序補又迴避之實缺郎中員外郎主事滿員向與年滿調京人員比較先後選用漢員向係不入班次卽行選用現已停止銓選應專歸留補擬請改掣部分奏留後照實缺迴避回原衙門奏留人員例遇序補之缺先儘補用不積序補之缺謹奏光緒三十二年 月 日奉 旨依議欽此

再查在京各衙門郎員主三項缺分經臣部於上年十一月二十二日奏明刪除選咨留名目一律改爲題缺等因奉 旨允准在案惟查候選各員人數既多班次亦異除京外統選各員尙有 陵寢缺分可選應仍照舊辦理外查應升京主事暨六品官並指項升選各項人員按照舊例僅有京選一途今旣奏准裁改該員等候選多年無缺可選若不寬籌出路殊不足以示體恤臣等公同商酌擬請將應升京主事暨六品官之上諭處委署主事二年期滿仍歸卽用原班不論雙單月遇有 陵寢主事缺出按班選用又指項升選之科甲出身小京官筆帖式議敘以漢軍堂主事本班先選用者及應升部院漢軍堂主事寺丞等官之漢軍筆帖式以上兩項如有項選人員卽行

簽分各衙門行走作爲額外主事仍試俸三年期滿歸入資深班內照章序補如非頂選人員應令該員等各按應升之階捐足班次及分發銀兩准其掣分行走學習三年由該堂官酌量奏留歸入資深班內照章序補如願改外者並准其以對品知縣分省補用至應升京主事寺丞等官之黑龍江倉屯官吉林倉屯總站官吉林助教各員保題到部者擬請以通判改用仍令照例補交分發等項銀兩分省試用謹奏光緒三十二年 月 日奉 旨依議欽此

吏部奏酌擬截取揀選舉人選補班次摺

竊臣部前於光緒三十二年十二月初三日變通截取揀選舉人錄用摺內聲明三等者照五貢例以按察司鹽運司經歷州判府經歷縣丞用毋庸帶領引 見其選補班次由臣部再行酌擬等因奉 旨允准在案茲查按察司經歷鹽運司經歷州判府經歷縣丞五項缺分不同其選補班次亦異且截取與揀選亦應有所區別非詳加釐定不足以資遵守臣等公同商酌擬請將截取揀選兩項舉人揀列三等者以按察司鹽運司經歷州判府經歷縣丞五項掣定一項或捐指一項選用均歸於雙單月各積各缺無論是否積缺按經鹽經兩項俟銓選二缺後插選一人州判俟銓選三缺後插選一人府經歷縣丞兩項俟銓選五缺後插選一人各按科分名次先後插選均不積各項班次之缺先用指項一人次用掣項一人其願分發到省者准其隨時呈請分發並准

其報捐指省試用一年期滿甄別後以到省之日起無論何項正班用過二人後截取揀選兩項各插補一人各按科分名次先後補用不積各班之缺如截取揀選同時到班應先用截取一人再用揀選一人其委用正班無人亦准以截取揀選人員分班抵補卽積正班之缺以上插補抵補各積各班均先用指項一人次用掣項一人至滿洲蒙古漢軍文舉人及繙譯舉人截取揀選人員均擬照此辦理以歸一律謹奏光緒三十二年 月 日奉 旨知道了欽此

吏部奏滿蒙漢軍文舉人及繙譯舉人截取揀選班次摺

查臣部節次奏定舉貢錄用就職後選補班次章程內開滿蒙漢軍舉人揀選知縣仍照向章辦理原以滿蒙漢軍舉人一經就揀卽可投供候選及呈請分發不願外用者並准以小京官選出出路本寬無俟別爲擬議現在漢舉人截取揀選旣已各爲一班而滿蒙漢軍尙無截取之途其准用之小京官各項又多裁改外用祇知縣一項其雙月插選之班升調所遺之缺又祇各用一人用法未免過隘又繙譯舉人向章並無揀選比之一切舉班尤爲向隅若不酌予變通殊不足以示體恤臣等公同商酌向來舉人大挑並現在五貢就識均不分滿漢擬請嗣後滿蒙漢軍文舉人應截取揀選者卽查照漢舉人現行截取揀選章程一律辦理其八旗駐防及內務府繙譯舉人亦卽附於各本科之末統與漢舉人比較科分名次選補今截取揀選舉人旣擬將滿蒙漢軍

文舉人及繙譯舉人合併漢舉人一班所有各項選班亦應量爲推廣查舉人截取按照例章知縣雙月用五人今擬改用六人單月用四人今擬改用五人直州同雙月用四人今擬改用五人單月用二人今擬改用三人鹽庫大使雙單月各用二人今擬改用各用三人舉人揀選按照新章知縣雙月用三人今擬改用四人單月用二人今擬改用三人直州同雙月用二人今擬改用三人單月用一人今擬改用二人鹽庫各大使雙單月各用一人今擬改各用二人再截取揀選各項如有捐納本班先及勞績本班先本班後人員均照以上酌定正班額數選用其餘外補班次及一切捐請分發等項統照漢舉人原定章程辦理至滿蒙漢軍舉人除有自揣不勝民社仍照舊例以小京官銓選外其截取後應選小京官及從前揀選知縣班次均請一律查銷以免牽混而歸畫一謹奏光緒三十三年三月二十二日奉 旨依議欽此

吏部奏酌擬法部司員補缺輪次摺並表式

查臣部奏定各部滿漢司員補缺輪次內開額設各項缺分刪除選咨留名目一律改爲題缺由各該堂官在各衙門分別奏補以一缺按照官階班次酌量才具擬定正陪以一缺揀資俸較深暨勞績保舉之員分班輪補並詳訂各項輪補班次奏明奉 旨允准通行各部遵照在案茲准法部咨稱本部於本年三月十七日奏請改補試署各缺係因才錄用不拘成例無論滿漢專爲擇才起見是以所用各員滿漢未能適平若

以後卽視此次爲滿漢底缺其勢轉多遷就茲酌擬滿漢補缺輪次辦法除遇酌題班次滿漢並用以期得人如酌補滿員正陪均用滿員如酌補漢員正陪均用漢員俾歸一律外其輪應序補時無論所出之缺爲滿爲漢滿員到班則用滿員漢員到班則用漢員周而復始並繕爲班次表式咨行到部查該部新設缺分旣無滿漢定額其補缺班次自應明定章程以資遵守今該部所擬補缺輪次表式酌題之缺不分滿漢係爲得人起見序補之缺係屬平均計算與奏定新章尙無窒礙惟裁缺各員及各項不積缺人員該部未經議及應仍遵照臣部奏定章程分別辦理以免向隅而歸畫一謹奏
光緒三十三年八月初一日奉 旨依議欽此

郎中員外郎補缺輪次表

第一缺酌題

第二缺序補 滿資深以實缺員外郎主事奏補之日較資補用一人

第三缺酌題

第四缺序補 裁缺滿資深

第五缺酌題

第六缺序補 漢勞績

第七缺酌題

第八缺序補 裁缺漢勞績

第九缺酌題

第十缺序補 漢資深以實缺員外郎主事奏補之日較資補用一人

第十一缺酌題

第十二缺序補 裁缺漢資深

第十三缺酌題

第十四缺序補 滿勞績

第十五缺酌題

第十六缺序補 裁缺滿勞績

第十七缺酌題

第十八缺 滿資深以候補郎中員外郎奏留後按照學習期滿之日較資補用一人

第十九缺酌題

第二十缺序補 裁缺滿資深

第二十一缺酌題

第二十二缺序補 漢勞績

第二十三缺酌題

第二十四缺序補 裁缺漢勞績

第二十五缺酌題

第二十六缺序補 漢資深以候補郎中員外郎奏留後按照學習期滿之日較資深

用一人

第二十七缺酌題

第二十八缺序補 裁缺漢資深

第二十九缺酌題

第三十缺序補 滿勞績

第三十一缺酌題

第三十二缺序補 裁缺滿勞績

滿漢主事補缺輪次表

第一缺酌題

第二缺序補 滿資深用一等小京官比較奏補日期先後補用一人

第三缺酌題

第四缺序補 裁缺滿資深

第五缺酌題

第六缺序補 漢資深用進士及保送錄用分部人員拔貢保送錄用小京官歸主事
班後較資深補用一人

第七缺酌題

第八缺序補 裁缺漢資深

第九缺酌題

第十缺序補 滿勞績

第十一缺酌題

第十二缺序補 裁缺滿勞績

第十三缺酌題

第十四缺序補 漢資深用進士舉貢廩生捐納補用一人

第十五缺酌題

第十六缺序補 裁缺漢資深

第十七缺酌題

第十八缺序補 滿資深用候補人員奏留後比較學習期滿日期先後補用一人

第十九缺酌題

第二十缺序補 裁缺滿資深

第二十一缺酌題

漢勞績

第二十二缺序補

第二十三缺酌題

裁缺漢勞績

第二十四缺序補

第二十五缺酌題

滿勞績

第二十六缺序補

第二十七缺酌題

裁缺滿勞績

第二十八缺序補

第二十九缺酌題

漢資深用進士廕生及小京官較資補用一人

第三十缺序補

第三十一缺酌題

裁缺漢資深

第三十二缺序補

第三十三缺酌題

滿資深用一等小京官比較奏補日期先後補用一人

第三十四缺序補

第三十五缺酌題

裁缺滿資深

第三十六缺序補

第三十七缺酌題

第三十八缺序補 漢資深用各項出身之捐納較資補用一人

第三十九缺酌題

第四十缺序補 裁缺漢資深

第四十一缺酌題

第四十二缺序補 滿勞績

第四十三缺酌題

第四十四缺序補 裁缺滿資深

第四十五缺酌題

第四十六缺序補 漢勞績

第四十七缺酌題

第四十八缺序補 裁缺漢勞績

吏部奏舉貢考職並優貢錄用知縣補缺班次章程摺

內閣抄出光緒三十年六月二十四日奉 上諭此次考試舉貢李介春等均著以知縣分省補用等因欽此又於七月二十二日奉 上諭此次朝考錄取優貢考列一等之周任等均著以知縣分省補用取列二等之陳翌恭等均著以按察司經歷鹽運司

經歷散州州判府經歷縣丞分省補用等因欽此當經臣部欽遵擬定省分並按經歷等官缺項發給執照旋據各該員呈請歸班前來臣等伏查此次舉貢考試及優貢朝考均分別內外錄用蓋略仿進士授職及拔貢除官之意惟內用既分三等則奏留序補皆有成例可循獨知縣一項前後所奉諭旨同係分省補用既不以便以明詔所垂強分軒輊亦未可以科目互異漫無權衡查兩案所用知縣不下三四百員若皆歸入一班則班次之擁擠過甚轉無以廣造就而宏甄拔臣等公同商酌現在會試已停卽用知縣日少一日所有舉貢分省知縣擬請附於卽用班內一切序補酌補之處悉照卽用人員之例辦理其優貢知縣卽專歸於候補班內照候補之例辦理庶專案保送者固得從優而一體分省者亦不致於見絀至二等優貢奉旨以按察司經歷鹽運司經歷散州州判府經歷縣丞分省補用者計每項自應一律歸於候補班內與各項候補人員統較到省先後按班補用均毋庸另立班次以歸簡易再查向來外補章程榜下卽用知縣與奉旨發往各省候補人員均不核扣甄別惟先經政務處王大臣會奏疏通舉貢出路摺內有該舉貢等應分發各省者既有到省甄別之條又有入法政學堂肄業之案請飭下各該督撫認真辦理以期澄汰庸瑣成就廉能等語此案舉貢知縣及優貢知縣佐雜等官雖經臣部比例優定班次未便繩以試用之例惟分發驟益多人仍應申明政務處原奏由該督撫隨時體察分別核辦庶詔旨與

大清新法令
定例自可並行不悖抑臣等更有請者現在截取揀選舉人在臣部考試三等並保送被遺舉貢經臣部奏准無庸考試以及尋常五貢就職各以按經歷等項掣簽分發者均照例歸試用班補用今二等優貢現定班次係欽遵 諭旨辦理前項截取揀選人等自不得妄有牽引致滋紛擾獨從前優貢知縣一項其釋褐入官與此次錄取之法並無殊致而一經新優貢到省則資格在前輪次反不免居後於事未爲平允自應一併請 旨將歷屆已到省之優貢原班查銷均改歸新章辦理如此分別核定應限制者仍爲限制應歸併者即予歸併銓政或較爲畫一謹奏光緒三十三年九月十八日奉 旨依議欽此

吏部奏核議宗室選補章程摺并章程

准宗人府咨宗人府奏疏通宗室升途請 飭交軍機大臣會同吏部核議具奏候旨施行一摺於光緒三十二年十二月十九日奉 旨依議欽此抄粘原奏恭錄 諭旨咨照到部並准軍機處片交臣部主稿前來原奏內稱一宗室生齒日繁擬籌出路查 國初宗支子弟分茅錫爵體制崇隆迄今二百餘年蕃衍殆八千餘人叨食餉項數倍於前而身登仕版百無一二其中不乏可造之材若不加意培養徒致廢棄殊爲可惜前准京旗練兵大臣挑選閑散宗室耨長等咨送保定入營訓練在案擬請嗣後由臣衙門選擇年力精強者咨送陸軍部轉送入營練習陸軍其文理通順者准咨送

民政部酌量差委總期教育普及藉圖自強庶閑散宗室不至暴棄矣一官缺壅滯宜急疏通臣衙門理事官等缺共六十四缺其中効力筆帖式二十四員雖在額內例不支領俸糈食俸者僅四十員今則實缺候補不下一百三十餘人論次序補皓首無期擬嗣後無論臣衙門暨各部院宗室現任候補各員按照吏部截取章程准其截取外用或援照外務部奏准調用人員新章擇臣衙門品學兼優事理通達者咨送各部院學習行走如果才具出衆卽著該堂官奏明以原班補用若行走平常不能辦理部務准咨回原衙門以免濫竽再各部院原設宗室專缺仍照定例分別選補冀副 朝廷惠愛宗支有加無己之至意尤有請者前准 盛京將軍趙爾巽具奏通籌裁缺出路一摺內稱 盛京裁缺主事候補主事以直隸州知州分省補用等因查主事宗室斌瑄候補主事宗室寶賢業由吏部遵照辦理在案京內實缺候補宗室各員同爲一律懇請照裁缺成案准其保送外用由臣衙門咨送吏部辦理各等語臣等伏查所請各條除閑散宗室咨送陸軍部入營練習暨民政部酌量差委之處應由宗人府徑咨陸軍部民政部辦理外其繫於外用者一曰照章截取以定銓選之班一曰援案保送以廣分發之途竊惟截取爲漢員專例而保送則該衙門自有專章其始天潢體制本極優崇故必遠支始准外用且又僅止俸滿外用與 京察 記名人員同以道府由軍機處請 旨簡放初無內選外補之法亦更無保送道府以下之官之法今支派日以

大清新法令
蕃衍而差缺復多裁併僅此請 簡一途實不足以資敷歷惟是京員外用向以職任俸次爲衡原奏意在不爲限制與部章成案旣屬牴牾而截取尤多窒礙自不得不通籌熟計仍就保送分等差庶名實不致混淆而滿漢亦較畫一計宗室翰林現已無多委署主事筆帖式亦有保送御史之途以及近支人員例不外用均應仍照舊章辦理外臣等謹將宗人府暨各部院五六品宗室選補道府等官辦法分別酌定另繕清單恭呈 御覽至原奏又請照外務部調員章程將宗室人員咨送各部院學習行走一節嗣後各部院需材任使自可隨時向該衙門指名調取再由各該堂官酌定期分別奏留補用若未經調取遽由該衙門咨送學習核與各項人員到部之例均屬不符應請毋庸置議謹奏光緒三十三年九月十八日奉 旨依議欽此

謹擬宗室升途酌定保送道府等官選補章程恭呈 御覽

一原奏稱官缺壅滯急宜疏通擬嗣後無論臣衙門暨各部院宗室現任候補各員按照吏部截取章程截取外用等語查定例漢給事中御史郎中連閏歷俸二年指捐之郎中試俸實授後再扣限二年如捐免試俸應扣實歷俸次三年方准論俸截取道府吏部截取時令該堂官分別堪勝繁缺或僅堪簡缺秉公保送帶領引 見請 旨記名遇有缺出於 記名人員內論俸升用上次用完再用後次 記名之人其保送繁缺准以繁缺 記名人員仍知會軍機處遇有請 旨缺出一體進單恭候 簡用僅

堪簡缺者如本月無簡缺仍歸原班俟有簡缺再行升用又截取道府人員選班照例定正額銓選外雙單月各積各缺無論何項班次是否積缺銓選二缺之後插選截取一人以次挨選不積正班之缺如遇各班無人之缺即以截取人員抵選雙月知府到班時郎中與御史相間輪用單月知府到班時御史與郎中相間輪用如遇各班無人之缺應截取人員抵選時亦一律分別相間抵選以上插選抵選雙單月各積各缺不得與正班牽連接算以免紊亂又直隸州知州應歸部選之缺毋庸俟吏部行文咨取由六部理藩院步軍統領衙門各該堂官分別滿洲蒙古漢軍及漢主事將本任內曾經京察一二等及雖未遇京察而歷俸三年以上人員秉公保送不必拘定俸次先後擇其才具優長辦事出色者出具切實考語保送吏部查係合例者隨時帶領引見請旨記名遇有缺出按記名日期先後同日按本任俸次先後升用單月滿員與漢員相間雙月漢員與滿員相間滿員到班無人即用漢員漢員到班無人即用滿員其餘二缺插選及抵選無人之缺一如道府插選抵選之法其京察列入三等及銓選得缺未經京察並應銷試俸未經期滿之員均不准保送又凡截取道府保送直隸州知州人員記名後均准其隨時呈請分發各省歸候補班如遇要缺由該督撫酌量補用如遇雜項選缺應先儘此項人員請補不准聲敘人地不宜又光緒三十一年十二月臣部議覆翰林院疏通升途案內奏明讀講撰文編檢等官截取道府

者應查照給事中郎中御史雙單月輪次各附入一班分別銓選奉 旨依議欽此均
歷經遵辦在案再查宗室保送舊章但係五品實任均以六年爲俸滿且均係道府並
用初無正途捐納之分今原奏請照臣部章程截取不知既議截取則出身俸次職任
升階定例均有限制臣部既無從一一稽核又況翰林之外復增新班則班次亦將因
之大滯自應酌照主事保送成法而略事變通擬請嗣後五品宗室六年俸滿保送者
給事中准其專保道員御史理事官郎中副理事官員外郎准其專保知府均由該堂
官分別繁簡出具考語咨送臣部帶領引 見臣部卽分別道府擬 旨以繁缺用以
簡缺用及毋庸記名三項恭候 欽定如奉 旨以繁缺用者遇有請 旨缺出應由
軍機處與各項 記名人員一體進單請 簡其部選之缺道員無論雙單月俱俟漢
給事中翰林插選二人後接選宗室一人知府亦無論雙單月將宗室御史理事官郎
中副理事官員外郎合爲一班統按奉 旨記名先後同日奉 旨按俸次先後俱俟
漢郎中御史翰林無論何項輪流插選二人後接選宗室一人到班時除先儘坐補原
缺各項卽用銓選外如遇截取二缺並 特旨卽用五缺後選用人員同時到班仍先
用宗室人員如宗室到班 記名無人或另有不合例事故即過班用各項合例人員
俟再積截取二缺人員二人後再將宗室 記名人員擬選如奉 旨以簡缺用者其
輪選之法亦同惟到班時適有簡缺而遇 記名煩缺人員同時到班應先儘煩缺人

員銓選以及到班時適無簡缺亦均俟再積截取二人後方准作爲到班其宗室經歷主事二項應卽查照滿蒙漢軍主事保送直隸州之法一體保送俟奉 旨後亦卽與滿蒙漢軍人員統合爲一班分別升選毋庸別爲之制以上 記名道府及直隸州各員如願分發者准其隨時呈請引 見分發均歸截取班補用願捐指省者聽至原奏請將現任候補一律截取外用之處無論候補人員無俸可計卽現任中未經俸滿並俸滿而 京察三等以及從前業經奉 旨內用或奉 旨外用及仍回原衙門行走之員均應不准保送以示限制而昭區別

一原奏稱 盛京裁缺宗室主事斌瑄候補主事實賢以直隸州知州分省補用業經吏部遵照辦理京內實缺候補宗室各員同爲一律懇請援照裁缺成案准其保送外用等語查京員之有分發如漢郎中科道暨漢典籍中書十五項小京官則於截取記名後滿蒙漢軍漢主事則於保送 記名後多本係例有選班之人獨漢員外郎絕無出路未免向隅光緒二十五年經御史熙麟奏請始准酌照主事 京察等第及歷俸年限保送知府嗣因滿蒙人員升途日狹其郎中員外郎又比照漢員外郎保送章程一體以知府分發均專歸外補惟是 記名人員旣不願就分發而保送分發班次又不如截取分發之優則亦仍多觀望三十一年御史高潤生遂有實缺部屬降等歸選之請經臣部議令此項人員准其分別改就地方正印分發各省與各項人員相間

插補而候補部屬之願改就者亦先後議准各照底官以對品佐貳保送計除截取外所有保送一途滿蒙漢及內務府司員均已畫一辦理特尙未有宗室是年 盛京更定官制五部裁撤之滿蒙宗室各員願外用者均准作爲俸滿各按升階照俸滿保送例分發於是又有宗室保送分發之案而該處候補宗室主事寶賢一員亦經宗人府咨准臣部同以直隸州知州分省歸候補班補用與實缺主事未有區別今原奏遂欲援爲成例推行於京內實缺候補宗室不知裁缺不獨宗室亦不獨主事一官使未裁缺者皆可比照則即實缺與候補又不免因計較而生缺望將紛紛陳請安有已時擬請嗣後宗室除主事保送銓選分發本祇一例並現議准其 記名升選道府人員照例並准其分發外如五品宗室歷俸未滿六年而已在三年以上或本任內曾經 京察列入一二等之員應各准其擇尤保送各以應得之項分發省分專歸候補班補用其實缺人員降等改就者應查照滿員歷俸年限理事官郎中准其改用直隸州知州副理事官員外郎准其改用知州經歷主事准其改用知縣均俟各該衙門保送引見分發到省後無論何項缺出用過一人後即插用此項人員一人不積各項班次之缺非軍務省分亦不准聲敘人地不宜其候補人員對品改外者應俟本衙門奏留後理事官郎中副理事官員外郎准其改用同知經歷主事准其改用通判亦俟各衙門保送引見分發到省後專歸候補班補用願捐指省者亦聽

吏部奏變通御史傳補辦法摺

先經臣部具奏保送御史應否考試摺內聲明新章保送人員既不復拘翰林部屬並內外衙門所有分班按俸傳補各舊例應行變通俟 命下後再由臣部分別奏明辦理等因於本月初八日准軍機處片交奉 旨著照例考試欽此臣部自應欽遵辦理查考選定例翰林部屬均係分期考試遇有缺出各按 記名先後分班輪補翰林用竣卽咨取各衙門專保翰林部屬用竣亦咨取各衙門專保部屬總以每缺各數帶領三人爲斷今新章不惟其官惟其人凡京外各員悉准保送並歸併一起考試是彼此列保暨被選之員多寡有無皆難預定卽或本屆仍數勻配而嗣後但有一項缺額將紛紛抵補轉費周章且外官之輪應帶領者若亦限以三人之數勢必有缺者一律開缺奉差者一律撤差均令在京守候亦殊不足以示體恤此分班之制不可復行者一又定章考試後初次引 見翰林照名次部屬照憲綱分別帶領至傳補時復行引見則各按俸次帶領順翰林之俸編修與檢討統較而部屬又須先論官階必郎中無人始傳員外郎員外郎無人始傳內閣侍讀其俸次較深之員外郎雖已在頂傳之列遇有在後之人升任郎中者仍應先儘帶領同一引 見而前後彼此互歧今新章京官自五品至中書外官自四品至知縣以及曾任實缺並曾經署事之候補人員俱准保送是此後各官品目既什倍於前而其中有有俸可較者亦有無俸可較者計每屆

記名人數率二三年而後用竣此二三年中升遷調補事理綦煩階資之轉換愈頻斯序次之推移亦愈不勝其鞅轄且外官調取須在數月之前交代所關補法尤不容不畫一此按俸之制不可復行者又一臣等公同商酌此次保送御史既經欽奉諭旨照例考試擬仿特科保薦考試之例按照欽定試卷名次帶領引見俟記名後通行宣示將來卽以記名之前後爲傳補之次序仍每缺帶領三人恭候簡用一員所有京外衙門憲綱及各員官階俸次但係新章准其保送之員概免比較以符朝廷立賢無方之意其外官名次在三名內者應卽開去底缺在京候傳三名外者暫令回省回任俟將屆帶領之時再行咨調開缺如實有經手要件未能依限赴部經該督撫奏明有案應比照御史轉科適值出差未能引見之例仍將該員職名列入單內一體聽候簡用無故遲逾者卽先帶領其次之員俟該員到部後再有缺出再行帶領至舊例考選各員漢員將次用竣滿員人數尙多此次各衙門遵章保送未分滿漢自應一律考試統俟記名後分別附於舊記名人員之後挨次傳補如舊記名人員祇餘一員卽專以一員擬補其俸次在前因丁憂未經傳補之員將來服滿到部遇有缺出亦先儘擬補仍各銜下詳細註明庶界限既清而責成自無可諉再御史記名後一切限制定例已極詳備無庸另立專章合併聲明謹奏光緒三十三年九月二十二日奉旨依議欽此

吏部奏酌擬變通小京官選補辦法摺

竊據中書科咨稱現出有中書一缺例應咨部銓選查本科額設漢中書四缺所有廕生以及捐納各項人員又師範科舉人中書紛紛到科當差者不下七八十員殊形滯溢請變通辦理仍行留補等因到部查中書科中書缺出定例一咨一留其咨缺雙月四選一升四選內廕生與捐納之人間用升班以知縣及直隸州州同論俸推升單月用一應補一捐納如無人缺歸升選各等語查上次中書科中書缺係屬留補此次例應歸選惟近年雙單月選班皆以各項候選無人連用推升現在廕生及捐納之科中書亦均未有投供之人例應仍用推升竊思升班一項多係俸深之員在外省爲熟手而在京缺則爲駢枝且調取交卸動需歲時於公事亦無裨益現在外官之應升員外郎主事並各項小京官者班次多已裁改僅鑾儀衛經歷翰林院典簿待詔暨科中書四項獨循舊章擬請將此四項外官升班一律停止其雙單月應選之員仍查照向例一咨一留如投供無人並聽各該衙門儘數留補以疏壅滯如此量爲變通庶材能不致投閒而銓選亦較核實如蒙 兪允卽由臣部知照各衙門按照新章分別辦理謹奏光緒三十三年十一月十二日奉 旨依議欽此

吏部議覆御史葉芾棠奏請限制應補知縣選班摺

本年七月十三日准軍機處片交本日御史葉芾棠奏服滿知縣選班太優各班輪選

無期亟宜設法疏通一摺奉 旨吏部議奏欽此欽遵抄交到部原奏內稱吏部銓政原分雙月單月而單月知縣一項除散館年分擁擠外平時插班祇有 特旨卓卽各項不過三四年卽可一周自海防鄭工開捐遇缺先鄭工先海防卽每班插入遂以五缺爲一小輪其大輪知縣非六七百缺不能一周以每年部中得缺七八十計單月祇得三四十缺非二十年不得一輪其丁憂服滿人員向歸應補班大輪選用二十年前部臣破格改章改爲五缺後准插一名已視各班爲優然尙未占盡各班選額癸卯夏間吏部忽又改章服滿知縣單月遇缺儘選於是各班靜候有數月而不得一缺者迄今五年大輪正班所選無幾單月之缺不啻全歸服滿人員而大輪各項知縣非五六年不能一周未免過於偏枯擬請 飭下吏部將銓政秉公酌裁丁憂人員以禮去官固當量爲體恤而單月選缺各班知縣過於擁擠亦宜設法疏通以昭公允等語臣等查應補知縣新章儘數選用致單月各缺盡爲所佔誠有如該御史所云者惟受病之源不在應補而在新舊例大花樣人員何以言之自捐例迭開每五缺均先用各例遇缺先四人始用各項一人其捐納之小花樣及勞績所保各名目復照正班額數先後插選於是單月知縣定例二十六缺一週者遞廣至五六百缺而猶未已而坐補卽用數缺等項諸不入輪次之內者按月多寡尤難懸定臣部前以應補一項曾任實缺與他項人員不同其先祇於五六百缺中輪選四缺其後亦祇於每缺用過五人後插

選一人較之初任之遇缺先人員雙單月均得先用者終有霄壤之別故輾轉定爲今制不獨體恤以禮去官人員亦所以抵制遇缺先也惟是應補人員各有原省卽各有先儘請補之望乃近年此項人員起復後並不呈請分發甚至十餘年前丁憂之員亦皆紛紛赴部候選其數旣漫無底止又遇缺先旣爲應補所壓則各項到班愈更無期皆係自然相因之勢今欲限制應補先當限制遇缺先旣限制遇缺先則各項插班花樣名目亦當酌加刪併而後正班人員始有實際尤有進者單月之輪次旣改則雙月亦不容獨仍舊貫此外道府同通直隸州散州知州等官皆須另定辦法而後足以昭畫一臣等自改訂官制以來先已督飭司員逐一編纂粗具梗概徒以事體重大繕表列說尙非旦夕所能藏事旣據御史葉芾棠奏請將應補知縣 敕下臣部秉公酌裁擬請自明年光緒三十四年正月起改爲三缺一小輪以一應補一遇缺先一各項相間輪用俟遇缺先用竣後卽統以應補人員抵補其各項大輪如何刪併之處容與雙月選法隨後另摺具奏如此先定大綱應補知縣暫時雖似減額日久仍占優數於體恤此項人員之意亦可不悖至該御史所稱各省丁憂縣缺雙單月並出亦宜雙單月並用等語是則意在限制應補轉不啻愈無限制自應毋庸置議謹奏光緒三十三年十一月二十二日奉 旨依議欽此

吏部奏明保人員准其接連選用片

再查定章道府至州縣等官如先經捐納復保薦奉 旨以原官選用及以原官卽選之員均歸於雙單月各積各缺俟各項輪用班次用過五人之後選用一人其同班人員並不得接連選用等語本年十二月十一日准軍機處片交軍機大臣面奉 諭旨此次驗看州縣事實列入最優等之選用道員選用知府在任候補直隸州知州江蘇銅山縣知縣李普潤著在任以道員儘先選用欽此臣等查道員本非知縣應升之階此次李普潤以捐納雙月候選道蒙 恩給予儘先選用字樣核與明保人員先經捐納奉 旨以原官卽選者情事相等惟明保不必有事實而最優等保得諸考驗若不量加區別亦不足以勵將來臣等公同商酌擬請嗣後此項人員無論捐保道員暨捐保知府但奉 旨以原官卽選或儘先選用者均歸於不論雙單月是否積缺一併計算五缺之後選用一人不積各項班次之缺到班時除坐補卽用截取人員仍先儘銓選外如輪用此項人員應無論同班若干員並准其接連選用以示優異而昭畫一理合附片陳明謹奏光緒三十三年十二月二十四日奉 旨依議欽此

步軍統領衙門奏變通題補員缺章程摺

竊准吏部咨稱各衙門額設選缺均一律改爲題缺其補缺輪次改爲一酌題一序補奴才等伏查各部院額設郎中員外郎主事各缺皆係題缺少而選缺多以多數之選缺均改爲題缺而補缺輪次一酌題一序補是各部院題陞之員較前疏通誠以按資

序補得人較難量才酌題得人或易故略寬題陞之途以期得人而理有裨公務吏部新章殊爲妥協惟奴才步軍統領衙門額設郎中一缺員外郎三缺主事三缺共七缺內郎中一缺員外郎主事各二缺係額設題缺其員外郎主事各一缺係額設選缺題多選少與各部院題少選多情形不同今以少數之選缺改爲題缺而補缺輪次若照新章一酌題一序補是題陞之員反形滯塞實與吏部改章之旨不合且查奴才衙門額設司員只有七缺爲數較少司員稍不得人辦公勢必棘手從前題缺居其多數每遇應題缺出奴才等擇其熟於公事才具較長者酌量題陞而缺少事繁辦公尙虞竭蹶儻再拘守新章題陞序補相間輪用則按資序補者補缺轉速而熟於公事者陞途反遲若不查看情形酌量變通殊於公務關礙非淺擬請嗣後司員缺出改爲酌題二次序補一次其酌題之缺仍照部章以應陞暨各項候補人員一體酌量才具題補其序補之缺亦照部章挨次序補如此變通辦理庶於酌題序補兩得其平而於公務尤多裨益奴才等爲整頓署務辦事得人起見理合據實陳明謹奏光緒三十四年正月二十三日奉 旨依議欽此

度支部奏裁缺分部人員與本部資深人員一體較資補用片

再吏部新章裁缺分部人員遇序補之缺與本部人員相間輪用實缺無人卽將裁改候補之資深勞績人員各較各資相間輪用等語在吏部改章伊始原恐裁改各員其

中有歷資較深者一經籤分到部本部資深人員爲其壓班是以定爲各較各資相間輪用以期平允無如各部情形不同統計臣部滿漢候補學習司員不下四百餘人查此次裁改人員籤分臣部者計共四十餘員除實缺外其候補學習各員歷資較淺者居多若與本部人員各較各資相間序補到部不數年間裁缺資淺者可以全行得缺而臣部資深者轉致向隅上年八月法部以吏部定章窒礙甚多奏請將裁缺分部人員與本部人員一體較資分班補用等因奉旨允准欽遵在案臣部事同一律擬請援照辦理嗣後裁缺候補各員學習期滿六個月奏留如遇序補資深到班無論正途捐納均以從前奏留之日與臣部人員統較各資補用勞績到班亦與臣部人員勞績保案奉旨日期比較先後補用庶可兩得其平裁缺實缺人員到部六個月後其補用班次仍照吏部章程辦理如蒙俞允臣部即咨行吏部遵照謹奏光緒三十四年二月二十三日奉旨依議欽此

禮部奏變通裁缺人員補缺章程摺

竊前據吏部新章裁缺分部人員遇序補之缺與本部人員相間輪用實缺無人即將裁改候補之資深勞績人員各較各資相間輪用等語在吏部兼籌並顧原不欲裁改人員有礙本部人員升途是以定爲各較各資相間輪用以資調劑迺自疏通部曹以後資深者紛紛改外籤分各部者率皆歷資較淺人員統計臣部候補學習司員二百

餘人此次裁改籤分臣部者二十餘人除實缺外其候補學習人員歷資較淺者居多若與本部人員各較各資相問序補則不數年間裁改資淺者可以全行得缺現在僅逾一年裁改者已序補六員而臣部資深者未免缺望恐不足以資鼓勵查上年八月間法部以吏部定章壑礙甚多奏請將裁缺分部人員與本部人員一體較資分班補用又本年二月間度支部奏請援照辦理均奉 旨允准欽遵在案臣部事同一律擬請援照成案嗣後裁缺候補各員如遇序補資深到班無論正途捐納與臣部人員統同較資補用其勞績到班亦與臣部人員勞績保案奉 旨日期比較先後庶可兩得其平惟裁改實缺人員到部六個月後其補用班次仍照吏部章程辦理如蒙 俞允臣部卽咨行吏部遵照謹奏光緒三十四年十月初一日奉 旨依議欽此

又奏各項烏佈變通辦理片

再臣部上年改訂官制遵設兩廳八司一所專以實缺人員任事改制之初員缺概歸酌補均係量能授職故差缺相連尙無滯礙兩年以來業經遵照辦理惟現在序補之缺既專論資勞廳司之事又時有增減自應量予變通以收爲事擇人之效臣等公同商酌擬參仿度支陸軍郵傳農工商等部現行章程除參事郎中員外郎主事額缺仍遵照吏部酌補序補新章辦理外其各司所掌印幫掌印主稿幫主稿以及管股幫股各差使擬於實缺人員內不拘品秩酌量派充以專責成至候補人員如有熟悉律例

行走勤慎者亦擬一律派充各項烏佈如此變通辦理庶幾任用適宜於部務不無裨益謹奏光緒三十四年十月初三日奉 旨依議欽此

吏部奏擬改雙月並雙單月知縣選輪摺

竊臣部於上年十一月二十二日議覆御史葉芾棠奏請釐定應補疏通各項知縣選班案內聲明限制應補當先限制遇缺先擬自光緒三十四年正月起將單月知縣一項改爲三缺一小輪以一應補一遇缺先一各項相間輪用等因又查光緒三十二年十月二十六日臣部議覆御史徐定超請變通遇缺先選法案內奏明州縣佐雜遇缺先到班時先用正途及曾任應升者二人再用各項出身者一人等因先後奉 旨依議欽此均欽遵辦理在案本年正月分議選知縣各缺各項固大爲疏通卽遇缺先坐得三缺一一到班亦因之加速是此項人員在單月已占優數矣至雙月並無應補壓選計十缺且占其七臣等先以事例之行已數十年未便於在後之員獨加歧視併議更張惟查現在正途出身之遇缺先已將次用竣勢須專用異途若僅限制單月而不限制雙月亦與三十二年奏准變通之意未合竊思正途莫先於進士而進士截取知縣率十餘年到班一次其在新科進士入館肄業一經考列中等卽得比照散館班次儘數選用卽 廷試授職知縣之舉貢但在到省後下月所出之缺亦均得不論煩簡聽該督撫酌量題補獨此科分在前之員或先經歸班或由京職改就其中豈無績學

轉以限於舊例不能及時自效揆諸事理本欠持平臣等公同商酌近年捐保兩途屢煩 聖明致意而地方自治及學生收效均尙待他年是今日仕途與其多用一俊監實不如多用一科甲或尙收拔十得五之效應請將雙月知縣從本月起除坐補卽用及數缺人員不計外亦改爲三缺一週卽以一進士一遇缺先一各項相間輪用俟嗣後進士用竣再酌量奏明以截取揀選舉人接選如此則正途之氣日伸卽遇缺先人員亦必爭自濯磨以無負 朝廷曲成不遺之意而雙單月選法亦同爲整齊畫一此外道府同通直隸州知州散州知州各官均應以次類推不論雙單月每到班時均先用遇缺先一人次用各項一人相間輪用其各項中應裁應併之處并佐雜鹽務等官班次仍俟分別釐定後再行另摺具奏謹奏光緒三十四年二月十一日奉 旨依議欽此

又奏查銷雙月進士知縣本班並停止單月進士知縣銓選片

再查向例知縣雙月用進士五人繙譯進士一人新進士二人單月用進士四人繙譯進士一人新進士二人其由部屬中書改就知縣者仍歸進士原班銓選由散館部屬改就知縣者歸於進士一班之後儘數選用又新章進士知縣雙月到班捐納進士先勞績進士先勞績進士後各班插用五人後各接用正班五人單月到班捐納進士先勞績進士先勞績進士後各班插用四人後各接用正班四人歷經遵辦在案現在雙

月知縣既請以進士與單月應補對待計進士三缺得一與從前定有額數者不同應請將原定新增各項進士知縣本班查銷繙譯進士即歸併滿漢文進士班內一律辦理其選用次序應以散館部屬改就者爲第一項榜下 欽點部屬中書改就者爲第二項奉 旨歸部銓選者爲第三項均按科分甲第名次各項各選一人週而復始如已捐有本班先暨勞績保有本班先本班後花樣人員將來到部仍照章按各該員捐案卯次暨保舉奉 旨日期各於本項先後插用一人俟再用本項時再先後各插用一人並請將單月進士各班一律停止銓選以免偏重其新進士一項近年久無其人除本年正月分業經照例將舉人抵選新進士一缺下次應再儘舉人抵一缺外以後即與雙月新進士名目一併刪除其餘各項輪用班次單月用至拔貢主事改就人員雙月用至特用舉班後人員仍應跟接辦理至庶吉士散館 欽用知縣並學部奏准比照散館班次選用之員仍照例章歸於即用班內不積進士之缺統俟奉 旨後通行各衙門各省一體遵照謹附片具陳謹奏光緒三十四年二月十一日奉 旨依議 欽此

又奏知縣以上應補各官均照知縣一律辦理片

再應補知縣既與遇缺先各項相間輪用所有知縣以上道府同通直隸州暨散州知州服滿赴部候選者未便兩歧應請嗣後均照知縣一律辦理至服滿改指他省候補

人員前經河南巡撫陳夔龍論奏臣部業已定有限制奏明在案其仍回原省人員本係以禮去官且爲該省熟手自應仍照京員收缺之例先儘補用以示區別理合附片一併具陳謹奏光緒三十四年二月十一日奉 旨依議欽此

吏部會奏遵擬改選章程摺并單

光緒三十四年五月十五日內閣奉 上諭國家根本惟在民生而養民教民之官以州縣爲最親其責任最爲重要凡撫字催科聽斷緝捕悉萃於牧令之身一邑數十萬生靈於斯託命加以各項新政待舉備極繁難非才力優長素經歷練不足以副是任吏部職司銓選自例章繁密僅以班次資格爲定衡大失量能授官之本意邇來保舉捐納冗濫甚多治理民情多未明達檢查法律亦不能通解即係正途出身於吏治亦尙乏體驗豈能措置裕如此等人員專憑年資入選一旦任事大率聽命幕友縱容丁胥百弊叢生小民深受其害聞各省選缺州縣驟膺外任不諳吏事者十居七八該管督撫格於部章日久不能不使之到任及到官債事雖加撤參地方元氣已傷其爲害於國計民生者甚鉅嗣後州縣兩途著將部選舊例限三個月後卽行停止所有各班候選州縣由吏部分別查明會同軍機大臣迅速妥擬章程具奏請旨頒行其應選州縣依次分發各省作爲改選班外省原有各項候補班次輪次亦應酌量刪減歸併凡改選人員到省後督撫率同三司量其才性試以吏事或派入法政學堂分門肄業並

大清新法
須勤加考察除有差人員隨時接見外其餘各員每兩個月必須傳見一次三司按月傳見一次詳細考詢其才識學業能否造就有無進益如有糊塗謬劣不通文理或沾染嗜好或年力就衰等情均即咨回原籍扣除本班其應補人員各該督撫務須一秉至公認真甄核不得瞻徇偏執敷衍遷就總期親民之官歷經試驗嫻習治理一洗闒茸倖濫之習用副朝廷察吏安民之至意欽此欽遵到部臣等伏查部選人員不獨州縣而州縣爲親民之官尤宜加意慎重僅憑班次資格誠未盡善今 朝廷特發 明詔飭將州縣部選尅期停止而仍留改選之班以待應選之人俾各省得自爲甄擇此誠整飭吏治之一端也惟是旣云停選則改選一項自可暫而不可常而分發之多寡應卽視此以爲衡蓋必選人用竣而後各缺可以儘數留補至各缺儘數留補而後督撫綜核之法乃得以行乎其間而一切升調遺病故休雜缺等項名目亦可由漸而剔除臣等謹將停選後事宜遵照 諭旨悉心商酌撮具大要八條另繕清單恭呈 御覽至外補班次雖亦亟應歸併但與此項選班尙係兩事以及各項未盡事宜容由吏部另行分起具奏再此摺係吏部主稿會同軍機處辦理其部選州縣應遵 旨卽於八月分截止合併聲明謹奏光緒三十四年八月初七日奉 旨依議欽此

計開

謹將會同擬定州縣改選章程八條繕具清單恭呈 御覽

一分發應以投供註冊爲斷而酌寬期限也 查分發一途向係專爲外補人員而設今既以爲改選班公共之名則界限不可不分現在選册所列從前捐有選班並歷年勞績議敘報効等項保有選班者尙難悉數若人人聽其自便則改選之員勢必多於外補之員而常捐分發將同虛設恭繹 諭旨此項分發雖以應選人員爲斷但辨別是否應選又當以供狀圖結爲斷蓋在部候選者向憑投供而在任候選者向憑註冊(其底官原係應升州縣者不在此例)未投供未註冊之前其人有無各項障礙事故並短交銀兩等情吏部無從一一查悉雖以次數在前之遇缺先人員不得遽謂之應選已投供已註冊雖班次極絀如捐納雙月及議敘三班後等類花樣亦不得謂之不應選(投供註冊人員亦有不合例者亦不在此數)現查七八月分投供州縣統共一百八十餘員人數無多停選以後自應照實在員數分別省分大小配簽勻分各省惟查從前投供人員有間斷至一年以外再行投供者例應另取圖結重扣選限今州縣投供截止在卽此項人員或因事故羈身猝難赴部於情不無可憫擬請稍寬其格但在光緒三十一年八月以後供卷有名者無論間斷若干時日應准其隨時聲明一體歸入改選班其在任候選無論原扣註冊及不扣註冊之員均應令開缺離任赴部驗看分發始歸入改選班願任有京任外任之別交卸難易復多不同亦應自停選之次月起給予期限二年限內赴部仍照原班辦理

逾限卽祇准照常捐分發人員辦理或有保加在任選班一經離任例須扣選者如果事屬因公查其離任在停選之前應照投供間斷之限在停選之後卽照現任赴部之限分別核辦如此則操之既不過蹙而分發改選與分發外補辦法亦不致稍有牽混矣至實缺離任例須捐交銀兩此項合例改選人員自應一律免其報捐以示區別如有他項應交銀兩仍隨時知照度支部分別核扣各項交代未完及參罰案件未結該省督撫亦不得遽行代請開缺

一 改選之缺應仍按雙單月輪用而酌加變通也 查雙單月各有輪次如外省升調

遺病故休分輪之比有兼占兩輪者有祇占一輪者驟行歸併勢多窒礙且按省分發則項選之員所分之省不必卽行見缺而見缺之省或並無項選之員則於事理已不能適均若復將雙單月混合爲一勢必本應到班者轉多缺望而本不應到班者反可捷獲似與改選之名義顯有未符擬請由吏部將雙單月輪次表通行各省註明現在雙月用至何班單月用至何班其分發人員之原歸何月及班次先後隨時彙案或專案分別知照各省各於部選之班之後查係何員何項班次最前卽作爲該省項選之員雙月班次最前者雙月缺出先儘擬用單月班次最前者單月缺出先儘擬用如察看人地不宜准其以次酌用在後之員極之雙月無人可酌則專儘單月人員單月無人可酌亦專儘雙月人員俟雙單月俱無人之時再查明改選

班分發已未限滿分別核辦至到班未經擬用之員但非不堪造就咨回原籍者遇有相當之缺仍准比照另補班例各按雙單月隨時插選如此則序資與量能並行不悖而無論頂選與非頂選人員亦羣將爭自濯磨矣

一數缺數班人員應另定辦法也 查選例繁密至今已極如升班兩班後用孝廉方

正進士兩班後用進士教習舉人兩班後用 咸安宮 景山及八旗及各學各教

習均當分別出身酌量歸併並例內一切抵班均予查銷外尚有如 特用五缺(雙

單月統計無論是否積缺五缺後用一人)捐資五缺(雙單月各計輪用各項班次

五人後用一人)應補十缺(俟服滿應補用過十人用一人專歸單月)等類之數缺

選用勞績遇缺(雙單月各計正班兩班後用一人)勞績五缺(雙單月各計用過勞

績遇缺人員五人後用一人)議敘一班後兩班後三班後(係舉人議敘者扣舉人

正班係筆帖式議敘者扣筆帖式正班均專歸雙月)等類之數班選用均無一定

位次就中祇 特用五缺一項得缺較易自可仍照舊章辦理其餘到班滯速雖不

一致而此後專指一省之缺與以前統計各省之缺其難易之勢顯然則用法亦應

預爲擬定查應補十缺人員本准分發歸候補班補用如該員願歸外補應聽其自

行呈明照例分發至改選次序應以捐資五缺爲第一項勞績遇缺爲第二項應補

十缺及勞績五缺爲第三四項議敘一班兩班三班後爲第五六七項項同者均分

別奉 旨先後歸於各省雙單月有班人員用竣之後按項酌用或不願改選願報捐分發者將來應歸外補何班之處容另行核議

一改選人員得缺後應先令試署也 查咨選之缺隨時而有改選人員甫經到省上司尙未及試驗或已見缺既無懸缺不補之理亦無日久不令到任之理是與部選之弊亦無大殊擬請嗣後此項人員無論到省久暫但輪用到班者均由各省題明先令試署俟試署果能稱職再奏請補授如不稱職卽撤回作爲過班另以其次之員如前遞署其試署期限若干應由各督撫就缺分之衝僻道里之遠近隨宜酌定一併聲明立案試署期內非實有縱弛等項劣跡亦不得輕易撤回致滋屈抑此係就本任爲試驗之法較之僅談學業似更切實且旣先試署則督撫進退之權仍自餘而於定章亦不致扞格至例應試俸之員如果將來稱職實授其試署日期應准其一併計算應扣歷俸者亦以此類推

一改選之缺部中知照及各省題署均應另定期限也 查銓選定例吏部於按月二十日截缺議官掣籤以至引見補授通不出半月之內卽新章將截缺提前所增亦止五日至外省留補之缺例須守候部中知照始得請補請署或以揀員未定正限之外復准展限比及交議覆奏往往題准一缺有遲至經年者今部選改爲外選所有輪應咨部及一切在部所開之缺亦須俟部中截缺知照到日始得擬選其

餘題請核覆依限類推不能不多需時日雖傳見考察本非旦夕可竟惟此項班次既准酌用則懸缺過久亦不免生人徼倖之心查改選各缺本無應升應調應補之分且人數無多其期限自不當與外補一例擬請外補扣缺仍照例於次月初五日行文外所有嗣後改選截缺應卽定於當月二十日行文無論文到在於何月仍各按原截缺之雙單月分班擬選如該省同月出有兩缺或三四缺並由部中掣定先後一併知照上月之缺未經擬選概不得先選下月之缺至業經歸入改選班人員雖未必同時分發但係同屬應選其到省之後亦別無供限可扣但使部文未到以前續經繳照到省查係班次合例及才具可用者卽均准其一體擬選其各該省於改選員缺統限文到後一月內卽行擬定具奏無論所擬係按班輪用或酌量委署均令隨摺切實聲明此項題缺如係奉 旨交議吏部亦於一月內依限具覆或僅奉 旨交部知道吏部俟閣抄到後查無別項不合例事故卽遵 旨行文准其赴任實係不合例者再聲明奏駁如此選補分定期限庶改選一班可以速竣而官制亦漸臻於統一

一 改選人員所分之省應毋庸按缺配籤也 查現定新章州縣分發願歸近省者准其呈明各以原籍界連省分配籤惟腹地各省界連省分多而沿邊各省界連省分少故向來告近率多腹省之人而邊省之不願統分者又往往就腹省中捐指一省

以取道里適中勢亦不能不聽其便現在改選人員辦理分發計除告近指省兩項人員外恐可配之簽所餘無幾則各省應分人數多寡斷不能適均擬請分發之時如有一二省竟至缺員無簽可配者即將該省之缺暫行統歸外補倘續有改選分發人員但在停選後二年限內願捐指該省或掣分該省應俟該員到省後再將例應部選之缺分別知照聽該督撫酌用如人地不宜亦仍留歸外補俟再有應選之缺再行酌用至咨缺改補應歸外省何項缺輪之處統由吏部於歸併外補班次時一併核定具奏

一未投供註冊之遇缺先等項人員應准其補交班次銀兩也 查捐納大小花樣候選人員如以卯次在後願改歸外補者從前戶部定章除飭交免試用分發兩層銀兩外其原有花樣仍須按八成四成底數再分別減半加捐始准將花樣帶於外省現計停選以後所有未投供註冊之遇缺先等項人員自不便歸入改選班但欲捐歸外補則此項捐改之章亦早經戶部停止是花樣無論大小進退皆不免失所查勞績保舉補缺後人員捐免補本班暨參劾降調人員捐指項分發者皆有加三成准歸候補班之例不在停止之限今此由選改補人員既已無班可歸自應准其一體加捐仍以原花樣帶於外省惟因停選而待捐與從前自願改捐者情事有別若不將舊章應加成數酌量核減亦尙不足以示體恤至於核減以後仍有無力遵繳

者卽按其原捐銀數折改相當班次或班次無可折改亦准其酌抵分發銀兩凡此各端統應俟本案奉 旨後由吏部移咨度支部分別詳細核議其由原捐花樣捐改較優之項及業已分發到省之改選人員均不得援以爲例

一 停選改選以後京外勞績議敘州縣應改定班次也 查從前獎敘各官雖原請有不論雙單月字樣如欲捐歸外補尙須補交三班銀兩然後遞捐分發且僅歸試用班補用其分省及留省字樣無論何項勞績均不准奏保已到省人員尋常勞績亦不准保歸候補班獨候選佐貳原保俟得缺後以知州用或知縣用者一經選缺到省卽可照章作爲該省之候補班州縣此項人員核其勞績或並祇尋常局務而既占最優之班復壞常捐之法本屬近於倖濫今改選分發人員既有限制則部選名目自不能再保但恐各省因此於應保各案輒將歸部改爲分省選用改爲補用等字樣則名器從此益輕而補班亦愈形擁擠擬請嗣後凡向保以州縣選用或不論雙單月選用及儘先選用者均改爲以知州或知縣俟該員指分到省後試用及試用班先用其候選佐貳除從前已保有補缺後官階各員暫仍其舊外嗣後如有照此請獎者亦應改爲俟補缺後以知州或知縣試用仍令補繳分發銀兩始准作爲試用到省其實保軍務洋務出力人員從優保舉分省留省者應請明降 諭旨量予照准如係交部議奏之案仍行議駁此雖停選以後之事而選事之終卽爲補事

之始同係親民之官自應預爲籌及一併奏明以免顧此失彼之弊

吏部議覆直督楊奏變通直州同州判要缺補法摺

內閣抄出直隸總督楊士驥奏直隸州州同州判要缺請以舉貢截取揀選就職人員酌量試署一摺光緒三十四年七月十一日奉 硃批吏部議奏欽此欽遵到部原奏內稱竊查定例佐雜等官惟咨報要缺於現任揀選調補其餘悉歸部選其有 命往以佐雜補用及留於該省候補凡係應歸候補班前候補正班並曾經咨署得缺未經實授緣事離任仍赴原省者亦准酌量揀選補用署理如有將初任各項試用咨請補署者俱不准行又直隸州州同州判等項缺出本班無人准以大挑舉人借補歷經遵辦在案本省直隸州州同共二缺內要缺一選缺一直隸州州判共五缺內要缺二選缺三此兩項補缺辦法事同一律員缺既少各項試用人員照例又不准請補要缺而選缺又分一咨二留新章分發截取及揀選舉人直隸州州同並五貢就職直隸州州判人員來省稟到者日見其多此後源源而來尙不知凡幾即使本班輪補尙慮遙遙無期若仍循大挑借補之條則本班中得缺益難不無缺望此項人員均係正途出身非捐納試用人員可比自應設法疏通以免擁擠臣督同藩學臬三司悉心核議現在科舉已停大挑舉人一班不再分發日少一日擬請嗣後遇有扣留直隸州州同州判選缺仍照例章分別序補如遇要缺應調及候補委用各班無人或有人不合例州同

卽用截取及揀選舉人員酌量試署州判則以五貢就職人員酌量試署一年期滿另請實授如不勝任卽行撤回另行揀補不再以大挑舉人借補如此變通辦理於挑班無甚窒礙而截取揀選以及五貢就職人員出路稍寬得以一職一官及時自效庶免向隅等語臣等查試用人員向不准補署地方要缺惟大挑試用知縣遇有要缺直隸州州同州判等項缺出准其借補歷辦有案該督以截取揀選舉人及五貢就職本項日多請變通成例准其分別試署不再以大挑借補同屬正途自可准如所請惟查臣部三十二年奏定新章截取舉人之以直州同用者本有准其酌署要缺一條而揀選舉人祇補選缺其選缺輪次又須俟截取人員用過二人後始用一人良以年資不同則閱歷亦自較淺今該督請截取揀選舉人一體酌署要缺雖爲地擇人原可不拘但亦應先儘截取人員請署或截取人員不宜始准聲明遞用揀選人員庶與定章限制之意可相符合又五貢就職例祇恩拔副貢准就直州判其歲貢優貢之以按經歷等項分發到省者仍不得以人地相需爲詞率請借署以免牽混以上係要缺中應行聲明之辦法也抑更有進者該督原奏係專在變通要缺但所稱候補委用各班無人准以大挑舉人借補等語例文自指選缺而言竊思各省要缺直州同合直隸江蘇陝西甘肅四省計之共祇五缺要缺直州判合直隸江蘇山東山西河南甘肅湖南七省計之亦共祇八缺若僅如該督所議恐於疏通之數仍屬無幾卽未設要缺之省亦尙

不免向隅自應將向准大挑知縣借補之選缺並新章截取揀選知縣准抵補大挑無人之缺一併改以舉貢各本項分別借補其借補次序舉人亦先用截取二人再用揀選一人貢生亦先用恩貢一人次用拔貢一人再次用副貢一人餘各正班到班仍悉照定章序補至府屬州同州判府經歷縣丞四項並鹽大使一項歷來辦法亦均與直州同直州判相同而近年此五項分發舉貢人數視直州同直州判尤爲倍蓰並請將大挑知縣截取揀選知縣佐貳借補之例一律停止亦毋庸再以本項人員抵借嗣後除要缺並准該督撫酌量外如遇選缺出時候補委用捐納議敘各班無人即徑行過班庶現時考試就職掣用及指項之員得缺較易其大挑應行輪補之首領各官內布大使一項雖亦有截取揀選人員應各暫仍其舊統俟大挑用竣後再行歸併辦理此又原奏所未請勢須推廣及之者如此分別變通於舊例新章均無窒礙而疏通亦可收實效如蒙 兪允除知照直隸總督外應由臣部通飭各省一體遵照謹奏光緒三十四年十月初八日奉 旨依議欽此

法部奏酌擬七品小京官及八九品錄事官補缺章程摺併清單

竊臣部改訂官制奏設七品小京官二十六缺八品錄事五十三缺九品錄事三十缺分隸兩廳八司一所以備繕寫奏摺供給各項差使之用並聲明新設之缺酌補一輪後遇有缺出分別輪次補用等因奉 旨允准欽遵在案查小京官錄事新設各缺酌

補已及一輪嗣後按輪補用若不明定章程何所遵守從前小京官到部者祇有拔貢一途現在有優貢小京官考職小京官奏調小京官錄事一項有筆帖式改委者有札委到部者出身各有不同補缺自難一致且由九品錄事升八品錄事由八品錄事升小京官由小京官升主事一切辦法尤宜注意臣等悉心參酌謹擬章程八條繕具清單恭呈 御覽如蒙 俞允臣部移咨吏部遵奉施行如有應須變通之處再當隨時奏明辦理謹奏光緒三十四年十月十六日奉 旨依議欽此

謹擬七品小京官及八九品錄事官補缺章程敬繕清單恭呈 御覽

一拔貢小京官仍照向章辦理其未經作爲實缺小京官之前遇有各司額設小京官酌補缺出亦可選擇才能擬定正陪奏補考職優貢兩項小京官以及滿員之拔貢考職優貢小京官均擬一律照辦其奏調人員及由八品錄事官升補小京官者嗣後無論滿漢只准捐免試俸均須扣滿歷俸三年方准作爲額外主事

一奏調人員以小京官候補者仍照前次奏明辦法遇有相當之缺酌量試署三個月果能勝任再行奏請實授

一小京官見缺分爲酌補序補輪次擬不分滿漢遇酌補之缺以拔貢考職優貢廩生捐納及奏調人員暨八品錄事官酌量才能擬定正陪請補如係奏調人員仍照第二條章程辦理遇序補之缺係拔貢考職優貢廩生捐納暨奏調人員統以到部日

期係八品錄事官以委用日期比較升補

一實缺滿小京官遇序補主事第二缺第十八缺出以保列一等之員比較奏補日期升補如遇酌補之缺選擇才能酌量請補

一實缺漢小京官歷俸奏留作爲候補主事後係拔貢考職優貢三項歸入主事第四缺第十六缺兩輪內與進士廕生較資補用係奏調及由八品錄事官升補小京官人員如舉人及拔副優貢出身者添入主事第八缺序補輪內與進士舉貢廕生之捐納人員較資補用如附監出身者添入主事第二十缺序補輪內與各項捐納人員較資補用如遇酌補之缺選擇才能酌量請補

一八品錄事官見缺分爲酌補序補輪次擬不分滿漢係酌補之缺以候補八品錄事官或實缺九品錄事官酌補一人係序補之缺以實缺九品錄事官較資升補一人再以本部裁缺及各衙門裁缺人員品級相當者較資連補二人再以廕生及各項班次候補人員品級相當者較資補用一人再以劄委候補八品錄事官較資補用一人

一九品錄事官見缺分爲酌補序補輪次擬不分滿漢係酌補之缺以候補九品錄事官酌補一人係序補之缺專以本部及各衙門裁缺之品級相當者較資補用

一劄委八品錄事官應以到部當差之日起扣滿三年九品錄事官應以到部當差之

日起扣滿一年六個月遇酌補各缺始能酌量補用遇序補各缺始准入輪其由筆帖式改爲錄事官者仍照舊章辦理

吏部奏酌擬傳補滿御史辦法摺

查臣部變通傳補漢御史章程內開新章保送御史既經欽奉 諭旨照例考試擬仿

特科保薦之例按照 欽定試卷名次帶領引 見俟 記名後通行宣示將來卽

以 記名之前後爲傳補之次序仍每缺帶領三人恭候 簡用一員所有京外各衙

門憲綱及各員官階俸次但係新章准其保送之員概免比較又舊 記名人員祇餘

一員卽專以一員擬補各等因光緒三十三年九月二十二日具 奏奉 旨依議欽

此欽遵辦理在案今查滿洲 記名御史舊例中僅有玉春一員三十一年九月遵

旨考試 記名尙未傳補臣等竊維此項 記名御史一切考試保送悉照漢員辦理

核與滿員舊例迥不相同若於傳補時仍以官階俸次爲傳補先後殊不足以昭畫一

擬請嗣後遇有缺出除宗室人員向由宗人府辦理應仍照舊外其滿洲新舊 記名

各員卽按照臣部奏定變通新章以 記名先後爲傳補次序以期仰副 朝廷因時

制宜融洽滿漢之至意再蒙古御史缺出亦擬仿此辦理謹 奏光緒三十四年十二

月十九日奉 旨依議欽此

調用

外務部議覆直督袁奏變通外部及出使人員章程摺

光緒二十八年三月二十九日准軍機處抄交直隸總督袁世凱等奏交涉重要亟宜變通外部及出使人員章程一摺奉 硃批所陳甚是著外務部查照辦理欽此欽遵到部臣等竊維臣部爲外交總匯方今列強環伺事務紛乘舉凡約章之得失儀文之輕重路礦商稅之利弊教案疆界之是非無一不關涉實不僅出使一途而使事亦相爲表裏茲查該督等所奏大致以外務部司員與出使人員互相調用令其出入中外兼資閱歷以期得人分任應付咸宜洵爲整頓部務慎重使才之要義臣等忝膺重寄無補時艱仰荷 聖明指示益當殫竭愚慮切實講求就該督等原奏參酌中外事宜妥籌辦法敬爲 皇太后 皇上陳之原奏內稱嗣後外務部司員各缺由出使各大臣在參贊隨譯中精選久在外洋者保送外務部考察充補不敷由沿江沿海各督撫精揀曾經出洋之人或游學或學生一體保送各節臣等查政務處會議臣部章程分設四司每司設郎中員外郎主事各二員並各定額外行走六員以後司員由各部院衙門保送考試每次考取記名以二十員爲度遇有額外缺出按次傳補現在京師大學堂已奏設仕學館各部院人員研求講習將來照章甄拔必不乏可用之才惟取人之途不妨從廣嗣後參贊隨譯各員如有久在外洋熟諳交涉之員京官係郎中員外郎主事申書外官係府廳州縣均准由出使大臣出具切實考語保送臣部考察錄取

奏請 記名與各部院人員相間傳補未取者仍以原官用其曾經出洋之人或游學或學生亦准由各督撫保送惟須得有各國高等學堂卒業文憑再由臣部考驗錄取挨次傳充繙譯著有勞績亦可遞升主事未取者仍發回學習至臣部司員缺額有定若本署人員無疏通之路則保送人員亦無傳補之期擬請於每屆 京察 記名人員外照各部院定例將實缺郎中員外郎保送知府主事保送直隸州均分發沿江沿海洋務省分補用以資激勵至臣部甄別司員章程如有不諳交涉者咨回原衙門行走此項考取到署人員如不得力仍應咨回原衙門原省照章一律辦理原奏又稱使館參隨各員缺由外務部精選品端學優能通洋文之司員前往充補不敷暫准用翰林部屬府廳州縣通洋文願出洋者呈由外務部考察選派各節臣等查總理衙門章京派充隨使歷經奏准辦理有案政務處會議臣部章程亦稱郎中員外郎主事可備參贊領事隨員之選今請引申其例嗣後使館參隨應先由臣部司員內咨送出使大臣調充但臣部交涉繁重辦事需人勢不能概行選派如有不敷自可於翰林部屬府廳州縣中量加揀用惟准其自行呈請恐敢干進之弊應由各部院堂官各省督撫出具切實考語保送臣部考察奏請 記名遇有參贊隨員等差一體咨送出使大臣調充至臣部司員及使館參隨等向來辦理公牘均以漢文爲主故通知時務者有人而熟習洋文者尙少繙譯官職司傳譯又於漢文或非所長欲求兼貫中西此時殊難其

選惟有先擇年富力強才具開敏者俾之出入歷練俟將來兼通洋文者漸多再當酌覈調派原奏又稱使館參隨等員宜改實缺久於其任不准出使大臣攜帶調換使臣受代所屬各員照舊供職立限給假休息三載考績卓異遞升出使大臣有缺亦可於參贊中遴員請簡各節臣等查向章出洋參贊隨員三年期滿照異常勞績給獎其到差不能勝任者隨時遣撤回華均由出使大臣奏請黜涉誠以使臣遠涉殊方必須與隨使各員指臂相聯畀以舉察之權方獲贊襄之效但恐瞻徇遷就任使不得其人亦不免轉滋流弊是以臣部屢經釐訂章程限定各使館參隨員額一以節經費之虛糜一以冀用人之得當應請飭下各出使大臣嗣後隨使人員除由臣部選派外仍准照章調用惟須慎加遴選不得任意攜帶有逾定額其前任得力之員後任亦應接續留用以資熟手毋輕更換在洋年久立限給假休息本有定章仍應照辦定額之與專缺保獎之與考績名目雖異事實則同且使館視行省有別似可勿拘成例以後如有應行改章之處再由臣等察核情形奏明辦理至曾充參贊洊膺使職者歷來已不乏人如有才識超邁風節卓著之員一經中外臣工保薦應仍由臣部列入使才單內遇有出使大臣缺出請旨簡派似此量爲變通互相調用均與該督等所奏用意相符臣等惟當率屬所屬認真考究以期造就通才不獨備出使專對之需卽臣部交涉事宜亦可藉資羣策庶幾維持補救收效無形於大局實有裨益用副朝廷慎固邦

交策勵人才之至意謹奏光緒二十八年六月二十九日奉 硃批依議欽此

吏部奏釐訂各衙門司員缺項並奏調人員一律查核摺

竊臣部爲考核內外各官之總匯現在改定官制自不能拘於成例致多窒礙亦未便全不考察致同虛設查定例各部院司員缺額均分題選兩項選缺又分咨留兩項有留補留題咨選之別題缺專用酌補所以甄才品選缺參用序補所以敘資勞立法本爲周備今改設添設各衙門或各取專長或必資熟手勢難再拘定例臣等公同商酌量爲變通除外務部照舊辦理外擬請 旨飭下舊設暨改設添設各衙門所有額設各項缺分刪除選咨留各名目一律改爲題缺由各該堂官在各本衙門分別奏補以一缺按照官階班次酌量才具擬定正陪以一缺揀資俸較深暨勞績保舉之員分班輪補均先咨臣部查核咨覆後再行帶引請 旨補用惟各部選缺既議停改此外投供候選之捐納及勞績保舉部屬爲數尙多自應量予出路其捐納人員捐有花樣者擬卽簽分各部行走其有情願改外者捐納人員並准其呈明度支部將原捐銀數改獎保舉人員准其報捐分發以對品分省試用以示體恤至新設各衙門奏調人員原爲遴選眞才裨益部務起見自應仍行調用惟所調各員京員外官錯雜不一今日之因才器使意在得人將來之倖進取巧亦恐難免若漫無稽核似亦非澄敘官方之道擬請 旨飭下各衙門所有奏調人員一律將詳細履歷咨明臣部立案補缺時先期

行文查核除聲明實係才具出衆職事必需之員由各該堂官酌量奏補外其餘均以品秩相當者擬補庶階級無虞凌躐底官亦不致混淆此不過臣部多一考核而於各該堂官奏調各員亦毫無窒礙以期仰副 朝廷遴選眞才講求實際之至意謹奏光緒三十二年十一月二十二日奉 旨依議欽此

憲政編查館會奏限制京外各衙門調用人員及游學畢業生辦法摺

光緒三十三年九月初三日御史孫培元奏請凡留學生未經考試者無論內外大臣不得率請調用以市私恩而植黨援一摺經學部議覆此項限制辦法應由憲政編查館體察情形嚴定任官資格奏准通行等語欽奉 諭旨允准在案查東西各國任官之法皆分別等差明定限制非普通考試合格者不得爲判任官非高等考試合格者不得爲奏任官此外各衙門需用專門學藝另行設官者皆各有專條按照辦理成學者不必入官而當官者殆無不學故上收器使之效下絕躁倖之心政美吏清職由於此中國用人之制舊以科舉爲正途近日科舉既罷入官者自以學堂出身爲正宗凡專門高等學堂以上畢業各生累經考試奉 旨授職者固當與從前正途錄用各員一體升轉其未與學部考試給與出身者雖與奉 旨授職各員有所區別而既經畢業則其學力程度當不至全無心得現在各衙門推行新政需材孔殷如果確有所知或不免采訪調用然使漫無限制令未經考試各生與 廷試授職各員一體補用亦

斷非鄭重名器之道臣等公同商酌擬請嗣後京外各衙門人員除由考試錄用及照章分發到部到省者應各按向章辦理毋庸另訂章程外其奏調人員如原係實缺候補者准令以原官或改以對品及相當官缺分別奏補原係學習試用者應令於奏調後接算前資扣足年限奏留補用其未經分發僅係候選者應自奏調到差之日起概令當差一年後分別以原官或改以對品及相當官缺留部留省學習試用仍俟照章期滿後奏留補用其未經考試原無官階之畢業學生如確係在專門及高等各學堂以上畢業得有文憑者應由奏調衙門將各該生文憑咨送學部勘驗合格後再將該員奏調到差日期咨行吏部存案自到差之日起扣足二年在京各衙門准其分別保以主事或以七品小京官學習行走在外各衙門准其保以知縣試用仍俟學習期滿甄別後奏留補用此外僅有虛銜各員及文憑不合格曾入高等以上學堂未經畢業之學生准由各衙門隨時考選以八九品官委用除照章升轉外不得踰級奏保以示限制似此斟酌變通寬取嚴用庶使懷材者無廢棄之患而躁進者亦無速化之方似於行政用人不無裨益如蒙 俞允卽由臣館通咨京外各衙門一體遵守所有從前各衙門奏定調員補缺章程有與此項定章相牴觸者除奏調在前各員仍准各按原章辦理外其奏調在後者概令遵照此次定章不得再行援案另辦以昭畫一而免參差謹奏光緒三十三年十二月二十日奉 旨依議欽此

陸軍部奏嗣後奉 旨簡放他省不准奏調原省陸軍人員片

再各省新軍自奉 旨編練以來率已蔚成鎮協其所用之鎮統協統以次軍官及督練公所陸軍學堂人員均係選擇派充自宜令其久於職任以期訓練有成藉資熟手乃臣等近聞各省督撫一經奉 旨簡調他省往往將原省軍隊學堂及督練公所各項重要人員全數奏調隨赴新任繼其後者遂不得不另行設法羅致供差而新派人員賢否不一往往各行其是率意更張致原練已成之軍因而漸就廢弛殊於教練新軍之道大有妨礙臣等公同商酌擬請 旨飭下各省將軍督撫嗣後如奉 旨簡調他省所有原省鎮協標統以次軍官並督練公所兵備等處暨陸軍學堂總辦以下人員除軍務省分必須調赴前敵者准其奏明請 旨辦理外其餘各省均不准率行奏調隨赴他省該新任督撫亦不得將前任所派之員無故另行撤換以重軍事如蒙 俞允即由臣部通行各省一體欽遵謹奏光緒三十四年五月十七日奉 旨依議欽此

保獎

吏部議覆變通明保人員班次摺

內閣抄出光緒二十九年九月二十七日奉 上諭御史汪鳳池奏中外保薦人才冒濫甚多請加裁抑等語現在時事多艱朝廷求才若渴原期甄拔得人近來保薦各員

固不乏可用之才而瞻徇情面濫登薦牘者亦復不免嗣後內外臣工務當核實薦舉汲引眞才不得稍有冒濫以副 朝廷實事求是之意至所稱明保各員無論候補候選酌定班次各節著吏部議奏欽此欽遵抄出到部查原奏內稱爲政在乎得人而欲拔眞才須杜倖進近年以來中外保薦人材送部引 見者接踵而至其中固不乏出衆之材而才具平常濫登薦牘者亦復不少甚非所以勸人材而端士品也應請 明諭中外大臣保薦人材務須矢慎矢公不得仍前冒濫並請 飭下吏部將明保各員無論候選候補酌定班次與各班相間輪用無任一概佔先其有應繳捐免保舉及留省銀兩者應令一律照章補繳方准輪選輪補以昭平允而杜取巧等語查定例各省奉 旨發往或督撫題明留於該省候補者無論應題應調之缺令該督撫酌量才具擇其入地相宜者悉准酌量補用又欽奉 特旨以何項官員留省卽補及明保人員引 見奉 特旨以何項官員留省補用儘先補用遇有缺出悉准該督撫酌量儘先補用不積各項班次之缺又奉 旨卽用及奉 旨以何項官員儘先選用人員無論雙單月不入班次卽行選用又截取人員選班按照例定正額銓選外雙單月不積各缺無論何項班次是否積缺銓選二缺之後揀選截取一人又部選之缺輪應截取插選時先儘各項卽用人員銓選各等語臣等查各省明保人員引 見奉 旨賞給官階班次臣部歸 特旨班內遇有缺出准該督撫酌量補用是 特旨人員既經明保

大清新法
其才具能否勝任該督撫必灼見真知故遇題調要缺及留補選缺專歸該督撫酌量補用並非一任佔先自毋庸另定班次其明保引 見奉 特旨卽用卽選人員向係不論雙單月卽行選用該御史奏請酌定班次臣等公同商酌近來明保人員逐漸加多各項班次稍形壅滯惟究係 特恩擢用人員未便率議更張查截取人員資俸較深且係奉 旨記名若概令明保 特旨人員佔先未便向隅擬請嗣後明保 特旨卽用人員如與截取同時到班先儘截取人員用過後再用 特旨卽用卽選人員如此畧爲變通則 特旨人員不致統壓各班矣其由捐納勞績復經明保候補候選之員有應補交捐免保舉及留省各項銀兩臣部於該員赴部 引見時按照定例辦理謹奏光緒二十九年 月 日奉 旨依議欽此

兵部奏武職保案須先造履歷咨部摺

竊自軍興以來武夫健兒效力行間者每歲見仗多至數十百次每案列保多至數千百員名其不能造送履歷隨案咨部者勢限之也乃承平旣久各疆臣因案保奏之員往往遲至數年之久始將履歷送部當其奏保時係奉 旨俞允之案臣部欽遵註冊先行知照各原保大臣如奉 旨交部議奏並咨部核獎者臣部查照例章分別准駁議覆後知照各原保大臣均咨行飭造詳細履歷送部查核註冊此臣部歷年辦法也夫使其所謂官階果係應升之階則一奏一咨已可議結不致事後駁查始終糾葛以

致再奏三奏而不已乃臣部核其後來之履歷無論軍功銜翎頂戴多無底案卽由微員保至提鎮中間有漏保二三階者有虛擬補缺後升階作爲實官開保者有並無一階開列多案者雖經臣隨時行查奏請改獎縮底而該員弁等於其報効服官省分多俸得要差並有奏請補署官缺者蓋疆吏於員弁歸標投營既未細查其履歷及列保時各員弁任意開列又復不加詳考及至保奏經部議覆後卽以升階序補不知部中尙須調查履歷其核符者准以升階註冊不符者仍奏請遞改然其故皆由未能隨案造送履歷有以致之臣等公同商議與其改獎縮底更正於十數年數十年之後不如隨案查核明確再行議覆始足以肅戎政而杜弊端應請 旨飭下各將軍督撫大臣嗣後例應奏獎之員應由原保大臣查明該員弁等出身履歷調驗歷保獎札總以得其現在確實階級方准開保並將詳細履歷隨時咨部其奉 旨俞允著照所請獎勵者如查有官階不符之員應由臣部據實聲明請 旨飭下原保大臣查照覆奏交部議奏及咨部獎核之案卽由臣部先核履歷再按例章分別准駁如有軍務省分凡保軍功出力奏保咨獎員弁應予限六個月造具履歷送部再行核議其餘各項勞績不得援以爲例萬一有因輾轉行查未能造具全案人員履歷臣部應就其送到之履歷先行奏咨完結其未能造送者仍俟履歷到部續行核議惟臣部嗣後議覆之件既須先核履歷其奏覆咨覆之遲速亦視履歷之繁簡難易及其到部之先後分別議結合

併陳明謹 奏光緒三十一年十月初一日奉 旨依議欽此

政務處遵議各省武備學堂委員教習保獎章程並酌改各學堂保獎新章摺片附
竊臣等議覆前署湖廣總督端方奏武備學生請獎摺內聲明單開之教習委員請
飭下政務處會同吏兵二部分別覈議各省武備學堂在事人員將來請獎應如何嚴
定章程一併詳議具奏等因於本年三月二十八日奉 旨依議欽此查吏部歷辦成
案天津武備學堂及南洋水師學堂三年期滿請獎教習繙譯優等學生額數均以九
員爲率准其擇尤酌保一二員照異常勞績請獎其餘均按尋常勞績覈給獎敘兵部
覈辦天津武備學堂獎案亦祇准保數員是南北洋從前保案每案並學生在內文武
統計不過十餘員今該署督奏請武備學堂獎勵除畢業學生已另單列保外其單開
之教習委員等尙有十七員爲數較多惟從前保案保三年奏請一次此次湖北學堂
據稱自光緒二十三年設立今已七年之久學生畢業者七十五人與前辦各案不無
區別臣等公同商酌與其定以年限昭爲成例不若限以學生畢業人數俾昭覈實擬
請嗣後各省武備學堂均應俟學生畢業成就在六七十人以上咨送到京考驗相符
方准將在事人員請獎每案文武併計不得過十六員之數尤爲出力者准照異常勞
績酌保二三員其餘均按尋常勞績給獎其在事人員仍照向章先期咨部立案並於
開保時敘明各該員在堂年分造冊咨部以憑查覈現湖北畢業學生已令該督出具

考語咨送練兵處考驗所有請獎之教習委員應俟該學生考驗後再由該督另行詳核造冊送部卽照新章核給獎敘如蒙 俞允臣等卽通行各省一體遵照謹奏光緒

三十年五月 日奉 旨依議欽此

再查學務大臣會同張之洞新定學堂章程內稱各省學堂員紳教員每屆五年准照從前同文館成案擇尤保獎各等語竊臣等本日具奏遵議各省武備學堂委員教習保獎章程嗣後委員教習保獎以造就學生人數爲限意在杜從前例保之弊所有各省設立各學堂員紳教員保獎新章所定五年准保一次亦應改以學生成就人數爲衡俾歸畫一惟現在各省甫經開辦成就人數尙難預定應俟五年屆期察看各該省辦理情形及成就學生多寡再行分別酌定獎額奏明辦理謹奏同日奉 旨依議欽此

政務處議覆御史劉汝驥奏請限制保舉酌定章程摺并章程

本年正月初九日奉 上諭御史劉汝驥奏仕途蕪雜保舉過濫請除積弊一摺保舉一途原爲朝廷鼓舞人才之具惟必須眞知灼見確係勞績卓著名實相符方可登諸薦牘凡有保人之責者應如何詳慎遴選愛惜名器若如該御史所奏近來濫保各節種種情弊實堪痛恨嗣後各省將軍督撫等保薦人才務當力除積弊不得徇私濫保以杜倖進至應如何嚴定限制之處著政務處會同吏戶兵等部妥議具奏欽此查保

舉最忌冗濫名器本宜慎重詳稽 國初定制凡軍營河工之出力征賦緝盜之奏效
議敘優者止於加級專案奏者皆候 特恩無異常尋常之名亦無一歲而保數案一
案而保多人之事咸豐以後軍務繁興保案始多近則京外舉行要政籌捐籌款疆吏
急於策效 朝廷曲予推 恩各省保舉之多遂爲從前所未有原奏所稱無事不保
無人不保者誠見流弊所趨不可不爲限制茲由臣等就該御史所指各節並推及各
項保案分別核定限制章程謹繕清單恭呈 御覽俟奉 旨後分咨內外各衙門一
體遵照辦理謹奏光緒三十二年 月 日奉 旨依議欽此

謹將核定限制保舉章程繕具清單恭呈 御覽

一河工保獎酌定限制查安瀾例保若永定河若東明黃河若南河廳汛各員兩年各
彙保二十員均按尋常勞績請獎山東黃河防汛則兩年彙保四十員內異常十員尋
常三十員擬請嗣後 飭令沿河各督撫照山東河工例繪具圖說將沿河口岸地名
相距里數及所在有工無工詳細註明並某年派某員駐某段一併咨部立案後如經
歷大汛平穩無事三年准按尋常勞績列保一次文職不得過十員武職奏咨併計不
得過十員山東則三年文職准保二十員武職奏咨併計准保二十員如有搶險工程
准於二十員內聲明按各項異常勞績請保二三員否則統按尋常勞績列保不得稍
涉冒濫其大工分段認修各員合龍後按等列保咨部存案如保固限內潰決即將認

修之員保案撤銷仍照章責令賠修以杜冒功偷減等弊至大工合龍事非恆有擬候屆時由督工大臣察酌工程難易溜勢緩急將在工人員差委銜名薪水數目先期咨部立案以便酌定限制

一漕河防護保獎酌定限制查黃河自咸豐五年銅瓦廂決口兩江轄境本無河患擬嗣後將南河年例保案停止惟河工防護亦關緊要嗣後遇有湖河盛漲水勢危險防護實在出力應准查看情形按尋常勞績酌量請獎文武併計仍不得過十員若偶爾防護並無危險情形概不得率行請獎以杜冒濫

一海運漕糧保獎酌定限制定章江浙海運本省及津通兩處各准保六十五員查近年輪船穩便非昔年海運艱苦可比擬請嗣後江浙海運本省准保三十員京沽兩處各准保二十五員江北河運原定獎額三十員後經改爲海運逐漸加增近有保至四十八九員者此項海運米數無多擬仍按照三十員定章請獎以示限制至江浙江北海運各案內武職准擇尤各保二三員倉場全漕造竣京營護送員弁每年奏保咨保不得過四五員均按尋常勞績給獎

一邊防各軍及各省駐防練軍保獎酌定限制查兵部歷辦成案邊防保案有三年五年七年九年之別駐防練軍創辦之初三年期滿請獎以後每屆五年奏保熱河則二年例保一次歷保各數多寡亦無限制擬嗣後沿邊各軍及各省駐防練軍統以五年

爲限列保一次按照二十八年兵部定章每五百人准保五員如有文員出力亦列在五員之內不得另計悉照尋常勞績給獎不及五百人者以次遞減沿邊各練軍如已歸邊防案內請獎其練軍列保之案應卽停止所有防練各軍營制官弁姓名兵丁數目及駐守之地應於每屆第一年内詳細造冊咨部立案後有更調應隨時咨報以憑核查

一拿獲賊盜保案剿捕匪犯保獎酌定限制擬嗣後東三省熱河馬賊准俟全境肅清後彙案奏保該處三年例保之案應卽停止其緝捕出力之員概照各直省拿獲鄰境盜犯之例辦理其苗蠻各匪出巢焚掠及鹽梟會匪倡亂滋事平定後准專摺奏保由部照定章核獎

一外商部馬差武弁酌定限制查外部商部武弁兩年有例保一次該武弁僅供奔走乃照使臣武隨員異常奏獎年限尤速未免賞浮於勞擬嗣後每屆三年准其請獎一員均照尋常勞績給獎

一出使隨帶員弁保獎酌定限制擬嗣後出使大臣隨帶員弁三年差滿保案准照異常勞績免補免選以應升之階升用不准越級保升及層遞預保惟查總理各國事務衙門原定章程內開有武隨員尋常差弁二項其武隨員一項必須奏調海陸軍學堂出力人員到差之後所有該國海陸軍軍制戰術操法器械各學皆當肄習考求隨時

報告練兵處兵部以憑考核差滿回國應由外務部咨送練兵處考驗實有所得咨行兵部照異常勞績核獎至尋常差弁任奔走傳宣之役只准保獎一員照尋常勞績辦理

一機器槍礮局廠保獎酌定限制查製造槍礮爲水陸軍利器所自出在事人員始終勤慎五年列保准援舊例其有能製造新式器械精良使用者送呈練兵處考驗屬實請准給予優獎

一各省釐稅保獎酌定限制查戶部新章各省釐稅比較光緒二十三年大省加增三四十萬中省加增二三十萬小省加增一二十萬以上者准將廉幹之員從優獎勵現各省請獎釐稅出力人員較多自應按溢徵之數酌定獎敘以示準則擬嗣後經徵稅釐出力人員凡一卡一口向常徵收七八萬兩及三四十萬之數能溢徵至半倍以上者准照異常勞績給獎其向徵一萬數千兩者能溢徵半倍以上與向徵數千兩能溢徵加倍者准照尋常勞績給獎其向徵之數在千兩以下能溢徵若干者只准酌給外獎不得請保仍將每年某卡向徵收數若干逐一造冊咨部立案以憑核對並將經徵銜名年月隨案報明不得籠統含混

一各省墾務保獎酌定限制查東三省及蒙旗墾荒近年均分別異常尋常勞績給獎並無一定準則擬嗣後墾荒出力人員內押荒收價至五萬兩糧租每年增額至二千

五百兩者准照異常勞績給獎一員押荒收價至二萬兩糧租每年增額至一千兩者准按尋常勞績給獎一員仍先將銜名差委名目薪水支數先咨立案以防冒濫

一出洋肄業學生向章均有保獎之案擬由學部另行酌定新章辦理

一勸辦各項捐輸人員嗣後擬概毋庸給獎

一原奏所稱軍功保河工保各節現公同參定辦法限制較前更爲嚴密惟出力者不皆列保列保者不盡出力冒濫之弊誠有如原奏所云者大吏以河防爲調劑屬員之舉並耳未聞鞞鼓足未履沙場謬以爲殺敵致果身經百戰惟部中均按疆臣及統兵大員臚列奏牘咨送履歷照章核議分別准駁其實在出力與否以及出力等差無從懸揣臆斷此中徇託朦保等弊實非減等減額照定限制所能禁絕擬請嗣後嚴飭各疆臣及統兵大員務須實在出力人員方准按等列保倘有徇託等情爲聖明洞鑒或別經發覺卽照定例嚴予處分不准寬免庶法立知恩爵加知榮不致有濫竽充數之弊

一原奏所稱顯違 朝旨有傷 國體者蓋指遣戍革職各員疆臣率爲奏請及明保

人員流品太雜查賞罰爵秩爲 朝廷鼓舞人才之具遣戍者非蒙 特恩釋回不得

擅離配所革職者新章非軍營異常勞績不准開復其永不敘用之員更無論矣至明

保人員部章限制綦嚴其實係人才與否則非部中所能深悉如原奏所稱遣戍者還

留不前革職者報効立功往往以人才難得爲請及濫保京堂出使大臣各節現在奏保紛紛流弊誠所不免擬請嗣後內外各衙門均不得率保京堂及濫保遣戍人員以杜倖進如有違例率請濫保等弊爲 聖明洞鑒或別經發覺卽請立予嚴譴並按照濫保匪人定例從重懲處拔本塞源積弊自不難一清

一沿海各省救護中外失事商船出力請獎酌定限制查向章奮身冒險救出至三十人以上准照異常勞績奏獎每船每次不得逾二三員現在各省奏保此項皆彙案請獎多至二三十人並未逐案聲明且有在籍紳士及附船委員甚至地方府縣官亦濫列其間更有在長江等處並非海面危險亦援照請保者諸多混冒擬請嗣後凡遇此項人員均請照尋常勞績保獎仍每次每船不得過二三員隨時先行咨部立案奏保時仍分案詳細聲明方准彙案開單請獎以杜冒濫

一舊例五城練勇員紳及京城水會保案酌定限制查現在五城練勇業經裁撤嗣後自應責成內外巡警總廳如遇有拿獲鄰境盜犯新章斬決在三名以上者應由巡警部查明不分文武只准保首先拿獲者一員給予班次協同拿獲者准保二員給予升銜加級五名以上者加保協同二員未及三名者仍照舊章辦理至各水會三年例保舊章每局十員亦應酌減此後每局不得過五員之數照舊例只准保虛銜加級不得逾限並將各員紳姓名先行咨部立案

一恭辦 典禮及 玉牒館軍機處保案從前加等優保嗣後擬請按照異常勞績給獎不得越級遞加至三四層之多以示限制此外如 國史館等保案未經議及者均令先行咨部立案隨時分別查明核辦以重名器而免冒濫

吏部奏酌擬畫一保舉章程摺

伏查臣部奏定章程內開如有保舉勞績之案業已奉 旨而該員所捐官階職銜尙未奏准核准者即將保案撤銷至異常勞績出力人員本准免補免選本班以升階即補即選原不待加捐官職始准以升階保奏此項人員業經捐案上兌即准由所捐之項加保等語臣部歷辦成案皆係恪遵定例按照異常尋常分別准駁乃近年以來保案日多紛紛取巧異常出力人員往往由佐貳微秩不數年間遞保道府按其出身底官捐案並未到部保案遽行照准未免漫無限制至尋常勞績人員捐案早經到部並無短交各項銀兩往往因未赴部核准換照致將保案撤銷較之異常僅扣上兌日期未免偏枯臣等公同商酌嗣後無論何項異常勞績以及各館優等議敘凡保奉 旨交議之件臣等行查戶部如該員等有短交正項及免保舉等項銀兩即將保案撤銷未經議准以前是該員底官尙屬虛懸即續得異常勞績亦不准由保升之階層遞預保至尋常勞績人員以及各館次等議敘臣等行查戶部如該員並無短交正項及免保舉免考試並補十成貢監各項銀兩核其捐案到部在奉 旨交議以前臣部亦應

一體議准庶異常勞績不至於取巧尋常勞績可免其向隅如蒙 俞允由臣部知照內外衙門一體欽遵謹奏光緒三十一年十二月十八日奉 旨依議欽此

吏部奏酌擬警官保送截取限制摺

查巡警部奏定章程內開郎中以下均准照各部定例及外部新章各按本官資俸分別以知府直隸州知州知縣等官保送截取又民政部奏定章程內開內外城總廳各僉事分廳知事均視郎中五品警官視員外郎六品警官視主事七品警官視小京官仍參照原設巡警部歷次奏案辦理其五品至九品警官不定額缺各等因查員外郎保送章程內開六部實缺員外郎如已保 京察一等未經 記名人員不扣歷俸即

准以知府保送至二等人員自到任後連閏扣滿二年如係捐納之員試俸實授後再扣限二年方准保送又定例直隸州知州應歸部選之缺毋庸俟吏部行文咨取由六部理藩院步軍統領衙門各該堂官分別滿洲蒙古漢軍及漢主事將本任內曾經

京察一二等及雖未遇 京察歷俸三年以上人員出具切實考語保送其應銷試俸

未經期滿者不准保送至應銷試俸人員曾經 京察有捐免保免試俸者准其保送

惟由部銓選得缺毋庸試俸之員應令實在行走三年或任內曾經 京察方准保送

又定例應升主事之小京官十五項與不應升主事之七八品小京官六項俱扣滿六

年後按俸截取各等語查各衙門司員小京官皆經候補多年方得補缺補缺後各按

大
清
新
法
命

俸次年限扣滿方准保送截取其有捐免歷俸者綜計當差行走亦須在十年以上今各項警官既無額設定缺與各衙門司員小京官情形自不相同其所調各員多係內外候補及畢業學生或僅止雙月候選與報捐職銜人員一經調用即可補缺資俸太淺與各衙門司員小京官補缺難易不啻霄壤若令於補缺之後即准捐俸保送截取殊不足以示限制而昭平允擬請嗣後各項警官其由進士分部主事及實缺小京官調用者按照例章只扣歷俸其各項出身之五品警官比照員外郎試俸人員實歷俸次五年六品警官比照主事試俸人員實歷俸次六年七品警官仍照小京官實歷俸次六年無論曾否經過京察所有試俸歷俸同擬一律不准捐免至僉事知事設有額缺與各項警官漫無限制者不即比照郎中核其出身分別試俸歷俸並准捐免以示區別謹奏光緒三十三年九月十三日奉旨依議欽此

吏部奏變通洋務保獎章程摺

竊查光緒十二年十月臣部奏定章程內開嗣後隨同南北洋大臣專辦洋務人員應先奏明并咨部立案自差委之日起扣滿三年照尋常勞績請獎其員數以十員爲率如有逾十名外者即將在後之員撤銷其餘他省各關不得援照辦理等語嗣因廣東毗連港澳福建控制臺厦亦經增定獎章如南北洋例而他省仍不得率請此甲午以前限制洋務人員並其省分之大概也自甲午至今十餘年間時勢所趨幾於無省無

洋務途亦無省無保獎其有地非沿海而水陸交衝一切調護商教振興工藝與津滬閩廣等處委員同爲專門之選者一經該督撫切實陳明破格優保往往奉 旨卽予照准至發交臣部核議之案臣部以南北洋之外別無新章可引則亦姑以十名通額及尋常獎項比擬核獎歷經分別欽遵議覆各在案上年政務處會奏嚴核各項保舉章程獨於洋務一項未經議及原欲俟各該省奏報到日再行察度情形奏明辦理現據兩江湖北山東三省以年例已屆並四川一省從前尙未開保先後援案請獎前來臣等核其所保均有異常出力之員並員數亦不必盡符例額竊維近年交涉之困難視二十年前何啻百倍 國家講信修睦凡出使大臣所委參隨繙譯人等三年期滿輒得照軍務河工概邀 懋賞各省洋務人員爲督撫分任仔肩雖措置祇在一方面利害實關大局若僅等諸同務勞績似不足以示鼓勵臣等公同商酌擬請嗣後各省除交涉重案如磋商商約嚴守中立之類由該督撫大臣隨時請 旨辦理外所有常年洋務出力人員三年期滿應准其於尋常十名之外各酌保異常數員惟省分衝僻不同亦自難概從一律應請 飭下沿江沿海省分兩項併計統不得過二十員其省分較小及輪軌未達之區統不得過十五員各於期滿時將何員何項出力一體切實聲明以憑核辦如所委各員三年中俱祇循例供差則仍任缺毋濫如此明定等差庶於鼓勵之中仍寓限制之意如蒙 俞允現在請獎到部各案卽請按照此次新章辦

理謹奏光緒三十三年十月初八日奉 旨依議欽此

法部奏變通熱河司員章程並酌加獎勵摺

竊查定例熱河都統衙門添設隨同辦事漢司員一員缺出由吏部行文臣部將熟悉刑名漢實缺司員揀選二員咨送吏部帶領引 見請 旨簡派一員前往三年期滿照例更換如果辦事妥協准該都統出考保奏送部引 見候旨陞用其幫辦司員一員亦定爲三年一換缺出由吏部行文臣部於候補漢主事內揀派熟悉刑名者前往更換不得以無能者充數派往之後如果始終奮勉三年期滿由該都統出具考語送部引 見遇缺卽補等因歷經遵辦在案竊惟熱河辦事司員例用實缺揀選者無非爲閱歷較深刑名較熟起見要之辦事之能否勝任視乎人才之優劣不在缺分之有無臣部改定官制以來實缺人員比前較少分科任事各專責成若必拘守舊章取材既隘有顧此失彼之虞且新設之司驛易生手於部務亦有窒礙臣等公同商酌除幫辦仍照舊例辦理外擬將辦事一員稍爲變通無論實缺候補於漢司員中擇其熟悉刑名者擬定正陪咨送吏部遵照新章轉行內閣驗放俾收任使得人之效抑臣等更有請者熱河地方衝要蒙民交涉之件日益繁多該員等承乏邊隅供差清苦辦理一切奏咨案件以及秋審事宜在在皆關緊要三年差滿其勞動誠有足多者查臣部舊有提牢官定例管理一年果能稽察防範勤敏無過俟期滿後由該堂官具奏移咨吏

部遇缺具題補授等語是提牢一年期滿勤敏無過即可遇缺題補熱河司員任差三年始終奮勉而所得獎敘轉不若提牢之優似未足以資鼓勵合無仰懇 天恩准將熱河辦事司員暨幫辦司員於期滿時如果始終奮勉實在得力卽由熱河都統咨行臣部均照提牢獎敘章程辦理以副 朝廷鼓舞人才之至意如蒙 俞允臣部卽行文熱河都統並移咨吏部欽遵辦理謹奏光緒三十三年十月二十六日奉 旨依議欽此

吏部議覆桂撫奏邊防出力人員改爲三年列保摺

內閣鈔出廣西巡撫張鳴岐奏邊防出力人員改爲三年列保一片光緒三十四年六月初九日奉 硃批該部議奏欽此欽遵到部除武職各員應由陸軍部核議具奏外臣等查原奏內稱近年邊防事勢與往昔迥不相同現匪醜雖已漸衰根株仍未大靖搜除奸慝防遏亂萌在在胥關緊要懲前毖後鑒往思來實有一刻不可疏懈之勢在事文武各員較之尋常戍邊勞苦倍甚且邊地水土惡劣瘴癘叢生人皆視爲畏途懇 恩准將廣西邊防各軍出力人員以後改爲三年列保一次應保員數仍照定章核計並准酌保異常數員以昭激勸而裨邊防至桂省辦理交涉人員向未列保近自梧州南甯先後開作通商口岸輪航絡繹事務日繁邊界交涉尤爲棘手擬請援照沿江沿海省分之例以後每屆三年查照新章分別異常尋常勞績給予獎敘等語查臣部

光緒三十二年五月十四日會同政務處奏定章程內開沿邊各軍及各省駐防練軍統以五年爲限列保一次按照二十八年兵部定章每五百人准保五員如有文員亦列在五員之內不得另計悉照尋常給獎不及五百人者以次遞減又三十三年十月初八日臣部奏定專辦洋務人員請獎新章內開嗣後常年洋務出力人員三年期滿准其於尋常十名之外各酌保異常數員惟省分衝僻不同其省分較小及輪軌未達之區兩項併計統不得過十五員各等語此案據廣西巡撫張鳴岐奏請將該省邊防改爲三年列保並准酌保異常數員均覈與定章不符惟既據該撫奏稱邊防事勢與往昔迥不相同且邊地水土惡劣較之尋常戍邊勞苦倍甚尙保實在情形自應畧示變通准如該撫所奏改爲三年列保一次並准於文職十員之內酌保異常一員一俟邊務大定仍照定章辦理以示限制至辦理洋務人員亦卽准照新章每屆三年准將異常尋常出力人員共請獎十五員仍令該撫將各該員到差日期先行咨部立案俟扣滿三年後方准列保以符定章如蒙 俞允俟 命下之日由臣部卽行該省查照欽遵謹奏光緒三十四年七月二十七日奉 旨依議欽此

吏部奏酌擬卓異人員錄用章程摺

竊臣部考績定例在京三年舉行 京察在外舉行 大計所有整飭吏治激揚人才皆爲 朝廷匡典現京察章程已由臣部奏請變通辦理其大計卓異人員亦應因時

酌定免生窒礙查舊例薦舉卓異人員由臣部帶領引見照例准其卓異加一級仍註冊回任候升等因今查各省保獎章程凡異常勞績皆准保舉過班又政務處奏定各省考覈事實列入最優等者引見時請旨錄用優等者給予加一級歷經遵辦在案伏思保獎異常所辦不過一事考覈事實成績亦僅一年而卓異人員係合計本省實缺十五人舉一扣俸既嚴再其政績必滿三載並無虧欠參罰始膺是選及經赴部引見所得不過加級而候升一層升班究屬太隘反不得與異常勞績考覈最優等各員同邀上賞殊不足以示寵異臣等公同商酌除道員應升之階均係請旨簡放未便擅擬外其知府以至佐雜等官如經保薦卓異奉旨候升人員均擬請以升階在任候補如遇應升到班仍照例先儘升用至卓異送部引見人員又經該督撫臚陳政績奏請破格錄用覈其情事較之最優等人員實有過之擬請按照最優等章程於引見時聲明請旨恭候欽定如蒙俞允卽由臣部著爲定章通行各省欽遵辦理嗣後凡卓異例應引見人員均應遵照例限赴部引見方准以升階候補以昭慎重自此次定章以後其從前卓異業經引見尙夫升補人員均照此次定章一律辦理謹奏光緒三十四年十月初八日奉旨依議欽此

臚陳

兵部奏酌擬廕生送部引見章程摺

竊臣部武職難廢引 見咸豐同治年間軍興以來辦理不一有由原籍州縣出具宗圖冊結申詳督撫出咨送部者有就其祖父服官省分督撫出咨送部者亦有由原奏請卹大臣出咨送部者其由服官省分督撫及原奏請卹大臣出咨送部者俱取具同鄉官印結照此辦理多年尙無貽誤臣等悉心考究事關廢職理應倍加慎重方無流弊查武職大員子孫流寓服官省分最多往往隔故鄉數千里若概令回原籍請咨富者尙可貧者較難應請令就原籍具宗圖冊結請咨者臣部查案相符照章帶領引見其不能回原籍請咨就其祖父服官省分及請卹大臣請咨者均須宗圖冊齊全並取具同鄉官印結其借用何州縣印必須聲明不得借用武職官印由該督撫大臣查驗屬實送部到部時再令加取同鄉京官印結臣部查驗屬實核案相符然後帶領引 見如有假冒及不應廢之人請將出結官照扶同徇隱例議處督撫照失察例議處將本人交刑部治罪如蒙 俞允臣部即通行各省照此辦理謹奏光緒二十八年十二月十六日奉 旨依議欽此

吏部奏漢文武廢生請免考試摺

查定例漢文武廢生廢監生年二十歲以上文職查照題廢年月武職咨查兵部題廢年月有無事故吏部彙齊二三人奏請 欽點大臣考試以古論時務等策秉公閱卷定其甲乙恭呈 御覽其文理優通議論明暢者交吏部帶領引 見照伊等銜缺

分別錄用若文理荒謬者發回本籍讀書三年後再行考試等語臣等詳繹例意原以此項人員既荷 朝廷恩施予以出身又必詢事考言驗其才學立法本甚善也惟相沿日久此項考試已成具文及帶領引 見時仍按品級大小照例辦理並不以擬取等第先後爲衡且查宗室滿洲蒙古各廕生年二十歲以上者咨送 臣部帶領引 見恭候 欽定錄用並無考試之例同一廕生而滿漢辦法不一似宜量爲變通以歸簡易臣等公同商酌擬請嗣後漢文武廕生年二十歲以上者文結到部 臣部卽比照滿蒙廕生之例免其考試隨時帶領引 見分別內用外用照例擬 旨恭候 欽定錄用其例不引 見各員文到之後分別掣簽註冊悉照定例辦理謹奏光緒三十一年月 日奉 旨依議欽此

兵部會同吏部奏請襲世職未能畫一請申明舊章摺

竊臣部請襲世職定章自卹案議准之日起以二十年爲限逾限者駁斥嗣因各省未能依限請襲遽予駁斥非所以優卹忠裔於光緒二十三年八月間奏准展限二年令各省一律補報庚子以來 臣部案卷散失復奏請展限二年令各省將逾限未襲之案統行查明補報如再逾此次展限一概駁斥等因光緒二十八年七月二十一日奉 旨依議欽此欽遵通行在案查近來請襲世職依限者固多乃有已逾二十年及展限二年明知未能邀准轉向吏部具呈以同治年間卹案託詞未奉行知呈請吏部知照

原籍一經吏部知照卽以吏部知照爲名實咨請襲如此者不一而足臣部若予駁斥似與吏部知照承襲事出兩歧竟予核准又與奏定期限不相符合辦理殊多窒礙果係原立官子孫豈有祖父卹案已隔三四十年尙未知議准之理且二十年限期不爲不久復蒙 天恩逾格准予兩次展限所以體卹難裔可謂周至該裔不及早於限內請襲既已逾限始輾轉向吏部具呈以未經知照爲詞其中恐有假冒朦混情事臣等公同商酌擬請嗣後請襲世職雖吏部知照卹案查係已逾二十年及兩次展限以外之案臣部概予議駁以杜朦混而符定章如蒙 俞允臣部通行各省一體欽遵辦理謹奏光緒三十一年十二月二十日奉 旨依議欽此

兵部奏釐定請襲世職畫一章程摺

查臣部辦理各省陣亡將弁以及殉難官紳議給世職者向來各省督撫半年彙奏一次臣部就其冊結宗圖已到人員三月彙奏一次所以恤忠裔慎考核也惟近年以來恤案日多各省彙奏有多至百餘員及數百員者其中含混冒濫之弊往往不免臣部往返行查因數員不符以至致全案難以議結而請襲之員遂有在籍另行請咨藉口於來京探親赴部請爲帶引者臣部查係彙案請襲之員若爲之提出辦理恐此後重複遺漏流弊滋多聽其在京守候則需時甚久令其先行回籍又往返徒勞辦理既多窒礙亦大非體恤忠裔後裔之道臣等公同商酌擬請嗣後各省請襲之案均令各省

督撫三月彙奏一次每次彙奏不得過二十五員俾臣部得以從速議結至臣部行查各省已經咨復之案不拘員數多寡每月彙奏一次均俟臣部奏准後行文調取該員赴部不得因本案行查藉口於來京探親另行請咨赴部至各省奏咨請襲現在并無軍務省分除由服官省分暨寄籍地方官造具宗圖冊結請襲各員仍遵舊章一面查核奏准一面行查原籍如有不實臣部即將該世職撤銷並將出結各官咨送吏部議處其在部取具同鄉京官印結具呈請襲者應行一律停止以杜冒濫而重名器如蒙俞允卽由臣部通行各省督撫一體遵照謹奏光緒三十二年四月十一日奉 旨依議欽此

兵部奏世爵世職犯罪條例片

再查例載世爵官員有犯革職枷責者察其所犯之罪并非枉法婪贓侵盜錢糧等罪其所遺世爵應准承襲世職輕車都尉騎都尉雲騎都尉亦照此辦理又恩騎尉因公罪革職後尙有餘罪者另揀原立官親子孫承襲等語又道光五年九月奉 旨定例凡世職犯罪革職有餘罪者子孫不准承襲革職無餘罪者子孫俱准承襲朕思世職人員緣事革職其所犯情罪自有不同兵部定例僅以有無餘罪爲斷不足以示區別嗣後凡世職人員有因犯贓之案革職並無餘罪者其子孫俱不准承襲等因欽此欽遵在案惟舊例世爵世職與恩騎尉各爲一條往往牽引並非枉法婪贓侵盜錢糧等

罪其所遺世爵應准承襲之語將犯罪革職有餘罪子孫含混請襲致啟爭端而滋告
訐擬請嗣後滿漢世爵世職及世管佐領等官凡犯罪革職有餘罪者均不准其子孫
承襲并不准援引並非枉法婪贓侵盜錢糧舊例希圖朦混請襲至犯賊革職之案雖
無餘罪亦不准其子孫請襲以杜含混而重名器謹奏光緒三十二年四月十一日奉
旨依議欽此

兵部咨各省世職作爲文生應試願以何項改請迅速報部文

光緒三十二年六月初二日

武選司案呈查各省請襲世職本部查核未結之案內有請以世職作爲文生應試者
不一而足現在科舉已停本部既未便照准又未便遽爲改請按世職定例除作爲文
生應試外有歸標學習頂戴榮身兩途相應通行各督撫查明該省世職有請作爲文
生應試者無論奏案咨案傳令該襲裔願以何項改請迅速報部再由本部查核郵案
以定准駁可也

舉貢生員出路

政務處奏酌擬舉貢生員出路章程摺

竊臣等恭讀上年八月初四日 上諭所有鄉會試一律停止其以前之舉貢生員分
別量予出路等因仰見 朝廷敦崇實學嘉惠寒畯之至意凡在士民同深欽感伏維
隆古之制儒與吏通歐美之規政爲士學是以無空虛之學術亦無廢棄之人材現科

舉初停學堂未廣各省舉貢人數合計不下數萬人生員不下數十萬人 國家二百餘年皆以科舉取士士之雋異者咸出其中其次者亦多鄉黨自好循循規矩不乏可用之才中年以上不能再入學堂原奏保送優拔兩途定額無多此外不免窮途之歎方今捐例未止保案尙多或以微勞而累遷或以輸資而進秩片長薄技皆得有以自見而不患沈淪如該舉貢生員等非研經已久卽績學多年似較捐保兩途造就尙易如能量材器使加以磨礱使儒吏兼通政學普習未始不可收拔十得五之效臣等謹按例章仰體 德意將舉貢生員出路詳酌妥籌有爲新章所已行有爲成例所原有稍示變通仍予限制期有以上副 明詔下慰士心其原奏保送一條各省仍應遵照辦理至各該舉貢等應分發外省者既有到省甄別之條又有入法政學堂肄習之案擬請 飭下各該督撫認真辦理以期澄汰庸瑣成就廉能庶於掄材馭吏之道均有裨益謹將酌擬寬籌舉貢生員出路章程六條繕呈 御覽恭候 聖明采擇施行

一酌加優拔貢額查直隸總督袁世凱等奏停科舉摺內籌出路一條聲明十年三科之內各省優貢照舊舉行己酉科拔貢亦照舊辦理皆仍於舊學生員中考取己入學堂者不准應考優貢額少請按省分酌加分別錄取等語查優拔貢向皆於優等生員取錄兼甄文行所得人材較多自應量予加取以廣甄拔擬請己酉科舉行拔貢照向額加倍考取本年丙午卽係考取優貢之年以後每三年舉行一次各省均

照例額加四倍考取其廩生應出歲貢並准照原定額數倍取以惠寒峻均於壬子年考優後一律停止學堂學生仍照原奏不准與考

一 考用謄錄查定例會試及順天鄉試皆於薦卷內挑取謄錄送各館當差二十九年管學大臣遞減科舉原奏有多挑謄錄之請上年吏部亦奏准考取謄錄現各部書吏漸次裁汰清繕文牘需人必多擬仿吏部辦法酌加推廣凡各部院衙門均令考用謄錄幫繕公牘舉人五貢生員分爲三等酌給津貼三年後分別獎敘准以實官分發其舉人拔貢優貢考充謄錄當差期滿並由該堂官擇尤奏請改用七品小京官在部行走俾昭激勵

一 已就揀選舉人准令報捐分發免交補班銀兩查定例舉人近省三科遠省一科以上者皆准就揀以知縣註冊惟揀選並無班次徒有虛名又現在科舉既停近省舉人並有未能註揀者自宜量予變通以示體恤擬請嗣後各省舉人不必限定三科均准以揀選知縣註冊並由吏部酌定班次選用其中式已過十年有願分發到省者令交分發銀兩卽准分省試用各項貢生就職照此辦理

一 截取舉人請無庸再用教職查舉人截取向用知縣教職兩途現科舉停後專重學堂教官事務愈簡上年吏部奏准裁去復設一缺擬定選班以師範生間補截取教職得缺無期同於廢棄查直隸州州同及各項鹽庫大使或爲舉人應得之官或爲

大挑知縣借補之職擬請嗣後截取舉人除用知縣外兼用直隸州州同鹽庫各大使以廣登進其截取舉人已奉 旨以知縣用者並請准其隨時分發毋庸扣限俾得及時効用至恩拔副貢生向例准以直隸州州判就職註選而歲優兩貢不與未免向隅且直隸州州判額缺又甚少殊覺擁擠並請量加推廣凡五貢均准一體以按察司鹽運司經歷散州州判府經歷縣丞分別註册選用如捐交分發銀兩即准分省試用

一 生員考職二十九年管學大臣奏遞減科舉摺內聲明生員准比照已滿吏考職用爲佐貳雜職分發省分試用等語查定例貢監考職皆係令來京考試惟各省生員多係寒士若概令來京考試殊不足以示體恤且人數過多宜加限制擬除年輕諸生應挑入學堂及現充各學堂教員現入師範學堂現送出洋遊學各生外其餘生員均於考優貢之年准令各州縣會同教官慎加遴選保送由各督撫會同學政認真考試取其文理暢達事理明晰者大省取一百名中省取七十名小省取五十名其保送人數約計照取額十倍爲斷毋得過濫至每州縣應送若干名由該督撫等分別酌定先期飭遵取定等次將所取各生姓名三代年貌造册咨送吏部一等以巡檢用二等以典史用分別註選如願捐交分發銀兩者並准分省試用亦截至壬子年止以示限制

一每科會試中式之貢士有未經覆試者有覆試後未應 殿試或 朝考者向例於下科補考今科舉既停擬請准令該員等取具同鄉京官印結赴禮部呈請已經覆試或 殿試者即開列所考等第甲第名次帶領引 見懇 恩給予出身分別錄用未經覆試者亦請查照新章免其覆試引 見錄用其已免覆試之舉人一體准其照例就揀以免向隅

以上各條如蒙 俞允應由臣等咨照吏部學部禮部通行各省一體遵照辦理謹奏
光緒三十二年 月 日奉 旨依議欽此

兵部奏酌擬武舉投標學習章程摺

光緒二十七年七月十六日欽奉 上諭武鄉會試著即永遠停止所有武舉人進士均令投標學習等因欽此欽遵在案查例載武舉隨營額數直隸陝甘各三十名江南浙江湖廣山西四川各二十五名江西福建各二十名河南廣西雲南各十五名山東廣東貴州各十名又例載會試後由兵生中式武舉領票回營差操者以五年爲限遇有千把總員缺一體較拔未經覆試者不得援照辦理其揀選一二等者領票投標差操三年期滿准拔千總未經揀選者准拔把總其武生誤報兵生由督撫考驗技藝尙可堪以收標者比照覆試罰科章程差操五年期滿專以把總拔補各等語現武科業經停止自應酌擬章程變通辦理俾昭劃一武舉等既均令投標學習即毋庸拘定向

有額數且以後既無覆試揀選罰科諸例似不必分別三年五年期限應卽援照各學堂三年卒業之例擬令各該武舉自到標之日起差操三年期滿各該督撫出具考語造送詳細履歷到部由兵生中式武舉者仍以千把總並用由武生中式武舉者專以把總拔補如由武生中式之武舉果有技藝出衆實爲營弁中不可多得之員准由各該督撫加具切實考語以千總拔補然非限以額數仍恐不免瞻徇擬請每省督撫提鎮各標並計十員中准用二三員庶免冒濫之弊至武舉驗票投標之時執持以爲憑信期滿之時繳回以備考驗猶之文職實缺之有文憑分發之有限照從前皆於會試後發給今武科既停亦應量加變通各省武舉情願投標者擬令取具同鄉京官印結隨時具呈赴部領取以示體恤惟是整軍經武之際才略固貴優長而年力尤須壯盛不容以衰憊者濫竽充數總計近今各科中式武舉惟自乙酉科以後大率年皆三十四十內外不等除從前業已給票投標者不計外擬請自奉 旨之日起凡在乙酉科以前中式者概不准其自行投標及赴部領票以示限制庶推廣登進之途仍不失綜核名實之意所有臣等酌擬武舉投標隨營學習章程理合具奏請 旨如蒙 俞允俟 命下之日卽由臣部通行各直省一體遵照謹奏光緒二十九年八月十四日奉 旨依議欽此

吏部奏保送舉人見遺後酌予錄用摺并片

查臣部奏定舉人錄川章程內開各舉人具呈到部先由臣部考試傳見再由臣部奏請 欽派大臣會同揀選一等者以知縣用二等者以直隸州州同鹽庫各大使用均擬定後分別帶領引 見三等者以按察司鹽運司經歷州判府經歷縣丞等掣用毋庸帶領引 見每於兩個月內酌量人數多寡奏請揀選一次等因奉 旨允准歷經遵辦在案現在禮部考試各省保送到京者舉人有一千四百餘人五貢有三百餘人將來禮部錄取後所餘人數必多除五貢就職另行照章辦理不計外其舉人一項多至千名有餘勢必紛紛相率赴臣部呈請揀選辦理殊多窒礙且該舉人等既經禮部奏請 欽派大臣考試擇優拔取其未獲入選者若再由臣部照奏定揀選章程考試未免重複并礙難再擬一等不得預籌辦法臣等公同商酌擬請 旨飭下禮部轉咨 欽派閱卷大臣於錄取足額外略做會試挑取謄錄辦法所有未經錄取各卷剔除五貢將舉人試卷分別定爲二三等由禮部將名次科分造冊咨送臣部存案聽候該舉人等自行呈請註選或願分發即按照揀選舉人二三等應得官階掣簽分別錄用均毋庸帶領引 見以省煩瀆此項舉人內有科分未滿十年仍分別年限照章捐免方准呈請掣簽其有不行呈請仍俟下次保送應考者均聽其便似此預籌辦理庶以仰副 朝廷體恤寒賤不使失所之至意如蒙 兪允俟奉 旨後由臣部咨行禮部欽遵辦理謹奏光緒三十三年 月 日 奉 旨依議欽此

再截取揀選舉人挑取一二等者引 見錄用分別以知縣直隸州州同鹽庫各大使
註選如願分發者截取舉人准隨時呈請分發揀選舉人須繳分發銀兩方准分發歷
經辦理在案惟查各省揀選舉人迭經臣部考試詢問與截取舉人辦法無異其中寒
賤者居多若必令報捐分發雖仰蒙 天恩錄用一官而無力者仍不免沈淪轉無以
副 朝廷疏通正途之意擬請嗣後揀選舉人援照截取人員定章准其隨時呈請分
發免繳分發銀兩願指省分者仍照例報捐其就職五貢亦擬請一律辦理以示體恤
謹奏同日奉 旨依議欽此

吏部奏舉貢錄用部屬人員擬請統分各部摺

竊查此次禮部考試舉貢取中三百七十一人照章應以主事中書小京官知縣等項
錄用將來錄用後除中書知縣等項另行分別辦理外其主事小京官兩項人員應卽
簽掣各部行走惟此次錄用主事小京官兩項人員爲數較多若僅簽分臣部及度支
部禮部陸軍部法部等衙門未免擁擠似應量爲疏通查外務部農工商部民政部學
部郵傳部大理院所辦事宜此次考試舉貢凡經取中者大都於交涉財政警察鐵路
礦務政法算學地理兵事各項科學均有一長可取與捐納勞績人員之未經考選者
迥不相同臣等公同商酌擬請將此次考試舉貢錄用部屬小京官人員覈計員數之
多寡部務之繁簡擬定某部應分幾員擇其所長專門與外務部農工商部民政部郵

傳部大理院各衙門相當者先行分別坐掣如所掣部分無主事小京官名目者卽以對品相當官階酌量改用以期學皆適用其餘剩之員仍歸吏禮等原掣各部及學部分掣庶於整頓部務培植人材兩有神益謹奏光緒三十三年 月 日奉 旨依議欽此

禮部奏遵議籌給繙譯出路摺

內閣鈔出護理荊州將軍副都統隆斌奏懇籌繙譯出路一摺奉 硃批該部議奏欽此欽遵到部查原奏內稱科舉停罷改設學堂所有繙譯舉人生員途絕進身之路目下京旗並各省之繙譯舉人生員不無可造之材若概擯而不用未免可惜查繙譯舉人生員與文學人生員同爲 朝廷科名懇 恩飭下吏禮二部一體籌給出路等語臣等查上年政務處奏准寬籌舉貢出路第五條章程內開除年輕諸生應挑入學堂及現充各學堂教員現入師範學堂現送出洋游學各生外其餘生員均於考優貢之年准令各州縣會同教官慎加遴選保送由各督撫會同學政認真考試取其文理暢達事理明晰者大省取一百名中省取七十名小省取五十名至保送人數約計照額十倍爲斷毋得過濫又本年吏部奏准向來舉人大挑並現在五貢就職均不分滿漢擬請嗣後滿蒙漢軍文學人應截取揀選者卽查照漢舉人現在截取揀選章程一律辦理其八旗駐防及內務府繙譯舉人亦卽附於各本科之末統與漢舉人比較科分

名次選補等因各在案又查例開各省駐防繙譯童生滿蒙進額均五六名取進一名等語今荊州副都統請爲繙譯籌給出路自係爲體恤寒賤共沐 皇恩起見除繙譯舉人出路應照吏部奏准章程辦理無庸再議外所有京旗文生員繙譯生員及各省駐防文生員繙譯生員均擬比照漢生員例准其一體考職京旗由各都統彙送值年旗册送直隸提學使各省由將軍都統副都統城守尉册送本省提學使均宜擇優保送任缺毋濫册送後由提學使照漢生員考職例一律考試文藝不得另試繙譯其錄取額數擬照繙譯童生試例五六名酌取一名以廣 皇仁而宏造就謹奏光緒三十三年六月十二日奉 旨依議欽此

畢業學生任用

練兵處奏議定陸軍畢業學生考試授官暫行章程摺并清單

竊照臣處前准政務處咨開具奏嗣後出洋畢業學生均令咨送來京各項專門之學由學務大臣考驗武備一門由練兵處王大臣考驗如果確有心得再行擬定等第交部帶領引 見請 旨錄用各省武備學堂畢業學生應照此辦理等因又上年十一月間臣等會同擬訂新軍官制聲明嗣後凡學堂出身或游學畢業均以此三等九級軍官分別除授等因奏蒙 俞允欽遵在案此次出洋畢業學生金邦平等業經學務處考驗奉 旨予以出身分別錄用 旁求之盛中外同欽至於武備一門與文學並

重自陸軍改定官制薄海觀聽耳目一新尙武之風捷於影響有志之士或赴各國就學或入學堂肄業咸能刻勵勤劬力求深造他日干城之選無不由此取材應如何分級考試按等授官亟宜明定章程以廣登進而資遵守惟出洋學生在臣處上年奏定游學章程以前及各省武備學堂學生在政務處具奏文武學生送考以前畢業已充軍職者均經效職多年閱歷有素但核其辦事之成績即可定其所造之學程應於現訂章程內另設專條分別辦理其在前次定章以後畢業各學生均照現擬章程內所開各項一律考試以示限制謹將章程十條繕單恭呈 御覽如蒙 俞允卽由臣等通飭遵照再此次所擬係暫行章程其餘未盡事宜容隨時察看情形續擬具奏謹奏
光緒三十一年 月 日奉 旨依議欽此

謹將擬訂陸軍學生考試授官暫行章程敬繕清單恭呈 御覽

第一條 陸軍畢業學生宜分三等 在各國兵官學堂畢業充學習官期滿復入陸軍大學堂或入陸軍別項專門學堂照章畢業者爲一等畢業生在各國兵官學堂畢業充學習官期滿未入陸軍大學堂及陸軍別項專門學堂者爲二等畢業生在各國兵官學堂畢業未充學習官及在各省所設之陸軍學堂畢業者爲三等畢業生 查奏定應設之陸軍中學大學兵官等學堂舉辦尙須時日現在各省陸軍小學堂亦尙未一律開辦故此大所擬章程暫以就學各國學生程度相符者列爲第

一第二等俟中國各項學堂一律開辦學期屆滿後其正課學生應如何分等考試授官任職尚須詳訂章程續行具奏

第二條 凡就學各國學生在練兵處奏定游學章程以前及各省武備學堂學生在政務處具奏文武學生送考以前畢業已委充各項軍職尚未補有實官者由該管大臣開具出身履歷學業年分任差資勞取具畢業文憑咨送練兵處考驗觀其議論才識查其辦事成績核定等第並按所充軍職復加核訂分別奏准充補後再各按軍職等級查照陸軍補官章程會同兵部奏明辦理

第三條 各項學生在定章以後畢業者必須經練兵處分別考試方准照新制請補官階 一等畢業生分考其平時著作及論說報告試充軍職四項考列上等中等者准補正軍校次等者酌量遞補二等畢業生各按所習專科分考其學科術科試充軍職三項考列上等者准補副軍校中等者准補協軍校次等者予限學習下屆再考酌量差委不補官階

第四條 各項畢業生應由各省將軍督撫或出使大臣察其操履謹飭志慮純誠合武官資格者開具切實考語及平時考課品格表三代履歷清冊咨送練兵處考試第五條 各國游學自費學生畢業回國由出使大臣給咨或到籍後由該省將軍督撫給咨均令該生資赴練兵處呈遞履歷及各項憑照依期報到聽候考試

第六條 投考各學生均按春秋兩季分考春季限二月中旬秋季限八月中旬報到逾限者歸入下屆考試

第七條 應考學科術科各項細目 普通學科分漢文歷史格致算學輿地畫圖外國語言文字等七項 軍事學科分戰術軍器地形工程馬學衛生測繪等七項 軍事術科分使用軍器各級教練指揮隊伍各式體操馬術等五項 以上所列各項課目必須所學程度均及七成以上者方准應考

第八條 畢業生試充軍職應各按正軍校等試以相當職任惟一等畢業生程度較優試充之職准其越應補之官一級其二等三等畢業生仍各按應補官階試充不得超越期限以三個月至六個月爲度將來任職必須逐級遞升初授之職不得崇於試充之職

第九條 各項畢業生考驗科學以考試官所定分數爲準試充軍職以各長官所出考語爲準

第十條 現習陸軍之文武學員畢業後與各項畢業生一體應考按照考定等第分別改授陸軍官階 一等畢業學員原有實任官階考列上等者照原官升一級改補中等者照原官調補次等者酌量減級改補原有記名候補候選等官考列上等者照原官改補中等者減一級改補次等者酌量遞減改補 二等畢業學員有實

任官階考列上等者照原官調補中等者減一級改補次等者酌量遞減改補原有記名候補候選等官考列上等者減一級改補中等者減二級改補次等者酌量遞減改補三等畢業學員原有實任官階考列上等者減一級改補中等者減二級改補次等者酌量遞減改補凡記名候補候選學員均按實官核改如保有補缺後升用選用者不得以升階抵作實官又各學員既按畢業程度照學生區分三等如該員調補減補之官卑於學生按等應授之官者仍照學生應補之官請補原有舉人進士出身之一等畢業學員考列上等中等者均准以應授之官升一級請補此外一等畢業學員考列次等及二三等畢業學員考列上等中等者雖有出身仍照定章以應授之官請補以上各項學生學員或察其辦事成績或考其畢業程度均俟核定後由練兵處會同兵部照章分擬陸軍官階奏請欽定其正軍校以上奏准後咨送兵部帶領引見請旨補授至副軍校以下等官奏明奉旨後即由臣部欽遵註冊至定章以前各項官費自費生及定章以後各項自費生原有文武官階不在陸軍供職者准其仍就原官在陸軍供職者必須照章改爲陸軍官階定章以後各項官費生除不勝陸軍職任外其餘各生不論有無原官均須照章補陸軍官階充陸軍職任

考察政治館王大臣奏各省畢業學生請先以鄉官考試任用摺

竊惟科舉已停天下人才皆出於學堂嗣後各省學堂畢業學生自無不萃於登進之地惟是初經畢業遽令臨民深恐更事無多不免稍形踟蹰自當熟籌任用之法以爲歷練之資現在改定外省官制臣等愚見仍不外以地方自治漸立憲政萌芽州縣爲天下根基欲求自治完全則佐治各官以下勢必徧用鄉官相與爲理以徐復古時鄉遂設官之意而取材之道莫若卽於中等學堂以上畢業學生考試任用由州縣官採訪輿論舉其人品端正者先試以國文以觀其學問之深淺再試以地方應辦之事以觀其才具之短長由鄉官漸擢至佐治各員以至州縣以上歷事久則官能舉職歷階多則士無倖心庶人皆勉爲有用之材以上備 朝廷之選爲長官者但以振拔人才破除情面爲事地方不難得人而治而才亦不可勝用矣至於國文一科雖係中國人研習之學然邇來浮薄之士往往鄙視中文十數年後通曉文義之人必且日少一日夫不讀書則無以培養器識不能文則無以剖決事宜此理易明所關甚鉅擬凡考試學生均先以國文爲重不通國文者概置弗錄文理通暢然後再試以所學各科目能授官循序漸進庶仕途不濫而國文亦藉以保存矣謹奏光緒三十三年 月 日奉 旨依議欽此

直督袁等會奏變通調用留學生章程摺

竊查光緒二十九年八月奏定鼓勵學生章程內開凡各省選派官費學生出洋遊學俟畢業回國後無論得何獎勵均須在本省當差五年以盡義務五年內概不准另就他省差使他省亦不得調往差委等語臣等惟各省選派學生出洋學習實爲今日要政原定章程其本意乃欲各省督撫各就本省款項選派學生於區畫經費之中寓推廣教育之意初非強分畛域也近來新政迭興需材尤亟學生將近畢業而各省已爭先電調實與原定章程不合查派遣一生赴英美諸國者自其在本國入學堂始至在外國畢業止計公家所費培植之資總在萬金以外派赴日本者雖較節省如前計算亦非數千金不可各省款目皆有定額若此省所派之學生而他省得隨時調用則在此省常有乏材之慮而他省轉收不耕之穫雖同爲國家效用本無界限可分但恐原派省分因此灰心殊於鼓勵游學之初衷有所窒礙擬請嗣後凡學生畢業回國在五年義務期內他省調用者應將原派省分所費培植款項如數清還其各部調用者亦照此例如此則派遣之數可望增多數年以後陸續回國就地取材可無竭蹶儻蒙 恩准應請 飭部立案施行謹奏光緒三十三年四月初八日奉 硃批該部知道欽此

學部奏限制考試遊學畢業片

再游學東西洋各國畢業學生上年經臣部先後奏准每年八月考驗一次必以在外

國大學堂高等專門畢業者爲限其肄業速成或中學堂尋常專門學堂畢業者概不准與考所以於獎勵人才之中寓慎重名器之意近查外洋每有爲中國人特設班次之學堂雖名爲大學或高等學堂而其程度較之教授其本國人者甚淺又各國在屬地所設學堂之程度亦每不如本國而近來外人每在中國通商口岸設立學堂顏曰大學及高等學堂者甚多以上各種學堂雖有大學高等之名其教科程度與其本國所立大學高等學堂未必相當且見聞拘於一隅究與遊學外國者有別臣等現擬咨行各省凡在各國爲中國人特設班次之學堂及各國屬地之學堂與外國人在中國設立之學堂內畢業者均不得作爲遊學畢業一體送考以昭核實謹奏光緒三十三年五月十三日奉 旨依議欽此

憲政編查館會奏核訂游學畢業生 廷試錄用章程摺并單

光緒三十年九月初三日御史孫培元奏考試游學生請擇尤錄用以杜奔競而作人才一摺經學部議覆奏稱上年所定考驗游學畢業生章程係參照東西各國制度將學成試驗與入官試驗分爲兩事苟教育普興官制大定則居官者無不學之人而學成者不必汲汲於仕進此制實無流弊惟本年各省保送舉貢均授職有差其未經錄取者復經吏部奏定新章分別等第量予就職至各項高等學堂畢業亦皆獎勵實官此項游學畢業量其登進之途比較情形不無軒輊該御史原奏所稱考試及格應隨

時就職就現在情形而論尙屬可行惟任官章程關係重要應由臣部悉心妥議咨送憲政編查館王大臣詳細酌定奏明辦理等語本年十月二十四日奉 旨依議欽此欽遵在案伏查我 朝取士任官之法向以科舉出身者爲正途而 廷試實爲登庸之始優拔貢則有 朝考進士則有 殿試 朝考分別等第錄用有差略與各國文官高等試驗用意相似現在科舉停罷歸重學堂此後量能授官自應以學堂爲取材之所惟入官試驗一時尙無善法而內外百司推行新政需才孔殷此項游學畢業人員爲數又屬有限爭先羅致亦理勢之自然往往負笈初歸而刻章已列則與其私相延攬以辟召而得官不如明定章程俾因材而任使臣等公同商酌擬請暫照光緒三十一年考驗游學畢業生金邦平等成案嗣後游學畢業生經 欽派大臣會同學部考試請 予出身後擬令恭應 廷試一次照從前 殿試例請 旨分別授職以廣登進而勵真才俟將來考試官吏章程大定再將各學堂實官獎勵及此項授職考試體察情形酌量變通奏准辦理茲由臣部妥議 廷試章程十一條送由臣館詳細核定開具清單恭呈 御覽如蒙 俞允卽由臣部奏請 欽定廷試日期一體遵行謹奏光緒三十三年十二月二十日奉 旨依議欽此

謹擬游學畢業生

廷試錄用章程繕具清單恭呈

御覽

一凡在外國高等以上各學堂之畢業生經學部考驗合格奉 旨賞給進士舉人出

身後每年在 保和殿舉行 廷試一次其廷試日期於八月考驗畢業以後由學部奏請 欽定

一於 廷試之前一日由學部奏請 欽派深明中國文學及科學並外國文之大員數人以爲閱卷大臣仿 殿試例先期在內閣值宿以便擬題

一由學部諮訪明通科學及外國文之京外各官開單奏請 欽派數員爲襄校官亦先期在內閣值宿以重關防

一恭應 廷試者作經義一篇科學論說一篇其經義題目一道恭候 欽命科學題目應由閱卷大臣按應試者之學科門類每門各擬二題仿 殿試例恭候 欽定

一此項 廷試試卷由學部備辦每人各給中文卷一本其科學論說願用西文書寫者先期呈明給西文卷

一東西國之醫科工科格致科農科大學畢業生及各項高等實業學堂畢業者往往僅以科學見長不工文字此項學生准其僅作科學論說一篇不必兼作經義

一此項游學畢業生之廷試卷分爲一二三等中文與科學並能優長者列一等中文平安科學優長者列二等科學優長未作中文卷者列三等惟一二三等不必全

備如全係佳卷不妨盡列一等如無中文優長者亦不妨盡置之二三等不必遷就一此項游學畢業生之 廷試卷由閱卷大臣擬定等第奏請 欽定後應由學部將

該生等帶領引 見其已得有進士出身者按照二十九年八月升任湖廣總督張之洞議奏奉 旨允准鼓勵游學章程及三十一年考驗游學畢業生金邦平等成案分別請 旨賞給翰林主事等官其已得有舉人出身者仿照本年舉人考職成案分別請 旨賞給主事內閣中書小京官知縣等官均於排單內按其所入學堂之程度與畢業考驗及 廷試之等第分別註明恭候 欽定

一凡經學部考驗列最優等 賞給進士者 廷試列在一等引 見時於排單內註

明擬請 旨賞給翰林院編修或檢討經學部考驗列最優等 賞給進士者 廷

試列在二等引 見時於排單內註明擬請 旨賞給翰林院庶吉士俟三年期滿

由掌院學士出具考語奏請分別授職編修或檢討經學部考驗列最優等 賞給

進士者 廷試列在三等與經學部考驗列優等 賞給舉人者 廷試列在一等

引 見時於排單內註明擬請 旨賞給主事按照所學科目分部學習經學部考

驗列優等 賞給舉人者 廷試列在二等與經學部考驗列中等 賞給舉人者

廷試列在一等引 見時均於排單內註明擬請 旨賞給內閣中書經學部考

驗列優等 賞給舉人者 廷試列在三等引 見時於排單內註明擬請 旨賞

給知縣分省即用經學部考驗列中等 賞給舉人者 廷試列在二等引 見時

於排單內註明擬請 旨賞給七品小京官按照所學科目分部學習其 廷試列

在三等者引 見時於排單內註明擬請 旨賞給知縣分省試用

一上屆 賞給進士舉人未經 廷試者准其一體 廷試

一已有原官願就本班者准其於 廷試前期呈明仍以原官照從前進士告歸本班
用章程辦理

陸軍部奏軍馬醫經理各學堂畢業生擬照章補官片

再各鎮應需軍佐人員前經直隸督臣袁世凱在北洋籌設軍醫馬醫學堂並於陸軍學堂內附設經理學堂選派學生肄業以資造就均經先後咨明練兵處查照在案上年春間北洋陸軍各學堂陸續呈報畢業前來查定章各省陸軍學堂畢業生考列上等者准補副軍校中等者准補協軍校又軍佐於官名之首冠以同字各等語此項軍醫馬醫經理各學堂畢業生係屬軍佐自應仿照陸軍畢業生章程比擬辦理凡考列上等者准補同副軍校中等者准補同協軍校以示區別如蒙 俞允俟各該學生考試畢業見習期滿後即由臣部分別等第擬補同副協軍校等官開單奏請 欽定嗣後各該堂考試畢業均照此辦理謹奏光緒三十四年二月十五日奉 旨依議欽此

學部奏游學畢業生擬由部先行考核再准應考片

再游學東西洋高等學堂以上之畢業學生前經奏准每年八月考驗一次本年自應循章舉行查日本近來私立之法政大學日見增多其所收中國學生程度每多遷就

且往往有名雖在學而終年在外游蕩實在到堂聽講歸齋自習之日並不甚多甚有入學一二年而已自專門部升大學畢業者若非嚴加甄核輒准其一體與考弊混以欺世則謬種流傳大有害於後進之人才冒濫而得官則濫竽盈庭何足以供國家之任使臣部前准出使日本大臣李家駒函稱私立大學多有插班學生其在校年月不易確查迭經派員往各學校詢問亦祕不肯告等語自非另定甄錄之法不可臣等現擬令在日本私立法政各大學畢業之學生除由普通畢業升入之學生呈有普通畢業文憑者外概於考試之前先由臣部考驗普通學之大要及日文日語一場務須認真校閱從嚴考核合格者始准其應考游學畢業以重名器而杜弊端謹奏光緒三十四年八月初十日奉 旨依議欽此

學部咨各省轉飭各學堂畢業學生領有執照始准赴部就職文

光緒三十四年十月日

總務司案呈查各省學堂學生畢業後得有舉人貢生出身者經部議核准之後照章准其就職近有山西高等農林學堂畢業學生劉彥儒張乾翼等在吏部呈請就職經吏部行查前來查劉彥儒張乾翼二名雖經山西巡撫請獎優貢而以年限不足經部議駁奏咨有案乃復赴吏部呈請就職雖非有心朦混實屬不知事理且恐各省學生不明例章者尙多亟應通行各省督撫轉飭學司曉諭各學堂學生一體遵照凡畢業後應請獎勵之學堂學生考試畢業取列最優等優等中等者須俟部議核准具奏奉

旨行知後方爲獎有出身始能照章就職且本部今年奏定頒給各學堂執照章程凡得有進士舉人優拔歲貢廩增附生出身者必須領有執照方能赴吏部就職更不得率行呈請較然易明自此次通行之後凡未經領有執照者概不得赴部就職以杜弊端除分咨外相應咨行貴督查照可也

學部奏請 欽派大臣會同覈定游學專門各員摺併單

竊臣部上年五月議覆升任直隸總督袁世凱奏請將道員詹天佑等給以各科進士出身一摺內稱請 飭下各直省督撫臣廣加延訪凡專門學成回國在十年以外學力優長復有經驗者以及耆儒碩彥博通中外古今之故經師人師衆望允洽者或臚舉實蹟或徵其著述咨送臣部彙辦卽由臣部 奏請 欽派大臣會同覈定擇其著

述卓然成家成績確然共見者由臣部帶領引 見再行請 旨錫予出身等語奉

旨允准當經通行在案茲據各省督撫先後保送游學專門各員並詳具履歷咨送前來臣等詳加察覈內除屈永秋林紹清梁和崔朝慶薛光錡黃啟明等六員未經出洋游學與上次奏章不合應無庸置議外其詹天佑吳仰曾鄭榮光嚴復鄭佑昌江起鵬溫秉仁陳聯祥張康仁鄭孫謀魏瀚楊廉臣張金生鄭清濂盧守孟李大受辜湯生李維格伍光建劉冠雄等二十員均據聲稱游學回國在十年以外學力素優復有經驗等語臣等查該員等早年幼學遠適異邦洵能得風氣之先導專門之業回國之後復

能本其所學以爲世用雖殫精勵志學者不以表襮爲榮而詢事考言 朝廷宜有甄揚之典擬請遵照上年奏案由軍機處開單恭請 欽派大臣會同臣部覈定並酌擬考覈章程開單呈覽如蒙 俞允卽由臣部遵奉施行謹奏光緒三十四年十月初一日奉 旨依議欽此

謹將酌擬考覈各省採訪游學專門各員章程五條繕單恭呈 御覽

計開

- 一考覈分爲兩等一等給予進士出身二等給予舉人出身
- 一專門學成之員按照所學科目分別給予某科進士某科舉人
- 一考覈均照上次奏章所定資格游學專門在十年以外如習路礦必於工程辦有成效者習製造機器必能發明新理製造新器者習文學必譯著諸書闡通精理有裨學術者如無其人任缺毋濫
- 一此次考覈與考試關防不同應博訪周諮證之輿論其行誼不孚者不得入選
- 一此次考覈或徵其著述或考其成績自應力求精審 欽派大臣覆 命日期擬以一月爲限

捐例

戶部推廣捐復新章

光緒三十年 月

文職降革人員吏部原例加倍半不准捐復十三條內除永不敘用一條應照政務處原奏不准捐復毋庸核議外又原例不准捐復六條共計十八條分別比較情節尙有可原者擬請推廣酌加捐款倍數准其捐復其情節較重者仍不准捐復謹逐條開列於後

原例除永不敘用外加倍半不准捐復十二條

一休致人員

一降革人員例止准其捐復原銜降捐虛銜者

一收受陋規革職者

以上三條擬照例定銀數酌加兩倍准其捐復惟降革人員案情過重者如在臣部此次所擬不准捐復條內應仍不准捐復收受陋規如非相沿已久者應按照後開勒派誅求之條不准捐復

一凡京察大計及隨時甄別降調革職並指明以何官降補暨外官送部引 見奉

旨改用京職者

一軍營失守城池及豐欠緣事降革者

以上二條除京察大計及軍營失守城池降革人員仍不准捐復外其餘各項擬照例定銀數酌加兩倍准其捐復

一因挾妓挾優革職者

一案關倫紀名節及吸鴉片煙身家不清者

以上二條除案關倫紀名節及身家不清革職者仍不准捐復外其餘各項非貪酷不法等重情如被參後深自檢束力除嗜好痛改前非不甘廢棄擬照例定銀數酌加兩倍准其捐復惟報捐時應另行取具圖片印結切實聲明方予收捐

一凡特旨降調革職者

一實犯姦賊酷虐不法者

一承問故入人罪及軍流等犯錯擬斬絞凌遲而囚已決及因濫刑斃命擅受釀命者

一藉端勒派肆意誅求罔念民瘼致釀事端革職者

一事涉賊私受書吏囑託者

以上五條情節過重仍未便准其推廣捐復

又原例不准捐復六條

一公罪中情節較重者

一降調後已經補官者

一廢員蒙恩錄用者

一近京五百里內疏防盜犯特參革職者

一官員失查虧短庫項革職已將賠項交清而奉 旨仍行革職者

一失察邪教釀成滋事重案係例不准抵者

以上六條除失察邪教釀成滋事重案情節過重仍不准捐復外其餘五條擬請一律推廣卽按照降調人員加五革職人員加倍銀數准其捐復

凡武職降革人員兵部原例革職者加倍半不准捐復又降調者加五不准捐復十四條內除永不敘用一條應照政務處原奏不准捐復毋庸核議外其餘三十條分別比較情節尙有可原者擬請推廣酌加捐款倍數准其捐復其情節較重者仍不准捐復謹逐條開列於後

一休致人員

一降革人員例止准其捐復原銜降捐虛銜者

一因挾妓挾優革職者

一收受陋規革職者

以上四條擬照例定銀數酌加兩倍准其捐復惟降革以下三條應仍按照臣部所擬此項文職捐復各節一律辦理

一軍政參劾及隨時以闢冗懈弛等語參劾者

以上一條除軍政參劾降革人員仍不准捐復外其餘隨時參劾者情節尙有可原擬請一律推廣按照例定銀數革職者酌加兩倍降調者酌加一倍准其捐復文職仍應先行具呈吏部武職仍應先行具呈兵部俟詳查案情核定銀數咨行戶部由戶部分別專案彙案具奏以免辦理兩歧

一凡特 旨降調革職者

一實犯姦賊酷虐不法者

一案關倫紀名節及身家不清者

一事涉賊私囑託地方公事者

一軍營失守城池革職者

一打仗不力失誤事機尅扣兵餉營兵噪變者

一縱容弁兵擾害閭閻失事起釁者

一縱容弁兵參養盜賊以誤拿良民指爲盜賊私用非刑害人致死者

以上八條情節過重仍未便准其推廣捐復

京外旗綠各營武職從一品正二品例內並無准其捐復原官明條今案照政務處一併推廣原奏自應比照辦理查例內凡係准其捐復原官者其銀數均係按照捐復原銜例銀加倍此次推廣武職大員捐復原官銀數亦擬按照武職獲咎大員捐復原官

項戴例銀加倍作爲此項捐復原官例銀再行酌加倍數定爲報効鉅款數目其文武
降革人員案情較重此次不准推廣捐復者如報効鉅款亦應約略酌加倍數謹分晰
開列於後

一京外綠營武職從一品照捐復原官頂戴例銀加倍應銀一萬一千五百廿兩正
二品照捐復原官頂戴例銀加倍應銀八千六百四十兩均卽作爲捐復原官銀數
一京外旗營武職例定一品捐復原官頂戴照提督之數如捐復原官加倍應銀一
萬一千五百二十兩二品捐復原官頂戴照總兵之數如捐復原官加倍應銀八千
六百四十兩均卽作爲捐復原官銀數惟正一品武職爵秩最崇應不准推廣捐復
原官

一文職四品以下武職副將以下情節較重此次仍不准推廣捐復者

以上所擬各項捐復原官銀數係爲武職獲咎大員格於捐復之例者酌定如情殷報
効統照此次所定各銀數酌加三倍至文職四品以下武職副將以下情節較重此次
仍不准推廣捐復者擬照例定捐復原官銀數酌加四倍均卽作爲報効鉅款數目降
革人員於捐復原官後擬准推廣捐復升階升銜酌定銀數謹分晰開列於後

一捐復升階如降革人員原有捐保升階擬俟捐復原官後再按照升階例銀分別
公私罪名酌擬銀數如實缺人員原有捐保在任以某官補用升用選用候補人員

原有保俟補缺後以某官補用升用者卽以知縣而論業經捐復原官若再捐復原有陞階如原有同知陞階因公罪降革者應照捐復同知銀數扣除捐復知縣銀二千六百四十五兩再捐銀八百八十兩因私罪降革者再加銀八百八十兩仍作爲補缺後同知餘以類推

一捐復陞銜如降革人員原有原保陞銜擬俟捐復原官後再按照捐復原銜銀數核收三成准其捐復原銜降革故員子孫出資捐復原官原銜頂戴翎枝酌定銀數謹分晰開列於後

一降革故員准其子孫出資捐復原銜銀數公罪按一成五核收私罪及獲咎大員統按三成核收均准其捐復故員原官若並捐復原銜頂戴翎枝再按一成五三成銀數減半核收並准其捐復故員原銜頂戴翎枝

以上各條內如係因案降革情節尙有可原以及隨時參劾休致各員凡係例准捐復原銜者此次臣部按照政務處原奏會同擬定推廣准其捐復原官或應加兩倍或應加一倍或應加半倍或應行減成其案情銀數均已詳細奏明如蒙 俞允應俟具呈到部查係吏部兵部分別核定案情准其捐復之條再由臣部查核銀數相符卽行兌收捐款核准捐案如例應引 見之員隨時具奏例不引 見之員併案彙奏以免煩瀆其定例原准捐復之案自應仍照舊例辦理至文職四品以下武職副將以下情節

較重此次仍不准推廣捐復各官及綠旗各營降革武職大員其有報効鉅款者應具呈戶部由戶部查核相符再行摘敘緣事案由開列奏聞恭候欽定俟奉旨准其報効後作爲捐復原官再由臣部兌收再據政務處原奏內稱三品以上大員有情殷報効者以大員贍軍贖咎亦未便阻其輸納之忱似宜一併推廣應否准其開復原官由戶部隨時奏明遵旨辦理等語擬請嗣後如有獲咎文職三品以上及四品京堂情殷報効應由臣部隨時酌核核請旨辦理至降革五六品京堂及翰詹科道等官例不准捐復原官者如報効鉅款應按照例定捐復原官頂戴比照各項捐復原官者如報効鉅款應按照例定捐復原官頂戴比照各項捐復原官較捐復原官加倍銀數再行酌加三倍應否准其報効奏明請旨遵行

戶部奏查驗捐生加捐執照辦法片

再查庚子以前一切捐輸案卷全行毀失無存光緒二十六年十二月臣部擬定加捐各生必須呈驗原捐執照方准續行加捐如呈驗光緒五年以前籌餉例空白執照者概不准續行加捐等因通行各省在案原以籌餉事例開捐年久收捐成數不同各省分局林立委員往往攜帶空白執照分投勸辦間有執照填給捐生而捐案並未報部者亦有將未填空白執照遺失而終無著落者辦理不免紛歧至光緒五年停捐之時卽經奏定核准年限逾限應將捐案註銷其在庚子之前各捐生呈驗空白執照臣部

彼時有案可稽雖查對相符者固多而爲曾經臣部核駁及逾限應行註銷並按所呈之照查無報部冊據者亦復不少此光緒五年以前籌餉例之空白執照不能一概指爲憑信臣部所以有不准續行加捐之議也惟現辦各捐生中有違籌餉例報捐各項實官承領空白執照後或加捐升階或保獎升階又遞捐各項實官職其續捐之項已由外省兌收嗣後卽赴部呈請核辦而臣部舊案無存該捐生所呈原捐空白執照是否曾經核准無從查對必須片查吏部將往年臣部核准知照咨文檢出查對相符片復過部方予照准其有臣部原文未經吏部查出者事關准駁既未便據捐生一面之詞憑空予准若竟以無案可考概行不准加捐又未免過於刻覈似宜變通辦法以折服捐生之心查籌餉例收捐各省均有原捐底冊存案備查並臣部歷次核准行知咨文亦必隨收附卷此其確鑿可據者也擬請嗣後加捐各生凡呈驗光緒五年以前籌餉例實官空白執照到部驗無印信模糊及殘缺黏補各情者照舊行查吏部如吏部復回未有臣部核准原文應飭該捐生取具圖片印結切實聲明原捐底案於某省某案某次報捐先由臣部將各該員續捐之案一面核准給照一面咨行原捐省分詳細查明各該員原捐底案是否相符於何年月日經部奏咨核准按照各省例定程限於接到臣部行查咨文後扣去往返程限三個月如輾轉查復再展限三個月趕緊將各該員出身履歷詳細原案並本部從前行知原文清單全行鈔錄咨送臣部以憑

核辦備查該省復文不符即將各該員原捐續捐各捐全行撤銷以爲蒙混取巧者戒並將此項先行核准換照人員知照吏部兵部另行登記一俟該省復到臣部查核相符再行按名知照如未經復回其分發到省人員暫停其補缺署缺註冊候選人員暫停其選缺卽有各項勞績亦不准保獎並由吏部兵部行知各該員服官省分遵照庶於體恤捐生之中仍寓嚴防冒濫之意若各捐生自知原捐底案未經核准其遞保續捐之案實在此次奏章之前應令將空白執照繳銷准其照原捐官階按新海防例在部庫補捐仍不准降捐改捐以示限制至各捐生在原捐省自行呈請查明原捐底案由各該督撫專咨到部者臣部查核並無漏敘情節亦卽擬准毋庸再予復查俾昭簡捷惟直隸省曾經兵燹其有代他省各捐係由各該省冊報者仍查前擬行查外如僅係直隸一省冊報者恐已底案無存若仍不准續捐未免向隅應令呈驗空白執照存案後卽按原階一律在部庫補捐再將續捐之案核准庶幾稍示體恤謹奏光緒三十一年 月 日奉 旨依議欽此

戶部奏請停止實官捐輸摺

光緒三十年正月臣部議覆政務處議奏變通捐輸並籌收金款辦法是年五月又會同吏部兵部擬定推廣捐復各條均先後奏奉 諭旨允准原以練兵需餉爲此不得已之舉旋因廣西奉天軍事孔棘亟須籌款接濟經各疆臣一再籲請准令該兩省暫

行收捐各以收足二百萬兩爲止並酌議實官捐升毋庸限以應升之階暨推廣捐輸十九條俾得迅集捐項藉資挹注三十一年八月又因山東改編一鎮經費無著准練兵處咨商臣部議由直隸省收捐迭經奏准遵辦在案竊自開捐以來外省尙能踴躍部庫收數甚屬寥寥所有練兵要需仍係另籌別款而廣西奉天地方現已漸臻安定應就地自闢利源以善其後似不必常資捐項致與名器相妨臣等公同商酌擬請一律停止查廣西奉天冊報請獎銀數各在百萬以外直隸約及三十萬當尙有未報之款惟其勸捐各局遠近不一應勒限三個月令將實收之數查明咨報臣部卽行停止不准續收其部庫所收各項捐輸均一律截至本年十月底止以清界限如蒙 俞允恭候 命下臣部卽行文各該將軍督撫遵照至各捐條款如有與實官無礙應行酌留之處再由臣部隨時參酌奏明辦理謹奏光緒三十二年七月二十九日奉 旨依議欽此

度支部咨憲政編查館停選花樣州縣補交捐項酌量核減文

光緒三十四年八月 日

核捐處案呈准吏部知照會同軍機處擬定州縣改選章程一摺於光緒三十四年八月初七日具奏奉 旨依議欽此欽遵刷印原奏清單知照到部查清單內開現計停選以後所有未投供註冊之遇缺先等項人員自不便歸於改選班但欲捐歸外補則此項捐改之章亦早經戶部停止是花樣無論大小進退皆不免失所今此由選改補

人員既已無班可歸自應准其一體加捐仍以原花樣帶於外省惟因停選而待捐與從前自願改捐者情事有別若不將舊章應加成數酌量核減亦尙不足以示體恤至於核減以後仍有無力遵繳者卽按其原捐銀數折改相當班次或班次無可折改亦准其酌抵分發銀兩統由度支部分別詳細核議等語本部查捐輸例載分缺先等項選用人員加捐分發願將班次帶往外省者除先捐免試用外准照分缺先等項班次減半報捐如僅捐分發業經奏准續捐分缺先等項補用班次仍照例定銀數交納不准減半報捐等語是選用花樣改歸外補者必須報捐分發並免試用及花樣五成各銀兩方准以原有花樣歸補今既經吏部奏明選用花樣州縣改歸外補應捐銀數擬由本部酌量核減自應變通辦理以示體恤嗣後選用花樣州縣願將花樣改歸外補者應准其補交分發及免試用兩層捐項毋庸補交花樣五成銀兩卽准以原官分省歸原有花樣補用此係專爲停選州縣各員而設別項人員不得援以爲例至於收捐成數查新海防事例部庫收捐遇缺先係八成上兌分缺先分缺間本班儘先均係四成上兌今擬截至吏部奏准停止州縣選班之日爲止凡以前報捐州縣遇缺先選用人員補交分發免試用准按四成上兌分缺先分缺間本班儘先等項選用人員補交分發免試用准按二成上兌惟應概歸部庫收捐不准在別項捐輸案內另捐分發以免紛歧又查捐輸定例凡已經核准之捐項向不准再請改獎移獎今吏部既經奏明

州縣以選改補應加成數酌量核減核減以後有無力遵繳者按原捐銀數折改相當班次或班次無可折改亦准折抵分發自應變通辦理嗣後州縣兩項除捐納雙月雙單月並勞績議敘等項選用人員報捐分發仍應按照常捐辦理外其捐輸班選用遇缺先分缺先分缺間本班儘先等項花樣人員若無力捐繳補用花樣之分發免試用兩項銀兩亦無相當班次可以折改者應准以原官分發試用即將原捐選用花樣銀兩折抵分發或折抵分發指省如折抵分發指省之外尚有餘銀無論爲數多寡均卽作爲有盈其各項花樣銀兩概不得移獎亦不准改獎別項官階以示限制相應咨行憲政編查館查照可也

俸給

外務部奏摺節使費摺

非章程

竊臣部籌備出使經費係由各關所收六成洋稅暨招商局留關六成稅項下各提一成半存儲候撥每年約共收銀一百餘萬兩從前支款歲有常經出入尙足相抵近年以來各處分館日益繁多外洋使用金鎊展轉匯兌每多折耗以致漸形支絀加以屢次特簡專使出洋交際所關需款尤鉅上年臣部改革奏明堂司各官養廉如三成船鈔不敷支給亦從使費內撥用而近日義奧兩國使臣又迭向臣部商請奏派使臣專駐彼國亦難於堅拒此外不時之需更難預計臣等通盤籌畫轉瞬已有竭蹶之虞

惟際茲時艱孔亟亦未敢另行請款上煩 宸厪計惟有就原定歲收經費之數明定限制力求撙節庶可稍資補苴現經督飭司員就近數年各國使臣報銷冊詳加酌覈凡有可以節省之款均一律切實裁減以慎度支謹擬章程四條繕單 恭呈 御覽如蒙 愈允應由臣部分別行知各出使大臣自接到部文之日起一律遵照章程辦理如此後報銷有與本屆所定章程未符者即由臣部隨時奏駁光緒二十八年二月初八日奉 旨依議欽此

謹將出使章程四條繕具清單恭呈 御覽

計開

一出使隨員人數光緒十四年經臣衙門酌定使臣館中准設參贊二員繙譯二三員隨員二三員供事二員武弁醫生各一員其設有分館者准添參贊或領事一員繙譯隨員供事各一員作爲定額奏准通行在案惟近年使臣隨帶人數仍間有逾於定額者擬請 飭下出使各大臣嗣後統計奏調隨員務必遵照定章如有逾額即由臣部奏咨駁減其使署中有延用洋員者應令併入隨帶人數內核計至出使西洋各大臣俸薪係按九成支給近因磅價日昂頗受折耗應自本年起無庸減成以示體恤出使東洋各大臣俸薪均照章八成支給參隨等員俸薪查近數年各使臣咨報銷冊內所開銀兩成數不一此後各館隨使人數既少參贊以下俸薪亦

宜量從優厚藉資鼓勵統由各該臣隨時酌定咨報臣部查核

一使費內俸薪等項約略可以預計嗣後自應明定歲支總數以示限制臣等公同商酌所有駐紮美日秘使館及紐約等處領事署經費每年准支銀二十萬兩駐紮英義比使館及新嘉坡等處領事署經費每年准支銀十二萬兩駐紮日本使館及橫濱等處領事署經費每年准支銀七萬兩駐紮俄法德三處使館每處每年准支銀六萬兩駐紮韓國使館及漢城等處領事署經費每年准支銀五萬兩駐紮海參崴商務委員每年准支銀二萬兩以上歲支共需六十四萬兩有閩之年照章加支如有由臣部派往肄業學生薪水等項准其另款開支自行咨調學生不在此例

一使臣及隨帶人員間有留支安家銀兩者嗣後除報銷冊內仍照向章逐員聲敘外應另造留支銀數一冊按年隨同銷冊咨部並將此項留支銀兩各在使費歲支數內聲明扣抵以便稽核

一出使各館經費既經明定歲支數目嗣後如有不時之需事關重要雖為章程所未及而實不得不作正開銷者應由各該使臣先行咨商臣部俟酌定咨復後再行撥用或有用數難以預計暨不及咨商之事亦准由各該使臣一面支用一面咨報臣部查核統俟事竣另案核實造報

外務奏隨使人員歸裝川資銀兩必實在由洋回華始可照章發給片

再隨使人員例有歸裝川資銀兩必實在由洋回華始可照章發給現在各館經費歲有定額各專責成尤當慎覈名實以期撙節擬請隨使人員經他館調用者其歸裝川資即歸調駐之館於該員實在回華時照章發給如有自請銷差回華領去歸裝川資行抵他國而經他館留用者其已領之歸裝川資概令繳還原領之處與調駐者一律辦理如是則每員由洋回華只領歸裝川資一次其實在由何館回華者即由何館照章給發庶幾帑藏不至濫糜報銷各清界限循名核實亦與外務部原定章程相符現在如有此等情形即可照此辦理光緒二十九年三月初六日奉 旨依議欽此

外務部奏新設和蘭專館核定常年經費摺

竊查和蘭向設分館歸出使德國大臣兼充經臣部議設專館駐紮海牙都城就近考訂保和會事宜於本年十月二十日具奏奉 旨三品銜候選知府陸徵祥著賞加四品卿銜充出使和國大臣兼辦保和會事宜欽此欽遵在案所有該館常年經費自當酌定數目以便該使臣開支查奧義比三國初設專館前經奏定准歲支經費銀四萬兩該館事同一律臣等公同商酌擬照奧義比三國使館成案每年准支銀四萬兩作為駐和使館常年經費定額如蒙 俞允即由臣部按期撥給以資應用其餘一切報銷款項併咨行該出使大臣遵照奏定章程辦理謹奏光緒三十一年十二月十一日奉 硃批依議欽此

北洋大臣袁奏請將道府廳州所有各項陋規一律酌改公費摺

竊維國家設官大小相維非第以辨等威亦所以示防檢也故民受治於官而官之小者又遞受治於長官長官不能正己以率屬斯下僚益務媚上而剝民求其弊絕風清必不可得傳曰官之失德寵賂章也近世仕習日壞吏治日偷其賄賂潛通者或當懾於公義怵於人言而不能公然以婪索其有明目張膽昌言不諱與之而儼爲成例取之而不覺其非者則莫如收受陋規一事查直隸道府並四路廳六直隸州均有表率僚吏考核屬員之責然惟直隸州尙有糧賦平餘其道府廳除廉俸外別無進款祿入既甚微薄而辦公用度又甚浩繁乃不得不取給於屬吏於是訂爲規禮到任有費節壽有費查災查保甲有費甚或車馬薪水莫不有費此等風氣大抵各省皆然非僅直隸有之雖相沿已久不同暮夜苞苴但平時既受陋規即遇事不無瞻顧設一旦見有不肖之屬吏爲上司者欲破除情面據實糾參或往往爲其下所挾持轉不克徑行其志吏治之敝所由來也當此修明內政之時必以整飭官方爲當務之急然平情而論又必須先有以養人之廉而後可以止人之貪使舉所有各項陋規掃蕩而廓清之而不籌給辦公之費則一切應用均無所出勢難責其治理地方現以 國帑空虛誠不能另增公費莫如姑就舊有之陋規爲化私爲公之一法臣通飭道府廳州各將每年應得屬員規費據實開報和盤托出卽按其向來所得之多寡明定等差酌給公費擬

定大順廣道月支銀一千兩清河道月支銀九百兩通永道月支銀七百兩天津道月支銀六百兩口北道月支銀五百兩霸昌道月支銀三百五十兩保定永平河間各府均月支銀六百兩天津正定順德大名廣平宣化各府均月支銀五百兩東路廳月支銀二百五十兩南路廳月支銀一百三十兩北路廳月支銀一百一十兩西路廳月支銀一百兩趙州冀州深州均月支銀一百兩遵化易州定州均月支銀五十兩其各州縣仍將向來應出節審等項一律逕解司庫不加耗費另款存儲道府廳直隸州應支公費按月赴司庫請領不准折扣閏月不計司庫統計出入如有不敷另籌彌補自此定章以後道府廳直隸州不准與所屬州縣有分毫私扣授受之事儻敢巧立名目藉端歛派及不肖州縣設計餽獻嘗試逢迎均准隨時據實稟揭查實後按贓私例嚴參治罪其別經發覺者與受同科如此一轉移間化曖昧爲光明廉吏旣不病難爲羈吏更無所藉口長官不必有額外之需索自可潔己以正人下僚不敢作非分之鑽營相與奉公而勤職庶幾大法小廉而吏治可期蒸蒸日上臣爲端仕習而維政體起見除咨順天府尹外理合恭摺具陳是否有當伏乞 聖鑒訓示謹奏光緒二十八年八月十一日奉 硃批另有旨欽此

吏部奏擬籌公費摺

并清單

竊臣部奏陳整頓部務擬籌經費一摺於本年正月二十二日具奏奉 旨知道了欽

此伏惟臣部事繁費重所有司員筆帖式逐日進署辦事酌籌津貼仰承 諭旨允准跪聆之下欽感莫名查臣部除例解各項飯銀例支養廉外並無各省奏銷之款可以化私爲官再四思維謹將承辦各事約舉數端量定數目其餘瑣屑之件概從刪免以省煩苛就此計算果能如數解到尙可敷用至臣部滿檔房四司司務廳等處應需紙筆飯食薪炭差役工食等項經費向於各省例解飯銀及每年例支養廉項下支用尙有不敷嗣後責成司員躬自任事支發各費均須出自公款爲數較鉅自應於新籌項下提撥再司員等津貼應由臣等按月考察各員之勤惰分別等第秉公發給取之既不敢從苛用之亦何容稍濫以上開銷各款每屆年終由該管司員開具四柱清單奏聞一次以昭覈實自定章後如查有營私婪索等弊卽應照例從嚴參處以儆官邪而昭懲勸如蒙 俞允除知照政務處外並咨行各省督撫遵照辦理再所籌各條係屬初擬章程嗣後如有未盡事宜並有無窒礙之處應隨時查明具奏謹奏光緒三十一年 月 日奉 旨依議欽此

謹將臣部四司擬籌辦公經費各條繕具清單恭呈 御覽

計開

文選司辦公經費五條

一補缺由督撫具奏月分隨案咨送如有應駁改者繳回至奏准後應行文知照註冊

等項概免收費 道員四字繁缺五百兩三字繁缺四百兩兩字中缺以下三百五十兩 知府比照道員 鹽運使司運同比照四字繁缺道員 直隸州知州府屬知州三字繁缺以上四百兩兩字中缺以下三百兩 同知通判無論何項缺分一百五十兩 知縣四字要缺及省首邑無論何項缺分四百兩三字要缺三百五十兩兩字中缺三百兩一字簡缺一百五十兩無字簡缺一百兩 查外官缺分優劣臣部難以懸揣其本省各項內有可以互相更定者不必拘定繁簡字數可由該督撫酌量咨部更定但通省計算不得於本部原定數目過於減少 鹽運副運判及六品丞倅首領八十兩 七品丞倅四十兩 鹽大使各項大使均二百兩 八品佐貳雜職三十兩 九品以下雜職二十兩

一引 見無論分發明保大挑月選推升之員一律辦理理由本員自行呈繳至行文註册及分發後應領執照等項概免收費 道員一百四十兩 知府一百二十兩 運同比照知府 同知八十兩 直隸州知州一百兩 府屬知州一百兩 知縣八十兩 通判鹽運副運判鹽大使各項大使均六十兩 六品首領丞倅三十兩 內有僅須驗看者同 七品佐貳雜職二十兩內有僅須驗看者同 八品以下佐貳雜職驗看者均六十兩 京官分發驗看到署六品以上二十四兩 七品以下十二兩

一勞績由原保大臣隨案咨送如有駁改者按所駁員數繳回凡奏准後本員各項聲
敘註冊等事概免收費 道員免補本班一百兩 知府免補本班八十兩 運同
比照知府 同知直隸州知州免補本班六十兩 知州知縣免補本班四十兩
運副比照州縣 六七品首領丞倅及鹽大使各項大使免補本班三十兩凡保免
補缺後者減半 八品以下佐貳雜職無論免補缺後均十五兩已有官階僅保候
補班比照補缺後數目

一加銜二品銜五十兩自三品銜以下每品遞加十兩凡加銜不拘是否指項及保舉
頂戴者同 免歷俸試俸廿兩 翎枝花翎四十兩藍翎十兩 加級四品以上各
官每級三十兩每一階遞減五兩未入流比照從九品惟知縣比照五品紀錄不計
一議敘由覈准奏覆後本員請領執照時隨呈交納至議敘各員呈驗底官執照概免
收費 同知二十兩 通判知縣均十六兩 鹽大使及六品丞倅十兩 七品佐
貳八兩 八品佐貳雜職六兩 九品以下佐貳雜職四兩 教職四兩 加級加
銜比照勞績

一赴選註冊比照議敘註冊後應領執照概免收費
考功司辦公經費四條

一覈辦卓異由督撫具奏時按員名隨案咨送如例應核駁者仍繳還 道員二百兩

一 知府運同一百六十兩 直隸州知州一百四十兩 同知知州運副鹽提舉一百二十兩 通判運判知縣一百兩 鹽大使六十兩 六品以下首領佐貳四十兩 教職雜職均二十兩

一 覈辦捐復無論在吏戶具呈核定後由本員呈繳凡捐復各官不論品級均按捐復例銀每百兩照三兩核收

一 卓異引 見由本員自行呈繳 道員二百八十兩 知府運同二百六十兩 直

隸州知州二百四十兩 同知知州運副鹽提舉二百二十兩 通判知縣二百兩

鹽大使一百四十兩 開復照上各項減二成 獲盜經徵照上減三成 解餉

尋常照上減三成 開缺送引病痊照上減四成

一 保獎議敘與文選司同

稽勳司辦公經費五條

一 就近起復 道員實缺一百二十兩 知府實缺一百兩 同知直隸州知州實缺

六十兩 通判實缺四十兩 知州知縣鹽軍大使實缺六十兩 六七八品佐雜

實缺二十四兩 巡檢典史從九品未入流實缺二十兩 教職實缺八兩 凡候

補者減半 京官司員實缺六兩 候補者減半

一 呈請迎養 道員四十兩 知府三十兩 同知知州知縣二十兩 首領佐貳十

兩

一更名 道員三十二兩 知府二十四兩 同知知州知縣十六兩 首領佐貳八兩 京官四兩不論品級如保外官陞階仍按外官更名

一出繼歸宗 京外官不論品級二十兩

一改籍入籍 京外官不論品級二十兩

驗封司辦公經費十條

一滿世爵領 誥敕公爵十兩自侯爵至恩騎尉 以次遞減一兩

一漢世爵領 誥敕公爵二十兩自侯爵至恩騎尉以次遞減二兩

一京官承廕領照 一品二十四兩 二品二十兩 三品十六兩 四品十兩

一外官承廕領照 一品五十兩 二品四十兩 三品三十兩

一難廕領照 知州二十四兩 知縣十八兩 州判十二兩 縣丞十兩 縣主簿

八兩 州吏目八兩 監生四兩

一京官請 封 一品至三品八兩 四品以下四兩 保封者同

一外官請 封 一品十兩 自二品至九品以次遞減一兩 保封者同

一捐封驗照 一品十兩 二品九兩 三品八兩 四品七兩 五品六兩 六品

以下四兩

一供事取結八兩
一吏員領照十兩

學部奏定本部養廉章程並減成支給摺并單

竊臣部於上年閏四月二十日請補左石丞左右參議八月十二日請補各司廳等員缺均經奉旨允准在案伏查臣部爲全國教育總匯之區締構經營需才至切臣等夙夜孳孳廣攬人才期與協力同心共襄要政惟是策勵之法勸養之方必使在事各員鯁廩有常俯仰無缺而後能專心任事潔己奉公查外務農工商民政等部均經奏准優給養廉臣部自應援照辦理惟臣部經費支絀自開部以來均照新設各部養廉數目減成酌給津貼嗣復按照差事繁簡分別支給現擬暫仍其舊一俟經費稍裕再行酌量漸增務使款項不致虛糜而各員有所激勵謹奏光緒三十三年四月十六日奉旨依議欽此

謹將酌擬學部官員養廉章程並減成支給緣由開單恭呈御覽

一查外務農工商民政等部奏定養廉章程尙書一萬兩侍郎八千兩以次各官分別給予臣部自應援案辦理

一尙書每年應支養廉銀一萬兩現月支四百兩左右侍郎每年各支養廉銀八千兩現月支三百兩左右丞每年各支養廉銀五千兩現月支二百兩左右參議國子丞

每年各支養廉銀四千兩現月支一百六十兩郎中參事官視學官每員每年支養廉銀三千六百兩除郎中視學官員缺尙未奏補有人未經開支外參事官月支八十兩員外郎每員每年支養廉三千二百兩現月支六十兩主事每員每年支養廉銀二千四百兩現月支五十兩司務及一等書記官每員每年支養廉銀九百六十兩現月支三十兩二等書記官每員每年支養廉銀七百二十兩現月支二十兩三等書記官每員每年支養廉銀四百八十兩現尙未奏補有人未經開支以上各司人員其差使繁要者酌增臣部款項支絀異常是以撙節支給作爲津貼俟款項充裕再行隨時議加

一 臣部堂司各官應得俸銀俸米均各按品級由度支部照例支領

一 國子丞所屬各官有襄贊典守之責均於俸祿外分別繁簡酌給津貼

一 調部差遣各員或作爲額外候補或以原官派在各司廳局行走或派往各省查學均酌給津貼以資辦公

一 督學圖書調查等局長由原官兼充不爲實缺然經理各項事宜責任綦重局中聘用各員多係一時才俊均分別等差酌給津貼

一 臣部現設書記生爲繕寫文牘之用均按差事繁簡酌給津貼

外務部奏定各使館歲支公費銀數清單

光緒三十年月

英館	三萬八千兩	法館	三萬兩
德館	二萬六千兩	俄館	三萬兩
美館	二萬八千兩	奧館	二萬兩
義館	一萬八千兩	比館	一萬六千兩
和館	一萬六千兩	日本館	二萬五千兩
日分館	五千兩	葡分館	五千兩
秘分館	五千兩	古分館	五千兩
墨分館	五千兩	新加坡總領事館	五千兩
金山總領事館	五千兩	小呂宋總領事館	五千兩
橫濱總領事館	二千四百兩	韓總領事館	四千兩
海參崴商廨	八千兩	紐約領事館	五千兩
檀香山領事館	五千兩	神戶領事館	二千兩
長崎領事館	二千兩	仁川領事館	一千六百兩
元山領事館	一千六百兩	釜山領事館	一千六百兩
甌南浦領事館	一千六百兩		

又各使館歲支俸薪公費總數並分季撥款清單

英館

歲支銀七萬九千零四十兩

每季撥銀一萬九千七百六十兩

法館日葡分館附

歲支銀十萬零三千六百兩

每季撥銀二萬五千九百兩

德館

歲支銀六萬七千零四十兩

每季撥銀一萬六千七百六十兩

俄館

歲支銀七萬一千零四十兩

每季撥銀一萬七千七百六十兩

美館總領事領事並秘古墨分館附

歲支銀十九萬零二百兩

每季撥銀四萬七千五百五十兩

奧館

歲支銀五萬零四百八十兩
每季撥銀一萬二千六百二十兩

義館

歲支銀四萬六千四百八十兩
每季撥銀一萬一千六百二十兩

和館

歲支銀四萬六千四百八十兩
每季撥銀一萬一千六百二十兩

日本館總領事領事附

歲支銀九萬一千一百八十四兩
每季撥銀二萬二千七百九十六兩

新加坡總領事館

歲支銀一萬九千八百八十兩
每季撥銀四千九百七十兩

韓總領事館領事附

歲支銀四萬八千零八十兩

每季撥銀一萬二千零二十兩

海參崴商廨

歲支銀二萬一千一百零四兩

每季撥銀五千二百七十六兩

外務部酌定出使大臣等應支經費更訂章程摺并章程

竊臣部於議覆出使法國大臣劉式訓奏請變通出使事宜摺內聲明經費一項由臣部詳細酌定另行具奏奉 旨允准在案竊維使臣奉 命出洋與 國體最有關係其駐紮之國一切用款必當略爲寬裕俾免支絀而存體面查各出使大臣暨參隨等員常年經費從前本無定額自光緒二十八年間先後奏准各使館歲支數目始有限制惟當時所定支數如俄德法等館各六萬兩奧義比等館各四萬兩多歸一例而其間所駐之國用度有繁簡之殊開支有多寡之別未經分晰卽房租爲用款之一大宗其有無自置使館尤宜分別辦理所以經費一項除俸薪業經奏定歲有常支外其餘如房租歲修公謙文報川資洋僕醫藥雜用各項應准歲支額數自宜詳加酌核另定章程期於慎重公款之中仍不使或虞竭蹶臣等公同商酌就各使館歷年具報銷冊參稽支數酌量加增作爲定額并舊定章程有應變通之處謹繕清單恭呈 御覽如蒙 俞允卽由臣部咨行出使各國大臣并札各總領事一體欽遵謹 奏光緒三十

三年 月 日奉 硃批依議欽此

謹將酌定出使各國大臣等應支經費更訂章程繕具清單恭呈 御覽

計開

一 經費名目統俸薪及房租歲修公譟文報川資洋僕醫藥雜用八項而言俸薪一項既奏定歲有常支其餘各項支款應名爲公費以賅七項而示區別

一 舊章二等出使大臣如係二品官員准月支俸薪銀一千二百兩此次各出使大臣已奏定爲二品實官所有月支俸薪應照原定二品官員銀數給發

一 商務委員前奏已定秩五品其俸薪尙未核定所有此項委員每月應給俸薪銀二百四十兩

一 前奏聲紋有醫官一項其月支俸薪應由出使大臣在於醫藥項下公費內自行給發願帶醫官與否可聽其便

一 前奏聲紋有供事一項藉供書寫之用惟查各使館應帶有學生以資造就此項學生卽作爲書記生在館中學習公事并供書寫三年期滿察其學業差使酌升書記官無須給予保案如英法德美俄日本六館額設二人奧義比和四館額設一人每人月給俸薪銀一百兩所有供事名目聲明裁撤

一 南非洲總領事經費向由華工費內開支檳榔嶼副領事向由商董兼充不設通譯

書記該副領事支俸薪每月一百兩不支公費應仍照舊章辦理

一俸薪支額視各使館及領事館之員數爲定現既分別定爲員缺各館應歲支俸薪數目英法德俄美五館各四萬一千零四十兩奧義比和四館各三萬零四百八十兩日本館照章八折給發三萬二千八百三十二兩祕古墨日葡五分館各一萬一千二百八十兩新嘉坡金山小呂宋三總領事館各一萬四千八百八十兩日本橫濱總領事館照章八折發給一萬一千九百零四兩韓國總領事館海參崴商廨其總領事商務委員各六千兩通譯官以下照章八折發給各七千一百零四兩美國之紐約檀香山兩領事館各一萬一千二百八十兩日本國之神戶長崎兩領事館照章八折發給各九千零二十四兩韓國之仁川元山釜山甌南浦四領事館照章八折發給各六千一百四十四兩檳榔嶼副領事館一千二百兩

一各國惟美德及日本置有館舍其餘各國均須租居所有公費一項現酌定歲支銀數英館三萬八千兩法館三萬兩美館二萬八千兩德館二萬六千兩俄館三萬兩奧館二萬兩義館一萬八千兩比和兩館各一萬六千兩日本館二萬二千兩祕古墨日葡五分館各五千兩新嘉坡金山小呂宋三總領事館各五千兩日本橫濱總領事館二千四百兩韓總領事館四千兩海參崴商廨八千兩美國之紐約檀香山兩領事館各五千兩日本國之神戶長崎兩領事館各二千兩韓國之仁川元山釜

山甌南浦四領事館各一千六百兩

一俸薪公費仍照舊章以接任之日起支以卸任之日停支如前後任交替應按日核計移交具結存案仍各報部備查

一俸薪公費銀兩由部分四季撥給逢正四七十月爲撥款之期所定銀數作十二箇月計算如遇閏月仍照應支之數另撥一次

一各參贊通譯書記領事等員俸薪照此次奏定新章實數給發撥由出使大臣及總領事轉給即取該員等具領切結由出使大臣及總領事分四季將領結送部查核其各領事署應給公費亦照此辦理

一出使大臣及參贊以下各員有請在華留支銀兩以贍家者應於每撥俸薪內預行扣除以便照給

一各館每年支用經費向須造冊報部核銷現既設定員缺作爲實任已與從前屬爲差使不同卽應支俸薪公費亦定有常數所有開支一切可免其造冊以歸簡易

一另支款項如赴所兼之國親遞國書應用川資及電報費與學生學費之類仍照舊章辦理於年終造具細冊報銷以昭核實此外或遇有特別用款非先行咨部核准不得作爲另款開支

一電報費准支另款原爲緊要事件不致僅爲節省經費起見凡電京城各衙門及各

將軍督撫并與各國駐使者方准作爲另款惟須將電局原單隨冊送部以備查核此外無論電發何處照章自行在公費內開支概不准列入另款報冊

一參贊通譯書記等員生現既改章不得再有保案如屆三年尙未升轉而仍留任者如實係得力之員應各照原支俸薪銀數由部核准加給二成以示獎勵此後六年九年亦照此遞加以加至六成爲止惟各領事不在此列

一各總領事及領事商務委員既照章給發公費則所有各項照費統應一律歸公即先由各總領事領事商務委員將三年內所收照費數目分晰據實報部并詳擬章程申送由部核定頒發三聯單以便填發所有經收照費分四季報部聽候動撥

一各使館及總領事與領事館應支俸薪公費由部分四季將所撥銀數分晰開單奏銷

一整裝歸裝銀兩各照俸薪三箇月分別成數開支應仍照舊章辦理造冊報部核銷惟整裝一項如由此國調彼國由參贊升使臣未便仍照初出洋時重支三箇月全數經此次定章凡遇此項升調所有整裝銀兩准照一箇半月開支

一出使大臣及參贊以下各員出洋與回國應用川資銀兩原未限定支數惟各宜撙節動用實用實報以重公項其造冊報銷時所有往來船票火車票旅店用費各總單一併隨冊送部查核

民政部奏援案請給八九品警官季俸摺

竊前巡警部創設之時警政萌芽需材任使曾於光緒三十二年九月間將內外城總分廳警官奏請派署一次嗣經改爲民政部又於三十三年正月間援案續行遴員奏請添派試署警官一次先後欽奉 諭旨允准旋於三十三年正月二十二日奏定內外城區區職掌員缺章程內聲明警官七品以上者奏補八品以下者委用咨部各等語查八九品警官分隸各廳區執行警務與五六七品者職守本屬相同當部務未定之先歷經奏署有人並咨由度支部查照八旗奉 旨署理職任官員無本任俸者照署缺給俸之例將臣部五品以下奏署各員一律支給俸項辦理有案現在臣部委用八九品警官遵章將各官銜名咨送吏部作爲補用查法部大理院八九品錄事及臣部八九品錄事均經奏明給與季俸奉 旨允准在案自應援照籲懇 天恩俯准將臣部廳區八九品警官遵章咨補之員按品給予俸銀俸米統歸春秋兩季造冊領放以歸畫一如蒙 俞允即由臣部咨行吏部度支部欽遵辦理謹奏光緒三十四年十二月二十二日奉 旨依議欽此

外務部咨出使各國大臣酌定造報畫一章程四條文

光緒二十八年二月二十七日

查近年出使用項日增經費支絀業經本部嚴定章程奏准通行遵照在案茲本部將各館歷年銷冊詳加查核復經酌定造報畫一章程四條列後

計開

一出使應支整裝歸裝等項銀兩原在歲支經費之外嗣後出使大臣自到任之日起限三箇月內將整裝及赴任盤費專案報部核銷其卸任之員自交卸之日起亦限三箇月內將歸裝及回華盤費專案報部核銷至或有續調之員與未經期滿回華者所支銀數無多如不及彙入專案即歸支案內報部以期簡便

一出使英美日本各大臣或兼轄分館暨領事各署或祇兼轄領事各署歲支一切經費較多嗣後按年造報應分別使署爲一冊分館與領事署每處各爲一冊其有出洋肄業學生經本部派往者所支經費亦應另立一冊庶界限清晰一目了然

一使費銷冊內開列款目嗣後以俸薪爲一項所有出使大臣暨隨帶各員應需伙食包車僱車價值跟役工價飯食仍照向章一切在應得俸薪內自行開支房租爲一項其業經備有使館者應即開列使署歲脩字樣公議爲一項凡因公議會應於冊內逐次聲明文報爲一項尋常發電寄信及辦公筆墨紙張等費均歸此項內開報川資爲一項出使大臣暨隨員等在外洋因公往來照章應給川資如並無開支即於報部冊內註明洋僕爲一項仍照向章使館內每年不得過一千兩領事署內每年不得過五百兩其有不必僱用洋僕者既無開支應於冊內註明醫藥爲一項凡有隨帶醫生者應支薪水即歸此項內開報雜用爲一項使館中必須開支而無類

可歸者卽列入雜用惟出使大臣等俸薪較優每年零星用款以及捐助善舉等費均應自行酌給不得再由正款內開支統計分列八項各館造報銷冊務照此次定章以歸一律

一出使英法美韓四館銷冊均係正月起十二月底止按年造報惟出使俄德日本三館銷冊歷年起止月日參差不齊嗣後亦應仿照出使英美等館辦法銷冊以年爲斷自接到此次部文後先將光緒二十七年分開支使費截至年底止另案報部核銷庶此後歲支經費接續造報便於鉤稽

以上四條應自造報光緒二十八年銷冊爲始一律照此辦理相應咨行 貴大臣查照可也

考核懲戒

政務處請 飭部院督撫認真課吏摺

竊維爲政之要首在得人內而部院外而封疆均應以認真課吏爲鑒別人才之方近奉 諭旨令翰林院掌院學士考核翰林各官於五月後嚴行甄別等因欽此仰見朝廷澄敘官方實事求是之至意查京師各衙門司員平日無差使者多不到署即使到署本署例案非印稿概不得見各部大都如此而吏工兩部積習尤深一旦派差諸事茫然卽現充掌印主稿要差其能通達部務見事明決不假手吏胥者實不多觀疊

奉 諭旨裁撤書吏是司員更宜切實練習例案方可親自辦事不至授權書吏應請
旨飭下各部院堂官卽於該衙門內擇一寬敞房屋爲司員講習公所羅列本署案
卷凡有烏布人員每日所辦事件按其功課即可考其才識其餘各司員不分滿漢及
筆帖式均令到署肄習互相討論或令擬奏咨稿件或策問本部例案遇有酌議事件
先令各具說帖由堂官細心考核擇其尤者酌派要差不拘資格其未派要差者卽令
分管案卷俾得潛心考究果能照此整頓司員皆親身治事書吏自不能蒙蔽攬權至
各省候補官員擁擠不肖者專以逢迎奔競爲能而真才反多沈滯近來各省間有已
設課吏館考課官員應一併請 旨飭下各該將軍督撫一體設立課吏館嚴定課程
認真查核或試以事或考以言參觀並用人才自出然尤在各堂官督撫實心任事破
除情面於在館應課各員隨時考察嚴行甄別其才識較優者量加委任以示獎勵其
學久無功者分別勒限學習不堪造就者咨回原籍半年具奏一次不得稍涉瞻徇仍
蹈從前積習庶人才可得政事畢舉矣謹奏光緒二十八年二月初七日奉 旨欽此

政務處奏考核各省州縣事實分別勸懲並擬畫一章程摺

光緒三十一年五月十四日奉 上諭欽奉 懿旨著自本年爲始每屆年終各該督
撫將各州縣分別優劣開列簡明事實奏到後著交政務處詳加考核分起具奏請旨
勸懲等因欽此嗣據各該督撫陸續奏請展緩至次年三月或五月具奏均奉 旨政

務處知道欽此數月以來先後咨到表冊所有直隸江蘇山東山西河南四川廣東浙江雲南安徽甘肅熱河福建等十四起未據咨報者尙有湖北江西陝西新疆貴州廣西奉天吉林黑龍江等九省除廣西吉林業經奏准暫緩辦理奉天黑龍江與吉林事同一律亦應暫緩臣等謹就已到表冊十四起詳加考核分爲最優等優等平等次等四等級不及一年各員分繕清單恭呈 御覽各州縣列入最優等擬請仍交各督撫出具切實考語具奏實缺者以應升之缺在任候升署缺者遇缺卽補列入優等者擬請交部議敘列入平等者擬請准其照前供職列入次等者擬請仍由各督撫隨時督飭各該員將應辦各項認真舉辦如果始終不知奮勉卽行分別參撤儻各該州縣或已另案撤參此次列入最優等者應由該督撫查明原參分別公罪私罪請 旨辦理列入優等平等次等者卽毋庸置議其未經咨報之湖北江西陝西新疆貴州等省請 旨飭下各該督撫趕緊造報毋得視爲具文以期仰副 朝廷綜核名實勤求民隱之至意抑臣等更有請者圖治之道當以實事求是爲歸察吏之方尤以整齊畫一爲要臣等查閱各省表冊惟直隸山東最爲詳備其餘各省所報繁簡互殊間涉含混謹擬畫一章程五條請爲 皇太后 皇上鑒晰陳之

一開報宜核實也查各省表冊學堂或但云籌辦命盜監押或並無已結未結起數甚有於工藝下注男耕女織四字於種植下注棉花三成米穀七成者一味支吾唐塞尙

復成何事體現由臣等酌定表式嗣後務須依式填寫已辦未辦一一核實以免匿飾
一咨報宜按限也此係奉 特旨飭辦之件原令年底開報即各省奏准展緩亦以次
年三月至五月爲止迄今又逾數月仍未到齊嗣後近省儘三月遠省儘五月務須一
律奏結不得任意延緩

一前後任宜界劃分明也州縣莅任或一二年或三四年不等以前任所辦之事歸功
後任殊失情理之平嗣後開報時必須聲明某項原有若干該縣到任後添辦某項若
干成效若何以清眉目

一優次等級宜有一定限制也學堂當以開報處所學生人數最多者爲上次多者爲
中最少者爲下警察工藝種植當以辦有成效者爲上已經開辦者爲中不辦者爲下
命盜詞訟當以全無或全結者爲上未結者不結二成者爲中逾二成者爲下監押以
無者爲上較少者爲中多者爲下盜案以全無或全獲者爲上獲過半者爲中不及半
者爲下錢漕以全完者爲上欠數少者爲中欠數多者爲下

一州縣宜久任也查州縣通計不及一年者或十之三四成或十之四五成且有至十
成以上者至於實缺人員亦復紛紛更調在長官者不過爲屬員規避處分調劑優瘠
起見而傳舍往來置基不定勢必人人萌五日京兆之心卽事事有一暴十寒之慮嗣
後各省督撫務須慎簡庶僚畀之久任庶賢者得所藉手而不才者亦無可濫竽矣

以上五條俟奉 旨後擬卽通行各省一體照辦以免參差而防流弊謹奏光緒三十一年十二月二十七日具奏奉 旨依議欽此

吏部奏添設學治館摺

竊查定例月選各官及分發人員應行驗看者吏部將滿漢九卿並掌科掌道職名開列進 呈恭候 欽派驗看如此內有行止不端出身不正等弊卽行舉出交吏部於月官履歷進 呈時一併奏 聞京官外官應驗看者悉行考試如果政治確有所見准其據實條奏或自述何以居官何以蒞事亦准獎納若無條奏數陳祇令繕寫履歷令本員密封吏部彙齊進 呈恭候引 見又非正途出身之捐納保舉議敘各員赴部分發時傳令當堂開寫年貌籍貫出身履歷三代姓氏年歲等語仰見 朝廷詢事考言實事求是立法本屬至善乃日久奉行漸成具文近年各項選補人員紛紛 部或由軍功薦擢或由捐納花樣其中案牘不諳年少無識之人時所不免若僅繕寫履歷不足以資考核臣部爲用人總匯候選分發各項人員同通有佐理之責且間有管理民事者州縣尤爲親民之官關係均屬重要若以空疏無具文理不通之員任之未有不愆事者臣等公同商酌擬就臣部設學治館一所預備分別肄習除道府大員暨各項正途出身學堂畢業曾任實缺應升人員及已經到省過班人員仍照例月選分發由各督撫查看甄別毋庸入館學習外其非正途出身學堂畢業之捐納保舉初任

牧令丞倅暨例應投供之佐雜各員赴部投供分發者分別入館分門學習由臣等隨時接見詢問稽核課程加以考試投供各員內如公事明白堪以入仕者學習不拘日期輪選到班時卽照例擬選其吏事不諳文義不通者應暫行停選虛積過班令其留館學習六箇月再行察看果能造就日進再行補選所遺之缺卽以其次到班應選之人堪膺民社者遞推擬選至分發各員擬令呈結到部後先由臣等考試合格者飭令附入驗看其不合格者亦令其學習三箇月再行驗看分發以上月選分發兩項人員如留館學習後仍無進益者再留館學習一年如所習終無進益卽行停其銓選分發其正途曾任之員有願入館肄習者各聽其便不限學期學習各員驗看時仍由驗看大臣詢問考試暨赴臣部繕寫履歷到省後仍由各督撫認真察看甄別以符定例如此預爲學習於吏治似不無裨益臣等爲澄清仕途造就吏才起見如蒙 俞允由臣部自籌經費定期開辦此次驗看各員內有年少捐納多人擬請卽行考試以重吏治謹奏光緒三十二年十月十二日奉 旨依議欽此

考察政治館奏考核州縣事實並酌擬辦法摺

竊照各省州縣事實表冊上屆曾由政務處遵 旨考核並另擬通行畫一章程五條請 旨頒行在案茲據各督撫先後咨到光緒三十一年分事實表冊除廣西及東三省仍在展緩之列計咨到者直隸熱河江蘇安徽江西山東山西河南陝西甘肅新疆

福建浙江湖南四川廣東雲南貴州等十八起所填事實已照政務處頒定格式一律分註雖其中間有參差而大致尙稱畫一造報期限仍不免稍見遲逾皆據聲稱初改格式不無展轉耽擱惟湖北一省至今尙未咨報轉瞬三十二年分又將屆期亦未便再事宕緩謹仍就已到各省詳加考核互爲比較分爲最優等優等平等次等四級分繕清單恭呈 御覽其到任不及一年各員無關考核此次卽不復開單以省煩冗查上屆奏定章程列入最優等者請仍交各督撫出具切實考語具奏實缺者以應升之缺在任候升署缺者遇缺卽補等語現計三十年分辦理已逾一年各該督撫並無加考奏獎之案若各省大吏無意奉行一兩年後勢必視爲具文相率敷衍於吏治仍無裨益臣等以爲旣欲實事考核卽不可空言勸懲查 大計卓異人員例准送部引見今開事實表冊皆有政績可考與尋常甄別不同擬請凡州縣列入最優等者卽令各該督撫加具切實考語送部引 見實缺者請 旨升用候補者發回原省遇缺卽補其列入次等人員雖視 升典有別然原章請由督撫督飭各員認真舉辦如果始終不知奮勉卽行分別撤參等語亦恐不足以資策勵擬請交各督撫詳加察看酌照處分降罰之例如頻年屢任皆列次等實缺者停升候補者扣補似此變通當不至仍前廢弛至最優等之因案參撤及優等平等各員仍係照章辦理此 臣等謹擬切實勸懲之辦法也至於各省咨報之件有與章程不甚符合者如學堂但有處所而無人數

巡警但云籌辦而無員名或以團防練勇爲警察或以罪犯習藝爲工藝或混監押不分或漏錢糧不報淆雜紛歧比比皆是督撫加考又或不分等第不論年限更覺漫無限制此次臣等考核凡在任不滿一年者均予詳細剔除其有三四月到任年底尙未交卸各員統歸下屆核辦若原無等第各員則就其考語事實酌量定擬此後應仍責令各該督撫自行核辦如其再有漏略應即隨時駁回更換以昭核實至列入優等連任各州縣旣不必歲歲列優亦未便遽降平等應飭各督撫查明上屆優等各員若事實毫無出入卽行另列一單註明與上屆相同俾免淆復倘於各項新政實有擴充始終不懈者准予升列最優抑或始勤終怠亦卽降等以期允當又各省咨報限期原定近省不逾五月今各省多未如限不特不能懸案久待卽本屆列單各員往往事故歧出離任居多且有原列優等而現被參劾者追加論列固屬具文概事刪除亦乖成例嗣後應再飭催依限咨報以憑核辦此臣等謹擬聲明定章之辦法也又查事實表冊自應注重前列新政四項而列優等各員尙未能逐項舉辦各督撫原奏或稱風氣未開或稱財力不足自係實在情形惟日久不辦適便諛卸積習亟應酌定年限責成於三年內將現在未辦之事次第分期辦理如三年後仍復不能舉行卽不准列優用示區別至工藝種植兩項往往以尋常地方物產濫行開列而又不能就原有者加意擴充未有者亟思創辦應另查明各屬工藝種植幾種製造出產若干詳細登列然後再

將現在推廣開辦情形並逐年有無效驗切實陳明庶不至空言捏飾而於推行新政之事不無裨補目前禁煙伊始舊種罌粟各區必須各相土宜預籌有利植物勸諭民間逐年改種方於小民生計無礙他如江蘇之絲貨繡貨閩粵之漆器竹器等類向爲著名工藝於近年商務尤有莫大關係均應切實提倡俟辦有頭緒飭令一併開報以資查考此臣等謹擬整飭新政之辦法也如蒙 俞允應由本屆爲始凡最優等次等各員卽飭各該督撫查照此次奏章辦理其餘各條亦均責令認真遵辦不得稍涉因循以副 朝廷實事求是至意謹奏光緒三十年 月 日奉 旨依議欽此

陸軍部奏武職赴引人員應申明例章摺

查定例應行引 見人員引 見時奉 旨以該員不勝新任或於考驗時人材不及技藝平常者卽行扣缺令其原品休致又臣部奏定章程凡升任應行引 見人員以接奉部文之日起勒限三個月給咨赴部如本任內實有承辦要件難以遽易生手該督撫查明在半年以內完竣者務於勒限三個月之內咨部准其展限在半年以外方克完竣者卽將緣由據實奏明加展等語是補缺後應行赴引本有限制惟近來補缺人員多不按限赴部以致十缺九署習爲故常且有未經赴部遽報到任者尤與例章不合當茲整頓營務之際講求操法訓練士卒首以將才爲急務如不給咨赴引是人材技藝既未經臣部考驗其能否勝任 朝廷無從得知不惟於例章不符亦大非慎

選將才之意擬請嗣後除新疆省武職補缺仍照章暫毋庸赴引外其餘各省補缺人員該省均以接到部文之日起依限給咨赴部如實有承辦要件難以遽易生手者該督撫分別奏咨展緩如奏請展緩者期以二年咨請展緩者期以一年不得再請加展倘不依限赴引卽由臣部奏請開缺如此申明限制庶足以杜取巧而戒將來恭候命下臣部行知各省督撫一體遵照至曾經補缺尙未赴部之員擬請卽照此次定章辦理合併聲明謹奏光緒三十三年九月十二日奉 旨依議欽此

憲政編查館奏酌擬切實考驗外官章程摺并清單

本年九月二十八日奉 上諭修明內政吏治爲先親民之官莫如守令若地方官盡得其人實心任事何利不舉何弊不除近來捐納保舉流品冗濫以候補人員爲尤甚迭經降旨飭令各省督撫於各員到省時考試甄別乃十數年來分發選缺到省各員經督撫考驗黜革開缺及咨回原省者甚不多覲一味虛應故事濫容關冗是並無揚清激濁之誠殊屬不成事體著憲政編查館會同吏部詳定切實考驗外官章程請旨飭下各省督撫將所屬地方候補選缺到省各人員認真考驗嚴定去留並條列實迹咨報吏部查核以清仕途而端治本欽此竊惟考試甄別定例非不詳明乃因習視爲具文遂致鮮收夫實效茲復恭奉 諭旨飭令詳定切實考驗章程臣等遵查古今考課之法不外考言詢事兩端考試第試之以言而考驗必驗之以事至於舉行甄別則

必待試驗之俱實而後徵舉効之非虛方今捐納保舉兩項人員自道府以至佐雜分發各省日形擁擠流品蕪雜賢否不齊向來考試甄別雖有停委降補回籍休致各條而日久奉行不力誠有如 聖諭所謂一味虛應故事不成事體者必欲求切實考驗之法非將原定例章合併變通另訂章程無以清仕途而肅吏治臣等前次議覆御史趙炳麟捐納變通辦法業經聲明捐保人員概令入法政學堂肄習又臣館於奏陳考核上年州縣事實清冊摺內另擬勸懲辦法皆爲實事求是起見茲謹酌照新章參合舊例擬定切實考驗外官章程六條謹繕清單恭呈 御覽如蒙 俞允當卽通行遵辦抑臣等更有請者前代考課民吏有以身言書判精校於未選之先者有以才守政學責舉於任職之後者其始法非不密而其後卒患乏才臣等所擬章程皆審度情勢所能行不敢稍鄰於苛細而違循之實則在疆臣經曰徒法不能以自行此則臣等凡有用人之責者尤願與疆臣共勉之者也謹奏光緒三十三年十二月二十二日奉旨依議欽此

謹將遵擬切實考驗外官章程繕具清單恭呈 御覽

一變通考試舊例概令先行學習也查考試定例祇作論判一道或寫履歷數行文字短長殊不足以盡人才且使平日未嘗學問即考試安得而施應令概照臣等議覆御史趙炳麟條陳新章凡捐納保舉兩項之道府同通州縣以及佐雜各員除正途

出身及本係高等以上學堂畢業學生外無論月選分發到省一律俱入法政學堂先考以文字其文理不通及不能執筆者即咨令回籍無庸入學外餘各按其文理淺深分爲長期速成兩班限年學習期滿卒業由督撫督同司道按照法政課程切實考試必須給有卒業文憑方准赴任差委

一分別學堂等第必須嚴示勸懲也前議法政學堂辦法第有卒業考核合格不合格之分既未詳分等第至留學仍不合格僅予停止差缺尙不足以澄汰冗濫現爲認真考試起見必須按照學堂辦法以分數之多寡定等第之高下擬即參酌從前考試候補人員舊例分別一二三四等及不列等爲五項考列一二三等者分別各給最優等優等中等卒業文憑赴任差委四等者分別留學半年一年再行考試凡卒業考試不列等者及留學考試仍不合格者應即分別奏咨開缺降補及勒令回籍不得稍涉瞻徇似此明示勸懲庶使闕冗無所遁跡仕途可望澄清

一考驗應條其實跡也法政學堂卒業人員應即量加差委究其學成致用是否才長守潔非重加考驗不能知其品學相符前定考核州縣事實清冊其中本有候補署事人員惟有缺無差尙虞缺漏方今新政繁興如洋務財政學務巡警審判監獄工藝等類差務尤關緊要應各就其所供差事分由司道切實考驗如財政歸布政司學務歸提學司審判歸提法司巡警歸巡警道工藝歸勸業道之類其佐雜各員由

各府州差委者即歸府州考驗再由督撫層遞加考條列實在事跡仿照州縣事實例每年分別造具差委事實清冊一次分別最優等優等平等次等下等出具切實考語於年終彙總咨明吏部查核辦理

一甄別須改定辦法也甄別舊例向以到省扣足一年爲滿現令概入法政學堂正在三年或一年半或留學學習期內自未便遽行甄別即令學堂卒業而未加差委考驗不真亦恐甄別未能切實應飭嗣後將甄別年限除在學習期內不計外應自各該員奉有差委日起扣足供差一年確實試驗方准出具考語於差委事實冊達部後並開具學堂等第差委事實甄別奏留其最優等優等平等者方准留省分別補用並咨吏部查核不得用向來年富力強等字含糊出考以杜虛應故事之弊其次等者降補下等者分別休致黜革均奏咨辦理至各項正途人員雖不在考試之列而亦間有試用之班其向例一年甄別者亦照此條扣足供差一年按照事實冊辦理

一在省候補人員宜通行考試一次也前項考試考驗辦法凡此後初行到省人員可期澄汰而前此先經在省者不與其列亦未足以昭平允而示激揚查各省候補人員擁擠已甚請停分發者不一而足若仍其流品冗濫因循姑息即延至數十年後亦無澄敘之時吏治安有起色况現行新政各項均非其平日所素習尤不可不曲

予造就現奉 嚴詔整飭之際各省應將在省候補人員認真通行考試一次嚴定去留除正途出身及高等以上卒業學生及歷任重要差使各員無庸考試統歸考驗辦法外餘均由督撫率同司道嚴行考試一次照前分別五等其考列一二等者分別差委三四等者令入法政學堂分別速成長期兩班肄習俟得有卒業文憑再予差委其不列等者即飭令回籍至入學堂以後統按前條卒業考試法辦理應飭各省於奉到此次章程之日起限三月內舉辦奏明咨部

一出考上司應酌予議處也各省法政學堂現尙未能徧設若無學習之方安有試驗之實應請通飭各省自此項新章頒行以後凡未設立法政學堂省分統限三個月內一律開設選聘教習認真辦理如有未能依限設立仍照從前空言出考或僅考試考驗未將該員學堂等第差委事實列冊奏咨朦混甄別者及將未經甄別人員濫予署缺者應由吏部查明即將該督撫司道分別察議

憲政編查館咨各督撫熱河都統暨吏部考驗外官應照定章辦理文

光緒三十四年三月

准山西巡撫咨稱本館會奏通行切實考驗外官章程業經轉行遵辦在案惟查正途出身與高等以上卒業學生及歷任重要差使人員均係毋庸考試統歸考驗辦法而按諸考驗條其實跡一條須仿照州縣事實例每年造具差委事實清冊一次於年終彙總咨部查核第各該員到差日期先後不一如必俟年終彙案造冊凡供差早滿一

年之員應辦甄別必須因此稽時晉係邊瘠省分正患乏材任使若將供差年滿之員仍不隨時甄別奏留補署設有人地相需之處勢將懸缺以待必致貽誤殊有空礙籌思至再可否將此項正途出身高等以上學堂卒業學生歷充要差人員除貽誤差使隨時撤參外其供差無誤各員准以奉差日起扣足一年期滿卽由各局所總辦確實試驗將該員造具差委事實清冊送由藩學臬三司會核加考具詳奏咨核辦似此量爲變通於新章無甚出入而各員得以及時自効於地方吏治較有裨益是否可行等因咨商前來查本館會奏考驗外官章程內考驗條具實跡一條係仿照州縣事實每年分別造具差委事實清冊一次而甄別辦法一條卽已明定自該員奉差日起扣足供差一年確實試驗等語原以各員奉差日期先後既非一律則屆期甄別祇須扣足一年自可隨時奏咨以期核實而免稽延茲准前因應照所咨辦理合再聲明定章通行查照俾歸劃一除咨覆山西巡撫外相應咨行貴督撫都統 部查照可也

吏部奏嚴定禁煙考成議敘議處各案摺併清單

竊准民政部等衙門奏酌擬禁煙稽覈章程嚴定考成辦法一摺內稱至嚴定考成一節卽以稽覈之是否嚴密奉行之是否切實定其考成之高下惟所請議敘議處各案事關吏部自應由吏部查例酌擬奏定遵行以昭劃一等因於本年四月二十四日奉旨依議欽此欽遵咨行到部查現在實行禁煙關係甚重非嚴定功過不足以示勸

懲臣部禁煙各舊例與現在情形多有不同自應按照其原單所開議敘議處並從優議敘嚴加議處各條查照例章酌覈擬定另繕清單請 旨遵行如蒙 俞允應由臣部通行各省督撫查明實係一官經理前後任勿得牽混按年造冊分咨民政部各衙門暨禁煙大臣查覈知照臣部即按照此次奏定章程辦理謹奏光緒三十四年七月二十四日奉 旨依議欽此

謹將嚴定各省地方官禁煙考成議敘議處各條繕具清單恭呈 御覽

一各省地方官於本章程內應行冊報各條依限造報無誤者每屆三年准由各該督撫奏請交部議敘應照例給予尋常加一級

一各省地方官於本章程內應行查禁各條依限禁絕者查明屬實准由各該督撫隨時奏請交部議敘應令該督撫查明實係一官任內扣足一年者每年准其加一級

一各省地方官能將境內栽種罌粟地畝膏土各店及喫煙人數於一年以內減至十分之三以上且並無騷擾情事者查明屬實准由各該督撫奏請交部從優議敘應令該督撫查明實係一官經理前後任勿得牽混於卸任時造冊分咨各衙門照異常勞績未補缺者給予班次已補缺者以應升官階在任儘先補用如已有班次升階無可再加者仍給予尋常加一級從優再紀錄二次

一各省地方官於應行冊報各條限滿不報者交部議處擬照造報各項錢糧文冊遲

延例違限不及一月及一月以上者俱罰俸三個月二月以上罰俸六個月三月以上罰俸九個月四五月以上罰俸一年半年以上降一級留任一年以上降二級留任二年以上降三級調用俱公罪冊報不實者交部嚴加議處擬照錢糧文冊不分晰明白者降一級留任公罪例從嚴降二級留任公罪

一各省地方官於應行查禁各條限滿未經禁絕者交部議處擬照奉行不力例降二級調用公罪若未經查禁捏稱禁絕者交部嚴加議處擬照朦混私罪例革職臣部例止革職無可再加該管上司知情不行參揭者交部嚴加議處擬照徇隱例降一級調用私罪例從嚴降二級調用私罪

一各省地方官於境內栽種罌粟地畝膏土各店及喫煙人數統計一年內遞減數目不及八分之一者交部嚴加議處擬照奉行不力降二級調用公罪例從嚴降三級調用公罪

民政部奏擬訂考核巡警官吏章程摺併清單

本年四月二十六日憲政編查館具奏核訂直省巡警道官制並分課辦事細則一摺奉旨允准欽遵通行在案查原奏清單內開各項舉凡官員之任用警務之得失臣部皆有督率考核之權而實行考核自應嚴定勸懲但非限以時日課以事功無以定責成而覘實效臣部總攬全國內政警察乃內政之一端責任至重關係至鉅考查應

益加嚴京師警務係各省之觀瞻內外警廳爲臣部所直轄自應通行考核一律辦理
臣等悉心商訂擬具考核巡警官吏章程九條京師自巡警總廳廳丞以下各省自巡
警道以下所有辦事成績均由臣部定期核辦分別殿最請 旨勸懲其實係成績昭
著或辦事不力者亦卽隨時奏明辦理似此黜陟兼施羣下咸知激勵庶警務日有起
色新政藉以推行情仰副 朝廷實行整頓保護黎民至意所有擬訂考核巡警官吏
章程分別勸懲緣由謹繕具清單恭呈 御覽如蒙 俞允卽由臣部欽遵辦理謹奏
光緒三十四年八月初八日奉 旨依議欽此
謹將擬訂考核巡警官吏章程繕具清單恭呈 御覽

計開

第一條 本章程據憲政編查館奏准考核巡警官吏辦法擬訂通行京師自巡警總
廳廳丞以下各省自巡警道以下均適用之

第二條 巡警總廳廳丞由部隨時考核出具切實考語各省巡警道由部隨時考核
咨行各該省督撫出具切實考語均自到任日起每屆三年期滿臚列表 聞

第三條 總廳及各道所屬各員除本部隨時考查外應由該管廳丞及該管道分造
清冊出具切實考語每屆六個月申報一次

第四條 總廳及巡警道辦事成績應分類造冊列表申部每屆六個月申報一次

第五條 造冊立表除本部特別命令及本管地方重要事宜應令隨時申報外所有屆時申報事項其大端如左

一擬訂章程事項 二任用屬員事項 三佈置巡警事項 四收發經費事項

五課程教練事項 六清查戶口事項 七行政警察事項 八保安警察事項

九衛生警察事項 十消防警察事項 十一司法警察事項 十二外事警察事

項 各項細目應由各該管衙門自行編定彙報

第六條 廳丞及巡警道由部考核成績分別等差屆期奏 聞請 旨懲勸

第七條 前條考核如實係成績昭著者得隨時請 旨獎敘其辦事不力者亦即隨

時據實奏參

第八條 廳丞及巡警道所屬各員由各該管長官考核彙報其實係才力出眾者准

予分別奏保或記名升補其辦事平常者亦即分別奏參或立予撤任

第九條 本章程自奏定日始施行

吏部奏議覆雲貴總督奏變通教雜調驗事宜摺

內閣抄出雲貴總督錫良奏邊省微員困苦請將俸滿調驗事宜變通辦理一摺光緒三十四年八月初九日奉 硃批吏部議奏欽此欽遵抄出到部原奏內稱滇省僻處邊隅幅員遼闊各處距省程途有遠在二三十站以外者教雜缺分瘠苦廉俸無多每

遇俸滿由該管官申送府州送道送省層遞驗看曠時須三數月資斧至數百金邊瘠
微員何從籌措故調驗之舉各官均視爲畏途而定例所關又無術可以推展查各官
驗看到省不過堂見一二次在年老有疾者尙可一望而知而究其才具如何操守如
何仍恃平日留心查看向不敢定於庭參之頃因思州縣以上例應調取引見者新
章有捐免之條特以微員末秩若飭令捐免窒礙實多仰懇天恩俯念滇省教雜困
苦異常嗣後俸滿例應調驗人員准其變通由該管州縣就近申送府州切實驗看出
考申轉免令該員親身赴道赴省如遇年老有疾或才具庸劣之員卽責成該管府州
據實揭參不准稍涉瞻徇其中實有人材出衆著有勞績堪以保薦者仍照例送道送
省層遞驗看以昭慎重等語臣等查定例各省首領佐貳雜職自從六品至未入流並
捐納之鹽庫等大使俱以到任之日准其前後接算歷俸已滿六年暨舉人出身之鹽
大使歷俸已滿五年者該督撫鹽政調取驗看詳加甄別其中實有人材出衆著有勞
績堪膺保薦人員出具切實考語照例具題又教職六年俸滿學臣會同督撫保薦均
歷久循辦在案詳繹例意原以俸滿人員本應查其才力分別去留非調省驗看不足
以一事權而杜瞻徇今滇省幅員遼闊教雜缺分瘠苦據該督所奏送省之員曠時過
久需費過鉅並堂見一二次仍不能定其才具操守各節自係實在情形再查近年學
務鹽員均歸督撫兼管若必一一親驗本亦不免日不暇給臣等悉心酌議應准如該

督所請嗣後滇省從六品以下教雜等官俸滿卽由該管州縣就近申送府州切實驗看遞詳院司道咨部存案其首領各官隸於布按二司鹽庫等大使隸於鹽道暨鹽道所屬之各井並應由該管上司分別出考無庸再由州縣申轉仍責成該督詳加察訪如有將衰庸不職之員扶同徇隱等弊仍不時調驗據實參處以儆其餘實有才績堪膺保薦者仍照舊例驗看如此稍事變通庶於體恤微員之中仍寓考核事實之意至他省所屬各州縣雖不至如滇省之寫遠但教雜瘠苦情事亦多相同應俟此案奉旨後由臣部通行各省一律辦理謹奏光緒三十四年十月廿一日奉 旨依議欽此

吏部會奏催征南米酌擬改訂處分則例摺

吏部查臣部處分則例內開一各省催徵南米通作十分覈算如有未完初參州縣官欠不及一分者罰俸三個月一分以上者罰俸六個月二分以上者住俸三分以上者降二級留任四分以上者降三級留任五分六分以上者革職留任俱令戴罪催徵再限一年徵完完日開復違限不完卽加倍議處若三限不完照二參例再加倍議處又湖廣省應徵南秋等米奏銷時如有未完照地丁錢糧初參之例題參議處再限三個月徵完如限滿仍有未完亦照地丁錢糧一年限滿不完之例按其未完分數予以實降離任卽欠不及一分者亦照地丁未完一分之例議處各等語度支部查臣部則例內開各省額徵本折南秋糧米應於年內全完至次年五月奏銷時如有未完照例題

參仍勒限三個月全數徵完原參官准其開復限滿不完卽照地丁錢糧一年限滿之例按照分數分別參處等語詳核兩部則例一則湖廣重而各直省獨輕一則通指各省而言現當修訂法律之時自未便稍涉兩歧查各省南秋等米關係軍食自係同一緊要臣等往返片商擬請各直省額徵南秋等米均比照湖廣省之例概照地丁處分惟地丁二參舊例定限一年嗣因期限稍促復經臣等部會同奏請展限一年若南米二參限期僅止三月亦恐窒礙難行應請比照地丁現行新章一律准其展限如蒙俞允凡未經到部及業已到部尙未覆奏之件均照此次奏定新章辦理再此摺由吏部主稿會同度支部辦理合併聲明謹奏光緒三十四年十一月二十八日奉 旨依議欽此

京察

吏部奏酌擬變通 京察事宜摺併清單

先經臣部以官制變更卿寺部院衙門互有增併額缺不齊遷除迴異現屆舉行三十五年 京察之期亟應變通例章期與新定官制相合以免臨時周張等因光緒三十三年八月十七日奉 旨依議欽此欽遵行知各衙門遵照在案臣等詳查舊例並考覈新設官缺公同商酌謹將應行變通事宜分別開繕清單恭呈 御覽俟 命下之日由臣部通行各衙門此屆光緒三十五年 京察之期卽行遵照辦理謹奏光緒三

十四年八月十七日奉 旨知道了欽此

謹擬變通 京察事宜開單恭呈 御覽

一舊例 京察三年一次吏部將在京滿漢尚書侍郎左都御史內閣學士副都御史及 盛京五部侍郎爲一本在外總督巡撫爲一本繕具簡明履歷清單具題候

旨等語除 盛京五部侍郎奉裁不計外今按外務部請簡各國二三等公使均已改作實缺與從前暫作差事者不同應請由外務部飭取各該員履歷咨送過部由 臣部附入總督巡撫之末通爲一摺具奏候 旨

一舊例三四五六品京堂及內閣侍讀學士翰林院侍讀侍講學士詹事府左右庶子順天府尹府丞奉天府尹府丞俱繕具簡明履歷清單通爲一本具題後帶領引 見等語除各卿寺通政司詹事府奉天府各官奉裁不計外今按新設官缺若各部左右丞大學堂總監督民政部內外城巡警總廳丞大理院總檢察廳廳丞京師總銀行正監督造幣廠正監督各部左右參議學部國子丞都察院掌印給事中法部京師高等審判廳廳丞高等檢察廳檢察長大理院推丞總銀行副監督造幣廠副監督法部京師內外城地方審判廳廳丞均應照三四品京堂例繕具簡明履歷清單通爲一摺具奏後帶領引 見

一舊例大理寺正卿少卿係照三四五六品京堂例繕具簡明履歷清單通爲一本具

題後帶領引 見等語今按大理一官業已改寺爲院正卿秩二品應附入滿漢侍郎之後通爲一摺具奏候 旨少卿秩三品應按照三品京堂例繕具簡明履歷清單通爲一摺具奏後帶領引 見

一舊例軍機處章京悉由本衙門堂官註考今按頭二班皆已定有專缺應由王大臣遵照新章辦理其滿漢領班章京四員秩三品應按照三品京堂例幫領班章京四員秩四品應按照四品京堂例繕具簡明履歷清單通爲一摺具奏後帶領引 見

一舊例丁憂起復仍回原衙門已補人員到任後已過半年准其核算前俸查此項人員現在起復到署後即支食半俸擬由到署支食半俸起已過半年准其核算前俸再舊例外任官員丁憂回旗奉 旨內用者不准通理前俸惟查此項人員內有由京察一等蒙 恩簡放者係原食京俸人員擬自補缺之日准其通理前俸

一舊例滿漢官缺各有定額今按新定官制新舊各衙門一切差缺多半因材委補不分滿漢此屆 京察大典自不宜仍拘成格致滋窒礙應請保送一等人員按照額缺計算不必盡分滿漢

一舊例每屆 京察各衙門均按照所定額缺七人舉一今按軍機處翰林院衙門奏定新章按照六人舉一係爲廣籌出路起見查部院人員一體當差自不宜稍有軒輊擬請援照軍機處翰林院成案凡保送一等員數皆按照額缺六人舉一俾示平

允其中如額缺餘至四缺以上者准該堂官擇其才具出衆實有政績可考者保薦一員如不得其人任缺毋濫至一等人員自當照例呈進黃冊其二三等人員擬請免造黃冊以省煩瀆

一舊例太常寺所屬之四五六品看守 壇 廟官祠祭署奉祀祀丞等官但論其禮

儀之是否嫻熟行走之是否敬謹無庸填註四格等語今按民政部五六七品警官大理院看守所官皆專管一事自應援照奉祀等官成例警官但論其巡緝之是否勤奮看守官但論其防範之是否週密俱填註切實考語及稱職勸職供職字樣並六法等款以定去留俱無庸填註四格再此項人員按所定額數每六員中酌保一員俟引 見 圈出後由臣部照章以應升之缺升用註冊

一舊例宗室人員遇有列保一等奉 硃筆圈出覆帶引 見後如蒙 恩記名卽以道府恭候 簡用如係最近支派於排單綠頭籤內照向例一等人員註明內用等語今按各卿寺衙門大半裁撤內用無階可升擬請嗣後宗室一等人員於綠頭籤內註明係屬近支於 圈出覆帶後如蒙 恩記名卽與各項人員一律進單以道府恭候 簡用

一舊例 盛京分建五部所屬官員俱歸 京察辦理今按東三省已分設督撫應與各行省一律舉行 大計三年一次查奉天左右參贊秩正二品奉天交涉旗務民

政三司司使奉天吉林提法使秩正三品奉天度支蒙務二司司使秩從三品擬請令該督撫出具考語繕具履歷清單咨部由部彙覈具奏其道府以下等官該督撫將應舉應劾之員分爲二摺照各行省舊例辦理

一舊例 盛京各衙門及 三陵官員筆帖式均由 盛京將軍註考今 盛京將軍奉裁所有 盛京各衙門及 三陵官員筆帖式應由東三省總督註考
一各省均添設提學使司提學使一員秩正三品列銜在藩司之下臬司之上應請令該督撫出具考語附於藩司之次繕具履歷清單咨部由部彙覈具奏
一以上各條或有未盡事宜及須再行酌改之處由臣部隨時具奏請 旨其原定則例無庸變通者應均照舊辦理

法部奏總檢察各廳人員舉行 京察略示限制摺

竊光緒三十五年爲己酉年應辦 京察大典之期業經吏部奏准變通舊章並查照成案提前趕辦欽遵行知在案查臣部奏請在大理院附設之總檢察廳暨京師各級審判檢察等廳所有額定推事及檢察各官缺秩品大小均與臣部郎員主官階相等自上年開辦以來臣等督飭各該廳員於民刑案件細心經理以期無枉無縱其中間有聽斷未協者均經臣等隨時撤差以示懲儆現在補缺各員辦事勤能均知奮勉踴躍 京察大典若不與京官同列考績之中才能既無所表揚部廳幾自爲軒輊現當

整頓庶政之際擬懇 天恩俯准將總檢察廳暨京師各級審判檢察等廳所有推事及檢察各官比照部院五六品官之制一體舉行 京察其典簿以下各官亦視部院七八九品官違例入考以重大典而昭激勸准各廳開辦甫及年餘若即照吏部新章六員准保一員各廳多才長資淺之員轉有失三載試功之意臣等公同商酌擬於此次 京察先儘臣部實缺人員調往各該廳補授員缺者計俸量能保薦一等其由臣部候補人員暨各衙門實缺候補調陞各廳員者本屆均列入二等如此略爲限制庶於鼓舞之中仍寓慎重之意如蒙 俞允臣等謹當分別各該廳職掌遵照吏部新章通籌辦理至應保員數未能如額自當任缺毋濫謹奏光緒三十四年十月初三日奉旨依議欽此

吏部奏續擬 京察事宜摺併清單

先經臣部以官制變更額缺不齊亟應變通例章按照新設官缺分別釐訂將應行變通事宜開單請 旨遵行並聲明如有未盡事宜由臣部隨時請 旨等因於光緒三十四年八月十七日具奏奉 旨知道了欽此欽遵通行各衙門在案臣等復督飭司員詳查例章考覈新設官制尙有應行變通事宜謹酌擬辦法另繕清單恭呈 御覽謹奏光緒三十四年十月二十一日奉 旨依議欽此

謹將續擬 京察事宜敬繕清單恭呈 御覽

一 民政部法部郵傳部等衙門新設之小京官均係額設之缺與從前各衙門小京官未定額缺者不同擬請於此項人員內每六員舉一等一員不得與郎員主併計其外務部吏部度支部禮部學部理藩部所設之司務理藩部舊設之司庫僅一二缺不敷保薦者自應仍照舊例辦理

一 內閣等衙門所設之中書司務小京官筆帖式等官保列一等引 見記名者即以同知通判選用註冊並擬請准其隨時分發未經 記名者即以各衙門應升之缺儘先升用註冊

一 學部所設之書記官法部大理院郵傳部所設之錄事如遇 京察保列一等冊送到部由臣部查覈具奏奉 旨後即以各該衙門應升之缺註冊儘先升用毋庸帶領引 見其有由筆帖式改補者亦一律辦理

一 各衙門所設之書記官錄事及原設之筆帖式保列一等額數均擬定每七員舉一其裁缺籤分各衙門筆帖式既係作爲實缺自應與額設之缺併計准其一體保列

一 民政部新設之六七品藝師六七品醫官法部新設之監醫正監醫佐皆專理一事自應援照從前奉祀祀丞及御醫吏目等官成例藝師但論其藝能之是否精通醫官但論其醫理之是否通曉俱填註切實考語及稱職勤職供職字樣並六法等款以定去留無庸填註四格

一歸併禮部之簿正司庫典簿鳴贊序班等官共十六缺擬請仍保一等二員原太常寺讀祝官贊禮郎共四十三缺擬請仍保一等六員原鴻臚寺鳴贊十四缺擬請仍保一等二員歸併學部之典簿典籍七八九品奉祀官正副通贊官二三等書記官共二十四缺擬請仍保一等三員以符定例

又奏法部民政部各廳 京察一等員數片

再查法部新設之高等審判檢察廳及內外城地方審判檢察廳初級審判檢察廳檢察推事等官共計百有餘員。畿與法部額缺相埒所辦各事雖極繁要然究係專辦內外城承審案件與各部院統覈各直省應辦事宜情形自不相同若仍照新章每六員准其保薦一員未免漫無區別查各廳額設之五六品檢察推事等官共九十一缺擬請准保一等八員又七品以下典簿各官共二十二缺擬請准保一等二員惟現在各廳所設員缺補授尙未足額本屆 京察各廳保薦一等人員應照該部本年十月初三日奏定先儘法部實缺調廳補授之員計俸保薦其保薦額數應請照臣部此次章程辦理以便永遠遵守如不得其人任缺無濫又民政部新設之內外城總僉事等官共十三缺專理內外城警察事宜與法部新設各廳所辦事件大致相等擬請內外城准各保一等一員以歸畫一謹奏光緒三十四年十月二十一日奉 旨依議欽此

吏部遵議御史崇興奏嚴定京察截取章程摺

軍機處交出光緒三十四年十二月十一日欽奉 諭旨御史崇興等奏請飭吏部嚴定京察截取章程等語著吏部議奏欽此欽遵抄交到部原奏內稱 京察截取所以待資深任事之京員而吏部未定對品授職之例以前新衙門人員極其闕濫有以同知縣丞虛銜或五品功牌署補五品警官及檢察官之類若一體三年俸滿即准京察保送一等未免太易況新衙門內升外轉本較舊衙門爲多內升有丞參外轉有專缺如民政部則有巡警道爲其專缺大理院則有裁判檢察等官爲其專缺農工商部郵傳部則有勸業道爲其專缺彼之專缺他人不得開單他人出路彼皆可以搶取舊衙門則既抑其內升之階又塞其外轉之路於彼何厚於此何薄擬請 旨飭令吏部嚴定 京察截取章程凡各衙門五品人員由京員歷俸升補者照舊例辦理其由外官驟得署補者必扣滿食俸九年方准截取及 京察保送一等如此則獎勵之中仍有限制而 朝廷之待臣下亦不致有厚薄懸殊之弊等語查臣部考績定例內開捐納在部候選及加捐分部學習未經奏留卽行銓補實缺人員資格本淺於部務多未諳習若得缺後一滿三年卽准保送一等實屬過優應於試俸三年之外食俸二年統計歷俸已滿五年方准保送一等並不准捐免試俸以杜躁進又曾經分部學習期滿奏留補用人員行走有年於部務稍爲諳練其奏留後挨次補缺先後亦有不同除奏留後又經行走三年以上始行得缺者仍准照歷俸三年之例保送外其有得缺在三

年以內而該員尙未捐免試俸者則須歷俸四年以上方准一體保送若已捐免試俸仍照歷俸已滿三年之例辦理各等語臣等詳核例意捐納銓選得缺人員必扣歷俸五年分部學習人員又必扣奏留三年行走三年歷俸三年共計必須九年該御史等奏請由外官驟得補署必扣滿食俸九年方准京察保送一等其語不爲無據第調用各員有實缺候補候選虛銜之不同不能不略示區別臣等公同商酌凡各衙門調用外官均須明定限制擬請由捐保職銜調用者必由補缺食俸之日起扣滿九年由候補候選人員調用者無論正途異途必由補缺食俸之日起扣滿六年方均准保送一等至由實缺人員調用者如曾經到任食俸已滿二年應請由調京補缺之日起扣滿三年未滿二年者扣滿五年即准其一體保送一等又截取一節查例定截取年限係自本任食俸之日起分別正途異途核算與京察微有不同即郎中截取僅知府一項升選得缺又多在十年內外其擢用亦並不如京察之優故臣部上年奏定警官截取保送章程除從五品以下各官流品稍雜業經比照京員各項年限一律實扣不准捐免外至僉事知事兩項則以額缺有定量照郎中分別辦理此外各衙門新設各官但循舊定名郎中或奏明正五品秩視郎中者似均無從別爲限制致涉紛更該御史所請歷俸九年始准截取之處應請毋庸置議惟臣等重有請者大凡經制之規與其補苴於事後不如審慎於事先前以庶政繁興需材孔亟一切調補之員多奉

特旨允行而久之遂不免自爲風氣上年憲政編查館會同學部議覆御史孫培元奏請不得率調未經考試之留學生一摺於各項奏調改官學習補署委用各節條分縷析已極詳備是調用科舉捐保出身各員亦不患無塗轍之可循臣部現就京察截取二項例章悉心酌核實已無可加嚴而握要之圖則在各衙門堂官嗣後恪守憲政編查館學部定章秉公辦理如再有奏調奏留不合例者應均由臣部覆加查核准其隨時奏明請旨更正如此則倖濫可杜而升轉亦自歸於畫一謹奏光緒三十四年十二月二十五日奉旨依議欽此

守制

禮部奏陸軍部漢員仍應離任守制摺

光緒三十三年七月十一日准軍機處片交御史沈潛奏陸軍部請改漢員離任守制一節懇飭下禮部議奏欽此並將原片鈔送前來查原奏內以陸軍部請改漢員離任守制等因稱該部爲慎重戎政歷練人材起見原與擅改成例者不同惟三年之喪典禮綦重自周秦迄今二千餘年未之或易一旦改革究有輕棄古制之嫌况京外各衙門莫不有得力人員卽莫不有經手事件若輾轉援引中國三年之喪自此遂廢準情酌理尤覺未安如得力人員有經手要件未便遽易生手似不妨援奪情之例奏明辦理各等語臣等竊維載記載子夏問三年之喪金革之事無辟也者非歟孔子曰吾

聞諸老聃昔者魯公伯禽有爲爲之也今以三年之喪從其利者吾弗知也詳繹禮訓以喪從利聖人之所深絕自非戰爭孔棘不得託辭於有爲而爲平時戎政是修不得卽名爲金革之事辭義甚明無可傳會考明代洪武實錄謂三代聖王教化之事其僅存於今日者惟服制而已父母之喪自非金革不得起復著之國典我朝入關定鼎一仿明制其時戎事方殷故八旗籍隸軍旅百日後薙髮供職與武職在營素服辦事者相同然皆停止遷轉外省滿員文武一律丁憂去官漢員則無論京外悉離任守制武職在官者三品以上亦令奔喪名例律十惡七曰不孝凡居父母喪身自嫁娶若作樂釋服從吉者載有常刑此我列祖列宗承三代禮教之遺以孝治天下垂爲定制幾三百年矣今陸軍部不考國初定制原因又不引滿員在外任與武官三品以上一體奔喪解任之制藉口該部改爲陸軍與軍營情事相同遽變漢員文官丁憂舊例殊失列聖斟酌禮經教孝教忠以厚民德之本旨南史稱梁武時朝臣服除入見無戚容者終身坐廢彼衰亂之世尙嚴禮義之防於起復以後豈有盛朝臣子而不終喪者記曰孝者所以事君語亦有之孝弟之人不好犯上作亂蓋自然之效也乃者浮言胥動宵旰憂勤以禮防民猶懼弗及若以士夫而不居親喪則薄俗相仍世變何堪設想況我祖宗成法海內人心涵濡已久陸軍部雖經議奏度至性之人一遇丁憂必有堅請開缺以遂其哀者若從其請是自亂其例抑而不許重傷孝子之心空

礙情形當可想見該御史所奏自係爲維持世教起見臣等擬請 旨飭陸軍部仍即改從舊制以植綱常至該御史所稱奏明奪情一節臣等竊以爲奪情本非常見之事或重臣身繫安危與國家誼均休戚去就之間動關大局奪情與否 朝廷自有權衡非臣下所能擅請若陸軍部司員縱能得力佐畫戎機旣非臨陣可比卽經手事件祇屬部務儲才自在平日未必全無替人何須輕議奪情以爲遷就應請毋庸置議謹奏光緒三十三年八月二十日奉 旨依議欽此

御史俾壽奏嗣後京外官員丁憂請 飭回籍守制片

再京外官員遇有丁憂事故卽令回籍守制服闋後始行補用誠以犬馬效力臣工未敢云勞而烏鳥私情 聖朝原所不禁此 國制所爲定以三年也乃近來京外各官遇有丁憂事故並不回籍守制往往有夤緣堂官稽留本處藉詞延緩希冀差委該堂官亦因其薄有微長足供驅策思所以爲市恩之地或留辦事務或列入薦章候補者服闋後卽可補缺實任者服闋後卽可儘先陞用於理既有所不順於心亦有所難安殊非鼓勵人材之道且此等人員旣薄於父母而夤緣上官卽或小有才能亦安望其移孝作忠實心任事不過爲自己鑽謀地步實於風化官箴大有關係不可不嚴行飭禁擬請 旨飭下京內各部院堂官及各省督撫將軍嗣後丁憂人員不許稽留本衙門及本省干預公事儻有經手未完事件務宜飭令作速完竣回籍守制如有出外查

辦事件亦不得任意隨帶卽新政需人亦不許濫行投効卽或遇有應行留辦要政亦須於當時奏明不得私行准留庶該員不能假報效之名以遂其夤緣之計而京外各堂官亦無從援奪情之例以開奔競之門矣謹奏光緒三十四年九月初四日奉旨吏部知道欽此

議卹

吏部奏河工邊防等議卹人員酌定限制片

再查臣部例載軍營積勞病故從優議卹者照大洋大江漂沒例給予贈廕又大洋大江漂沒者照遇賊殉難官給廕又承辦軍需積勞病故在事竣以後者如奉旨交部議卹按本官應升品級給予贈銜毋庸給廕又離營人員並善後留防練軍一切差委及尋常押運解餉非赴軍營交納者均不應奏請卹典各等語詳繹例意軍營積勞病故人員出入鋒鏑幸畢餘生是以贈廕之典視別項較優近年以來離營及差委人員因病身故往往連例奏請又有以道員督辦銀號或總辦鐵路或充當商董迨其病故經各督撫部臣奏請比照軍營積勞病故人員從優議卹竊思辦理銀號鐵路等項人員卽有積勞亦祇尋常若盡按照營員贈廕則是局所辦公之吏皆比於沙場敵愾之人榮廕濫邀未爲允協臣等公同商酌擬請嗣後遇有河工邊防出洋暨經理路礦輪電銀號商務等項及例所未備人員如止因病身故雖經各該督撫部臣奏請援照軍

營立功後積勞病故議卹奉 旨允准其從優者臣部亦祇按承辦軍需積勞病故例照大洋大江漂沒及殉難議給贈銜未請從優者照內洋內河及軍營病故人員減等贈銜均毋庸給廕似此略爲限制既不沒該員之微勞亦可杜冒濫之流弊如蒙 俞允臣部卽定爲專章並通行各該衙門以便遵守謹奏光緒三十四年七月二十七日奉 旨依議欽此